

# حكاوي البلاوي

حقوق الطبع محفوظة لدار ملتقى المعرفة للنشر والتوزيع

ردمك: 0-32-6682-977-978

رقم الإيداع القانوني: 2020/2444

اسم العمل : حكاوي البلاوي

نوع العمل : مجموعة قصصية

الكاتبة : نادية رشاد عبده

مراجعة وتدقيق: أبو مروان المصري

إخراج فني : أبو مروان المصري

تصميم غلاف : أبو مروان المصري



ملتقى المعرفة

حقوق الطبع محفوظة لدار ملتقى المعرفة للنشر والتوزيع وأي اقتباس أو إعادة طبع أو نشر في أي صورة كانت ورقية أو إلكترونية أو بأية وسيلة سمعية أو بصرية دون إذن كتابي من الناشر، يعرض صاحبه للمساءلة القانونية.

القاهرة / مصر

جوال: 00201278821670

00201003528058

نادية رشاد

صور هزلية من حياتنا اليومية

حكاوي البلاوي



ملتقى المعرفة

# إهداء

أهدى تلك المجموعة الساخرة الى روح أُمي الغالية والى روح  
صديقتي سهام التي طالما نصحتني بنشرها وكم كنت اتمنى ان  
يعيشا معي تلك اللحظة..

وأهديها أيضا الى زوجي الغالي وأبنائي الأعزاء وإخوتي  
وأصدقائي الذين امنوا بموهبتي الساخرة..



## مقدمة

في حياة كل منا مواقف أغرب من الخيال وشخصيات لو لم نقابلها بأنفسنا ما صدقنا انها موجودة حولنا..

حكاوي البلاوي هي حكاوي نعيشها جميعا كل يوم وكل ساعة،  
وتصوير ساخر لسلبيات نتمنى أن تختفي من مجتمعنا  
المصري.. وبرغم أن تلك الحكاوي تمثل همومنا جميعا لكنني  
حاولت أن أرسم من خلالها بسملة على وجوهنا.. فالمصري  
دائما ما يضحك على متاعبه طالما لم يستطع حلها

نادية رشاد.. &





## فقع مرارة..

ليس من عادتي أبداً الاستعانة بكائنٍ من كان لتنظيف شقتي  
لأنني أضع كل شيء بنظامي ولى طريقي الخاصة في ترتيب  
الشقة؛ ولا أنوي تغييرها.. ولكن للضرورة أحكام..

كنت قد أجريت جراحة لاستئصال المرارة - كأبي مواطن  
مصري صميم - وعدت لبيتي بعد أسبوع لأجده وقد تحول إلى  
صالة مركز شباب الحبانية بعد نهاية الدورة الرمضانية..

ولما لا وكنت قد تركت زوجي وحيداً ما يزيد على أسبوع..

هل تعلمين ماذا يعني أن تتركي زوجك بمفرده أسبوعاً كاملاً؟

- يعني كل محتويات الثلاجة فارغة أو تالفة على رخامة المطبخ..
- يعني صينية طعام عن كل يوم غياب تحتوي على بقايا  
عيش مقدد وعلب تونة فارغة وبذر زيتون جاف..
- يعني علب بيتزا ملقاة خلف الأنتريه وعلب كشري فارغة  
في البلكونة..
- يعني قشر لب في كل مكان ولا كأنها سينما الشرق بالسيدة  
زينب بعد عرض فيلم رامبو..
- يعني غسيل في الغسالة وفوق الغسالة وتحت الغسالة..

○ يعني زجاجات مياه فارغة موزعة عشوائيا على كل الأنحاء  
دون تمييز..

○ يعني الأثاث مردوم تراب ويكأننى تركت الشقة منذ سنة..

○ يعني الحمدلله إني استأصلت المرارة بدلا من انفجارها  
من تأثير ذلك المشهد البشع..

ولما كان ذلك كذلك إذن فلا بد مما ليس منه بُد؛ واضطرت  
للاتصال بالأخت الرفيقة "أم محمد" زوجة البواب لتتولى  
مهمة إزالة آثار العدوان عن شقتي:

- ألو.. أيوه يا "أم محمد".. كنت محتاجاكي شوية عندي!  
فوق فاضية دلوقتى؟

"أم محمد":

- خير يا مدام فيه حاجة يعني؟ أصل ركبي ناقحة عليا  
ومش قادرة اطلع السلم.. (بداية غير مطمئنة)

- أبداً كنت عايزاكي تيجي تنضيفي الشقة.. إنتي عارفة لسة  
عاملة عملية ومش هاقدر أنضيفها..

- وماله يا مدام.. بس هاجيب معايا "أم عبده" ضربتى عشان  
تساعدني وتسترزق برضه بدل ما هي نقرالى في كل حاجة..

- ماشى يا ستى الأمر لله.. بس تطلعوا حالا أحسن حالة الشقة زفت..

وصعدت "أم محمد" وضرتها "أم عبده"؛ وهي سيدة خمسينية ملامحها ولغتها وعقليتها تذكر بالبدو الرجل الذين لا يعلمون شيئا عن المدنية والتحضر.. ولا غرابة في ذلك فهي التي لم تترك الصعيد منذ مولدها سوى تلك المرة على حظي السعيد.. يعني باختصار جاية تتعلم في شقتي..

قلبت "أم محمد" نظرها في أرجاء المكان وقلبت شفتها بأشمزاز لتوحي لي بأن الشقة ستحتاج لجهد بالغ.. وكلى نظر طبعاً..

- تحت أمرك يا مدام عايزانا نعمل إيه بالضبط؟ واحنا نعمله على طول.. بس لا مؤاخذة في دي الكلمة إنتي أخذتينا على مشمنا كدة من غير ما نشرب الشاي ونعدل الدماغ..

- ماشى يا ستى خشي المطبخ أعملي لكم كوبايتين شاي..

- هو أنا اعرف حاجة في مطبخكم يا مدام؟ تعالي كدة وريني مكان الشاي والسكر..

دخلت معها وأنا اسند بطني بيدي متألمة وأشرت إلى مكان الشاي والسكر قائلة:

- الحاجة أهي.. إغلي مية بقا في الكاتيل واعملي الشاي..

ردت "أم محمد" فاغرة فاها في بلاهة:

- في الإيبية؟ أنا مش بافهم في الحاجات دي يا مدام وأخاف

تبوظ منى..

ورغبة منى في اختصار الوقت أخذتها من قصيره وأعددت لهما

الشاي بنفسى؛ وجلستا تحتسيانه في استنكار واضح لا أدري لماذا..

لاحظت أن "أم عبده" التي لم تنطق بكلمة واحدة حتى الآن

مالت على أذن "أم محمد" وهمست لها بشيء ما فهزت رأسها

بتفهم والتفتت لي قائلة:

- لا مؤاخذة يا مدام أصل "أم عبده" مابتشربش الشاي على

الريق؛ يعني لو لقمة خفيفة كدة يبقى كتر خيرك أوي..

رددت بنفاذ صبر:

- قومي يا "أم محمد" طلعي حاجة من الثلاجة كلوا

وخلص..

لم أكمل كلمتي إلا ووجدت الاثنتان بداخل الثلاجة؛ وتطورت

اللقمة الخفيفة بقدرة قادر لتصبح بلوبيف وتونة وكبدة..

ومالت "أم عبده" مرة أخرى على "أم محمد" التي قالت لي:  
 - "أم عبده" بتقولك ما تلاقيش عندك حاجة حرشة..  
 شوية طرشي.. فحل بصل.. أي حاجة تفتح النفس!

رددت بغيظ:

- لا ما فيش؛ وخلصوني بقا عايزين نخلص قبل ما جوزي  
 يرجع من الشغل.. شهلوا شوية..

أكلوا وشربوا الشاي ووجدتهما جالستان مكانهما في استرخاء غريب..  
 أصررت على أسناني وغالبت رغبة قوية في ضربهما بمسدس  
 زوجي المرخص وقلت بصوت حاولت إبقاءه هادئا:

- مش ياللا يا جماعة بقا نشوف اللي ورانا..

مالت "أم عبده" على أذن ضربتها للمرة الثالثة فانبرت قائلة:  
 - لا مؤاخذة يا مدام أصل "أم عبده" بتحب تمدد بعد الأكل شوية  
 ومش معقول ها سيبها وأقوم.. دي ضربتي الكبيرة وتعملي شغلانة..

وإلى هنا لم أستطع تمالك أعصابي وصرخت بها:

- هو فيه إيه يا "أم محمد"؟ أنتم طالعين عندي تستجموا ولا إيه؟

ردت "أم محمد" باستنكار:

- لا يا مدام.. يا ندامتي.. نستحمى ده إيه؟ طب ده أنا لسة  
مستحميه مولد النبي اللي فات..

شعرت بغرز الجرح تنفك من الغل والغیظ؛ ولكن ما باليد  
حيلة مضطرة أتحمل تلكما البلوتين..

"أم محمد" وقد شعرت بأن الكيل طفح:

- ما تزعلیش يا مدام هنقوم أهو.. ياللا يا "أم عبده" قومي  
لما أوريكى هتعملى إيه..

قامت "أم عبده" وهي تنظر لي شذرا؛ فاقشعر جسدي خوفا حتى  
كدت أن أعرض عليها الدخول لغرفتي وأخذ ساعتين قيلولة..

وبدأت "أم محمد" من غرفتي وجلست أمامها على مقعدي  
وهي ترص في حكايات من هنا وهناك حتى أصابني الصداع  
وارتفع ضغط دمی من ثرثرتها وعكها..

وانتهت فجأة إنني لا أرى "أم عبده" فقامت بصعوبة للبحث  
عنها فوجدتها - اسم النبي حارسها - نائمة في غرفة الأولاد..

رجعت مغلظة كي أشكوها لضرتها فوجدتها انتهت من  
تنظيف غرفتي مسافة ذهابي لغرفة أخرى وعودتي..

حدقت بها مشدوهة:

- إنتي لحقتي يا "أم محمد"؟

ردت "أم محمد":

- ما هويا مدام لازم نشتغل على طول على طول كدة عشان  
نخلص من الزريبة دي..

صحت بها:

- تخلصي إيه يا ولية؟ دي الأوضة زى ما هي إنتي هتجنيني؟

مش كفاية البلوة اللي جايهاالى معاكي نايمة جوا دي..

- هي نامت؟ هي. هي. هي.. أحسن خليها مغمودة نوم الظالم

عبادة.. دي مطالعة عيني يا مدام والله إمتى بقا تتنيل تروح ع

الصعيد.. أصلها فاكراني هنا عايشة في جنة وبأكبش فلوس

وأحوش.. حكم بقا أبو محمد مفهمها إن مصر دي إيه.. يغمه

وُنغنيغة فجات عشان ينوبها من الحظ جانب إنما بقا أنا...

قاطعتها صارخة:



- يعني أنا اللي هاقدرو وأنا فاتحة بطني.؟
- معلاش إسندي بطنك كدة بايدك جامد واطلعي واحدة؛ واحدة..
- سندت الجرح بيدي مثلما قالت لي الست "أم محمد" وصعدت السلم بصعوبة بالغة ونظفت الجزء المطلوب من السقف.. فجاءني صوتها من أسفل:
- اسم الله عليكي يا أختي.. عيني عليكي باردة.. ما إنتي زي الفل أهو.. بالمرّة بقا وإنتي ع السلم خدي الحتة دي ولمعي النجفة يكفيكي شر المرض ووجع الركب..
- رددت عليها وأنا اصرخ لا أدري إن كان صراخي غيظاً أم ألماً:
- مش قادرة يا "أم محمد" حرام عليكي الجرح شد عليا..
- ردت باشمئناط:
- يا ختي جرح إيه وبتاع إيه.؟ انسي الهم ينساي وفي الحركة بركة.. دي حتى الرقدة تجيب المرض..
- وهكذا يا حضرات.. السقف جر النجف؛ جرفوق الدواليب ونظفت كل هذا بنفسني تحت إشراف الأخت الرفيقة "أم محمد" وانتهيت من تنظيف الريسبشن والحمد لله نال عملي إعجابها الشديد..

ثم حان دور غرفة الأولاد المخمودة بها "أم عبده" وصوت  
شخيرها يصل إلى برج خليفة في دبي..

هزتها "أم محمد" قائلة:

- "أم عبده".. إنتي يا ولية يا "أم عبده".. قومي بقا كفاية  
نوم خللي المدام تنضف الأوضة..

قامت "أم عبده" متأففة وهي تتنأب مثل كلب البحر؛ وبعدما  
هرشت في رأسها ودعكت في عينها مالت على أذن "أم محمد"  
من جديد؛ فقالت الأخيرة بخجل مصطنع:

- ينيلك ولية إنتي لحقتي جوعتي؟ يادي الكسوف.. لا مؤاخذة  
يا مدام أصلها عاملة زى العيال لو نامت تصحى جعانة..  
معلش والنبي شوفيلها لقمة تاكلها وأبقى خلصت من هم  
الغدا.. خليكي إنتي مستريحة إنتي لسة قايمة من عملية يا  
نضري؛ وأنا هاخش أكل أنا وهي لقمة بسرعة ع بال ما  
تخلصي الأوضة دي على مهلك كدة.. وزى ما علمتك تسندي  
بطنك بإيد وتنضفي بإيد.. ياللاها وريني الهمة بقا..

سندت بطني بيد ونظفت الغرفة باليد الأخرى وأنا على وشك  
البكاء ولطم الخدود..

وعاد زوجي من عمله ليجدني أشطب في الغرفة وأنا أضع يدي على بطني وقد ألمني الجرح بشدة وأستند على الجدار في إعياء بالغ.. نظرتي بذعروصاح في غضب:

- إيه اللي إنتي بتعمليه ده؟ إنتي اتجننتي؟ فين "أم محمد"؟

- مع "أم عبده" في المطبخ

- بينضفوه.؟!

- لا بيقشطوه.. خش الحقلك حاجة تتغدى بيها..

دخل زوجي المطبخ والشرفي عينيه فوجدهما انتهى من مرحلة الثلجة ويجلسان في مرحلة احتساء الشاي..

صرخ بهما في غضب:

- ينفع كدة يا "أم محمد"؟ تبقى قاعدة والمدام بتشتغل وهي تعبانة! أمان إنتي لازمك إيه.؟!

ردت "أم محمد" بلا مبالاة:

- يوه يا بيه ما أنا قايمة اهوه.. هي اللي لا مؤاخذة ماعندهاش صبر.. هو الحق عليا يعني إني حركتها عشان





صاحب الإدارة.. بواب  
العمارة..

عم "فضل الله" ..

عم "فضل الله" يا حضرات هو أسوء بواب عمارة قد تقابله في حياتك.. فهو يجمع ما بين عدة صفات تكفي صفة واحدة منها أن تجعلك تكره العمارة بسكانها وتفضل عليها دار المسنين لحضرتك ودور الأيتام للأولاد..

وهذه نبذة مختصرة عن كينونة ذلك الكائن الهلامي ذو الشخصية (بنت التييبييت)..

عم "فضل الله" راجل صعيدي من جرجا يبلغ من العمر حوالي 55 عاماً؛ متزوج من اثنتين.. أينعم اثنتين..

إحداهما تنجب إنثاً وهذه مقرها الصعيد.. والأخرى لإنجاب الذكور وتلك مقرها معمل التفريخ بغرفته الكائنة ببئر السلم..

وهذا المعمل ينتج طفل ذكر كل عشرة شهور.. تسعة شهور حمل وشهر إعادة تأهيل وصيانة.. وبالرغم من أن زوجة الصعيد هي أم البنات؛ ولكنها تعتبر مركز قوى ولها كل الاحترام والتبجيل؛ فهو يجمع كل دخله الشهري ويسافر ليضعه في حجرها طالبا الرضا والسماح؛ ويترك أم البنين هنا مع نفسها..

وعندما نستيقظ صباحا على صوت صراخها وهو يبرحها ضربا  
وركلا نعلم أن سبع الفلا وصل وهذه هي مراسم الاستقبال..  
في صباح يوم جمعة استيقظت على صوت مألوف جداً -  
صوت (أم البنين) وهي تصرخ وتسب بكلمات جرجاوية (لغة  
أهل جرجا) - فعلمت أن المحروس وصل وهي كالعادة تهنئه  
بسلامة الوصول..

دخلت أجهز طعام الإفطار فدخلت "بوسي" خلفي قائلة:

- ماما.. أنا نفسي أفطر النهاردة طعمية سخنة.. أنا زهقت  
من الجبنة الرومي والبيض واللانшон بقا..
- ومين يا "بوسي" اللي هيحيب طعمية دلوقتي؟! النهاردة  
الجمعة وتلاقي المطعم على بعضه..
- ماليش دعوة بقا أنا عايزة طعمية.. اتصلى بـ "أم محمد"  
تجبيلنا..
- يا بنتي "أم محمد" دلوقتي بتنضرب مش فاضيانا..
- يا ماما زمانها اتضربت وخلصت أنا مش سامعة صوت..
- أه والنبي صحيح ده ما فيش صوت خالص! يالهوي..  
ليكون موتها! نعمل إيه دلوقتي..

- خلاص يا ماما اتصلي بيها؛ ولو كان موتها هاكل جبنة وامرى لله!  
واتصلت بـ "أم محمد" وظللت استمع إلى الكول تون التي  
تضعها الست هانم أغنية (أصالحك وماله) وبعد عدة  
مكالمات رد "فضل الله": "وسمعت ضحكة "أم محمد" تجلجل  
وهي تسأله بدلال ومياصة:

- مين يا فضلولتي.؟

فتأكدت أن "بوسي" ستفطر جبنة.. وقفلت في هدوء..

وفي صبيحة اليوم التالي هبطت الدرج للذهاب إلى عملي وكان  
البية البواب جالسا أمام العمارة ولا أجدع عمدة أمام دواره..

- صباح الخير يا عم "فضل الله" .. إيه! السلم مش ممسوح  
يعني.؟ أنت مش جاي من امبارح.؟

- يسعد صباحك يا مدام.. اييبه.؟ حامية علينا كدة  
لييبه.؟ ما فيش حمدالله ع السلامة! أنا لسة جاي  
امبارح ما ارتاحتش وكل سنة وإنتي طيبة يا مدام..

نسيت أن أخبركم أن "فضل الله" طوال العام يئن بأعياد  
مجهولة لا يعلمها إلا هو..

نهايته.. تركته وذهبت لعملي على أمل أن أجد السلم نظيفاً  
عند عودتي؛ وبالفعل يا سادة عدت فوجدت سلم العمارة  
المجاورة نظيفاً.. أما عمارتنا فكما تركتها صباحاً..

- يا عم "فضل الله" .. أنت يا عم "فضل الله" ..

رد وهو يشطف يده من تنظيف العمارة المجاورة:

- خير يا مدام؟

- خير إيه؟ ما مسحتش سلم العمارة ليه؟

رد ببرود وهو يرشف من كوب الشاي الحبر الذي لا يفارق يده:

- اسكتي يا مدام ع اللي حصللي.. صحيت الصبح بعيد عنك

خبط في نافوخي ومش شايف قدامي؛ بس قلت أبداً لازم امسح

السلم إلا السكان يخذوا على خاطرهم.. وعنهما يا مدام رحت

ساحب الخرطوم والممسحة وحطيت ديل جلابيتي لا مؤاخدة في

الكلسون وهاتك يا مسح وتنضيف لغاية ما سي عاشور بيه فتح

باب شقته وقال: "بتعمل إيه يا عم "فضل الله"؟"

- عاشور بيه مين؟

- ده اللواء اللي ساكن في السادس في العمارة اللي جنبنا..

- أنت ها تجنني يا راجل أنت!. مال عاشور ده ومال  
عمارتنا.؟
- ما هو ده مربط الجحش يا مدام.. ما هو آني ساعتها بس  
فوقت لنفسي وعرفت إني بمسح سلم العمارة اللي جنبنا  
هييييييي.. يقطع وجع الرأس وسنينه..
- لا والله.؟! تصدق حكاية مؤثرة أوي.. وادولك كام بقا لما  
فقت لنفسك.؟!!
- هما التلاتين ملطوش بتوع كل مرة لما أتخبط وامسح سلم  
عمارتهم.. وكل سنة وإنتي طيبة يا مدام.. هييييييي..
- نظرت له بغيظ وصعدت لشقتي وأنا أبرطم لاعنة البرود  
والباردين.. ودخلت لأجد "بوسي" وبودي جالسين يهمسان على  
غير العادة فعاجلتهما بالسؤال:
- خير.؟! إيه اللي لم تنتون على تنتن.؟ أشجوني.. بتدبرو لأية.؟
- "بوسي": بصراحة كدة يا ماما إحنا عايزين علاوة..
- نعم يا أختي.؟ عايزين إيه.؟
- رد المزغود الصغير "بودي":

- أيوه يا ماما عايزين حلاوة..
- ما الحلاوة في الثلاجة يا خويا..

ردت "بوسي":

- حلاوة إيه يا زفت؟ قصده علاوة يا ماما.. يعني زيادة في المصروف.. مصروفنا ما عادش بييجيب حاجة
- أيوه يا ماما.. ده أنا روحت أنا وأصحابي النهاردة نجيب أيس كريم ودفعنا كل واحد جنيهه راح عمو علي البقال فتح واحدة وقاللنا كل واحد ياخذ أربع لحسات عشان اللحسة برع جنيهه..

رددت بعصبية:

- أنتم بتاخذوا كل واحد خمسة جنيهه في اليوم.. والمدرسة قدام البيت كفاية عليكم أوى كدة..

"بوسي": خمسة جنيهه إيه بس يا ماما؟ ده محمد ابن عم "فضل الله" البواب بياخذ 15 جنيهه ده غير اللي بيطلعله من سكان العمارة لما بيوصللهم حاجتهم..

- وعرفتي منين يا فاضلة الكبة أنتي؟

- هو اللي قال ل "بودي" لما لقاها بيلحس الأربع لحسات  
أيس ك ريم؛ وقعد بغيظ فيه لحد ما عيط..

صرخت بها وأنا أتميز غيظا:

- طب خدي أخوكي اللي ساحباه وراكي وانجروا على  
اوضتكم.. هو أنا ناقصاكم انتوا كمان..

دخلت مقصوفة الرقبة وهي بتبرطم:

- هو إيه ده بقا؟ أنا عارفة بابا ما طلعتش بواب ليه؟ يا  
فرحتي البيه رايح والبيه جاي واحنا بناخد 5 جنيه..  
- بطلي برطمة ياللي تنقرصي وتعالى شوفي مين بيخبط..  
منك لله يا "فضل الله" أنت وعيالك..

"بوسي": دي "أم محمد" يا ماما..

أنا: ادخلي يا "أم محمد" إيه مالك بتعيطي ليه.

"أم محمد" باكية:

- الراجل الدون الناقص خد الفلوس اللي محوشاها كلها  
وبعتهم للمخفية في البوسطة.. وأنا لميت هدومي وها خد

العيال وأروح لأهلي في البلد.. وديني مانا قاعداله فيها  
 ويوريني بقا هيصرف منين؟ إهىء. إهىء  
 - كدة برضه يا "أم محمد" تسبينا للراجل اللي مالوش لازمة  
 ده؟ لما أعوز حاجة أنا ولا العيال بقا مين يجيبهالنا؟  
 "أم محمد" بعتاب:

- إبقى خلي اسم النبي حارسها تجيبلك ما هي اسم الله  
 عليها كبرت.. على فكرة أنا كنت عايزة اشتكيلك منها.. بقا  
 يصح تخليني قاعدة بأكل في وسط ناس جايلنا م البلد  
 وأقولها تعالي كلى تقوم مبحلقالى أوى وتقللي بالنبوتى؟  
 - إيه بالنبوتى دي؟  
 - أكيد قصدها بالنبوت طبعاً..  
 - يا شيخة أكيد ما تقصدش.. المهم ما تبقيش تطولي  
 الغيبة مع السلامة..

ناديت "بوسي" ..

- إنتي يا بنت.. تعالي هنا..

"بوسي" وهي تمد بوزها في غضب:



- أفندم..
- إنتي مالك ومال "أم محمد" بتقوليلها بالنبوت ليه؟
- ردت "بوسي" باستغراب:
- أنا يا ماما؟ دي هي اللي ما تعرفش فرنساوي.. أصل مسيو عمر بتاع الفرنسيواي قاللنا عشان اللغة تثبت في دماغكم حاولوا تتكلموا بيها مع كل اللي حواليكم؛ عشان كدة لما قالتلي تعالي كلى قولتها بونا أبيتي..
- بس هي قالتلي إنك بحلققتها..
- لا يا ماما أنا كنت مركزة عشان افكر الكلمة..
- امممممم.. ودي يا فالحة يتقاللها بونا أبيتي؟! دي ديك النهار كانت بتتعشى تحت واتكرعت أبوك أتقلب من ع السرير..
- وسافرت "أم محمد" ووقع "فضل الله" في حيص بيص بالطبع.. فبي رمانه الميزان والدجاجة التي تبيض له ذهباً..
- فهي من تغسل السيارات؛ وتنظف شقق العمارات وتغسل سجاجيد في العيد؛ والأولاد يقومون بخدمة التوصيل للمنازل.. كل هذا وما على الباشا سوى جمع حصيلة تلك الأعمال..

فماذا هو فاعل الآن بدونهم.؟

ولكنه لم يغلب يا حضرات..

كنت عائدة من عملي ذات يوم وأنا أتهلل فرحا والسبب ترشيحي  
لحضور دورة تدريبية في الإسكندرية لمدة عشرة أيام تمهيدا  
لترقيتي لدرجة مدير عام.. وإذا بي أجد مدخل العمارة يعج  
بأطفال من كل المقاسات والأعمار وكلهم يصيحون:

- أنا ما خدتش يا عم "فضل الله".. أنا واقف من بدري يا عم..

تنحيت جانبا في ذعر خوفا من أن يدهسوني أثناء خروجهم..  
كان البعض خارجا بكيس فشار، والبعض خارجا بكيس غزل  
البنات والبعض الآخر واقفا ينتظر شيئا آخر لم أتبينه..

انتابني حالة هستيرية وصرخت في عم زفت:

- إيه ده يا راجل أنت.؟ أنت فاكر نفسك قدام جنينة الحيوانات!.

دي عمارة محترمة.. شيل الزفت اللي أنت حاظه ده من هنا..

وبمنتهى البجاجة والبرود رد:

- الله الله الله.. جرى إيه يا مدام.؟ حاجة وبنسترزق منها..

ولا أنتم فاكرين الخمسين ملطوش بتوع كل شقة دي

هتعيشنا؟ يعني وبعدين لا مؤاخذة بقا ما حدش اعترض  
غير حضرتك.. ده حتى سي الأستاذ جوزك لسة واخذ مني  
كيسين غزل البنات وطالع وما دفعش حقهم ولا مؤاخذة..  
تجاهلت جملته الأخيرة وصعدت عازمة على تأنيب زوجي على  
النزول إلى هذا المستوى..

دخلت الشقة لأجد زوجي الهمام يمصمص في كيس غزل  
البنات بنهم واستمتاع.. هممت بتعنيفه لكني تذكرت موضوع  
سفري وأني بحاجة للاحتفاظ بمزاجه رائقاً كي أنال موافقته..  
خاصة وهي المرة الأولى التي اتركهم فيها بمفردهم..

فاتحت زوجي بالموضوع فانقلبت سحنته وارتفع حاجباه  
وسألني السؤال المتوقع:

- والعيال يا هانم هتعملى فيهم إيه؟

أنا بتملق ودلال:

- ما هو أنت الخير والبركة يا حبيبي.. وبعدين "بوسي"  
معاها المفتاح هتجيب اخوها من المدرسة كل يوم  
ويستنوك على ما تيجي من الشغل.. وأنا هحضرلكم

كل الأكل اللي بتحبوه في الثلاجة وأهي كلها عشر أيام  
يفوتوا هوا..

وقد كان.. وسافرت متحمسة حماسا يشوبه القلق لعلمي أن  
الرجال لا تستر في تلك المواقف.. وانخرطت في دورتي التدريبية  
والتي كانت تحضرها معي مدام "نوال" رئيستي في العمل..

ولن لا يعرف مدام "نوال" فهي سيدة مقاسها العرض عرضين..  
قوية ومفترية ولا يعجبها أحد.. باختصار قنبلة تسير فوق الأرض  
ويشاء حظي التعس أن تصاحبني طوال رحلتي.. ويبدو أنني رقت  
لها على نحو ما فتبسطت في الحديث معي على غير العادة..

كنت أهاتف زوجي والأولاد يوميا كانوا بخير ولكن شيء ما في أسلوب  
الحوار لم يريحني.. لدرجة أن البت "بوسي" في آخر مكالمة قلت لها:

- ها يا حبيبتي عايزاكي شطوره كدة وست بيت وأجي ألاقي  
الشقة زي الفل؛ يمكن تيجي معايا ضيفة..

ردت عليا:

- خليها على الله يا مدام.. كله هيبقى لوز بعون الله..

إيه ده؟! مين دي؟! معقولة دي بنتي.؟!!

المهم فانت الأيام ورجعت من السفر معايا الست "نوال" رئيسي إياها والي ما صدقت قولتها اتفضلي معنا فتفضلت على طول.. وكنت طوال الطريق قد أصبتها بالصداع بسيرة "بوسي" و"بودي".. وكيف صرفت دم قلبي على مدارسهم الخاصة لكي يتعلما تعليماً راقياً..

دخلنا مدخل العمارة لنجد أن السيرك منصوب.. عيال طالعه وعيال نازله؛ وعربة الفشار بجوارها عربة غزل البنات.. وفي الواجهة لوحة نيشان وما يلزمها من بنادق رش و...  
(فتح عينك تأكل ملبن)..

يادي الفضيحة أم جلاجل؛ والجرسة أم حناجل..  
شعرت أنني في نصف ملابسي..

وإذا بالست "نوال" تصرخ بالصوت الحياني فوجهت نظري نحوها فوجدت عيلين "مزاغيد" يلعبون الاستغماية وقد اكتشفوا أن خلفيتها العريضة مكان ممتاز للاختباء وراءها..

لم تكن هذه هي المشكلة.. المشكلة أن "مزغود" ثالث ترك لوحة النيشان وأحب أن ينشن على العيال الذين يختبئون

وراء الست "نوال" .. ومن سوء حظها - وحظي بالطبع - أن  
الولد كان أحول ونشن على..

إحم.. إحم.. أترك لخيالكم تكملة المشهد..

ظللت أهدئ في مدام "نوال" وأحاول إسكاتها لتكف عن  
الصراخ.. وأخيراً أقنعتها بأعجوبة أن تصعد معي إلى شقتي  
لتناول الغداء والراحة من وعثاء السفر.. معشمة إياها أنها  
توأ ستتعرف على أرق وألطف طفلين في الوجود اللي هما  
"بوسي" و"بودي" طفليّ العزيزان..

أجلستها في الأنتريه ودخلت أنادي على عصفوري الجنة بكل شوق..  
وفجأة وجدت "ولية" صغيرة خارجة من المطبخ وهي تضع فوق  
رأسها صينية عليها ما لذ وطاب من الطعام والشراب ثم  
هتفت مرحبة:

- يا أهلا وسهلا.. يا ألف مرحب.. ده إحنا زارنا النبي حمدالله  
ع السلامة يا ماما.. والنبي ومين نبى النبي ليكي وحشة..  
مش تعرفينا بست الحاجة..

يا سنة سودة.. دي "بوسي" ..

- بت يا "بوسي" إيه اللي إنتي عاملاه في نفسك ده؟
- اسكتي يا ماما من ساعة ما اشتغلنا مع عم "فضل الله" الله يستره والقاشية بقت معدن ع الآخر.. مش شايفة الخير مالي الشقة إزاي؟

حملقت بها وأنا لا أصدق عيني؛ ولا أذني.. وقطع ذهولي صوت خبط على الباب وأنا واقفة في مكاني لا أقوى على الحركة.. فتحت "بوسي" الباب؛ وإذا بصبي متسخ الوجه يسأل بمنتهى السوقية:

- هي خالتي أم "بودي" هنا..
- احتجت إلى بعض الوقت كي استوعب أني أنا خالته أم "بودي".. وسألته وأنا مرعوبة:

- فيه إيه!! "بودي" جراه حاجة؟
- يرضيكي يا خالتي أم "بودي" أن الواد ابنك ياكل نص كيس الفشار قبل ما يبيعهولى ويقوللى عشان ما يدلدقش منك! طيب والله لابطحجولك..

التفتت بسرعة تجاه الست "نوال" راجية من الله أن تكون قد أصيبت بالعمى والصمم والبله المغولي على سبيل

الاحتياط حتى لا ترى ولا تسمع أو على الأقل لا تعي ما رأته من فضائح..

ولكن للأسف وجدتها تضع حذاءها في قدميها؛ وتعلق حقيبة يدها في كتفها استعداداً للرحيل.. لا لا.. أقصد للهروب من هذا الجنون..

ولم تنس بالطبع أن تترك بعضاً من سجايها القويمة وهي تغادر الشقة.. فقد أخذت تسب وتلعن كل هؤلاء الموظفين البيئة الذين يريدون أن يصبحوا مدراء عموم.. وهذا لن يحدث أبداً طالما هي على قيد الحياة..

سقطت من فوري فوق أقرب مقعد بعدما ضاع مستقبلي وطارت الترقية لا محالة..

أخذت أبحث بعيني عن المحروس زوجي الهمام الذي تركت له طفلانا لمدة عشرة أيام فحسب لأعود وأجدهما وقد تحولوا إلى "تفاهة" و "أم الشحات" في فيلم بلية ودماغه العالية..

نظرت لـ "بوسي" التي كانت واقفة تطرقع في لبانة وسألتها:

- أبوكي فين يا أم الشحات.. يوووه.. قصدي يا "بوسي"؟

ردت بتلقائية شديدة:

- هو إنتي ما شوفتمهوش وإنتي طالعة؟ ما هو اللي كان قاعد  
على لوحة النيشان تحت..

-

تمت





# تأمين صحي..

الحادية عشر ليلاً ذات ليلة قارسة البرودة..

سعادة طاغية وأنا أنسل تحت الأغطية الثقيلة بينما المطر على أشده في الخارج، والأولاد في حجرتهما الدافئة واليوم عطلة، وزوجي مسافر في عمله ولن يأتي قبل أسبوع.. إذن لدي موجبات السعادة كلها.. وبدأت أدندن:

- يا عنيا يا قلبي جرى إيه؟ الدنيا احلوت كده ليه؟

قطع انسجامي رنين هاتفي فتمتت:

- إيه الفصلان ده؟

يبدو أنه زوجي يسألني ككل ليلة في رومنسيته المعهودة:  
"اتخمدتي؟ ولا قاعدة ع المحروق النت.؟!"

هممت بالرد وإذا بصرخة تثقب طبلة أذني؛ وأطارت الهاتف من يدي وسقط قلبي في قدمي، وانحنيت لألتقطه - الهاتف طبعاً مش قلبي - وإذا بالمتصل "سلوى" جارتني وهي حامل في طفلها الأول وكانت تصرخ وتولول في ألم:

- الحقينيينييي يا نهى هاموووووووت..

- مالك يا "سلوى" فيه إيه؟



- أنا موظفة ها ولد فين يعني؟ مستشفى التأمين الصحي طبعا..
- طيب فين شنطة البيبي؟
- اااااااااااا.. شنطة إيه وزفت ايبيه؟ هاتي بطاقة التأمين..

تمتمت في سخط:

- زفت على نافخوك يا بعيدة.. حبك يعني تولدي في الليلة دي بالذات؟ يادي البخت الأسود..

وسندتها وهي تصرخ وتتلوى كالقرموط.. وقفت أمام البناية والمطريهطل وصرخت منادية سيارة أجرة..

- تاكسي.. تاكسي..

وجاء التاكسي..

هممنا بالركوب عندما سألنا السائق:

- على فين بالمشيئة؟
- مستشفى التأمين الصحي الله يخليك يا أسطى..
- امممممم.. بلا قافية دي مش سكتي..
- واحنا مالنا ومال سكتك؟ دي سكتنا إحنا أنت مش تاكسي ولا إيه؟

- أيوه تاكسجي بس الجوزوخل وأنا عايز أروح لعيالي..
- يا أسطى الله يخليك الست بتولد اكسب فينا ثواب..
- خلاص أوديكم مستشفى في سكتي..
- يا سيدي هي بتولد في مستشفى التأمين الصحي..
- لا لا لا.. تولد أحسن في مستشفى بولاق عشان في سكتي  
لا مؤاخذة..
- يا بني آدم أنت ها تولدها على مزاجك؟ حرام عليك ده  
إحنا ستات ولوحدنا..
- امممممم.. قطعتي قلبي يا مودام خلاص ادخلي وقعديها..  
"علي" مهلك.. ربنا يقومها لك بالسلامة..
- وبعد تحرك السيارة قال:
- يااه.. كلامك حكم يا مودام وأنا أصلي بلا قافية حساس حبتين..  
رديت وأنا لا أتذكر أي حكم قلتها:
- تشكر يا أسطى أنت باين عليك ابن حلال..
- أمال يا مودام.. حد واخذ منها حاجة؟ يعني مثلا مشوار  
زي ده أي سواق هيقوللك 150 جنيه.. عالم جشعة ولا  
مؤاخذة إنما أنا مش هاخذ غير 100 بس..

- يا نهار اسود 100 جنيه؟ ليه؟ دول محطتين.. هما  
عشرين جنيه بس..

- عشرين إيه؟ بقا دي جزاتي برضه؟ طب لا مؤاخذا بقا  
اسحبي المقطورة أم شاكمان بايظ دي واتكلوا على الله  
من هنا.. ده العشرين جنيه دول أجيب بيمم برشام  
للصداع اللي جالي من شخيرها.. قال بتولد قال.. دي  
مخمودة من ساعة ما ركبت..

وحانت مني التفاتة لسلوي لأجدها تنام قريرة العين مرتاحة  
الضمير وصوت شخيرها يجلجل في السيارة.. انتهت على  
صوت فرملة السائق بشدة.. فرملة قذفت بنا إلى خارج  
السيارة وصوت سبابه يعلو قائلاً:

- روجي يا شيخة إلهي تولدلكم قرد بصديري شهها.. قال  
عشرين جنيه قال.. هع..

نغزت "سلوي" في جنبها بغيظ قائلة:

- نمتي يختي وشبعتي نوم؟

ردت بصرخة جمعت حولنا المارة وتبرع أحدهم بتوصيلنا إلى  
المستشفى ليبدأ فاصل آخر من التعذيب..

كانت الساعة تقترب من الثانية صباحا واستقبال الطوارئ خاليا تماما إلا من فرد أمن نائم..

نغزت "سلوى" في بطنها حتى تشغل السارينه فهب الرجل من مكانه صارخا:

- في إيه يا ولية أنتي!. بتصرخي كدة ليه فزعتيني..

صرخت فيه بدوري:

- الست بتولد.. عايزين دكتور بسرعة..

نظرتي مستنكرا كأنني طلبت طبيبا في محل كشري؛ وأجابني باشمئزاز:

- دكتور إيه الساعة دي.؟ إنتي عارفة الساعة كام.؟

- هو أنا جاياله البيت يا عم أنت.؟ الست عايزة تولد أروح بيها فين.؟ محطة مصر.؟

ونظرت لسلوى نظرة ذات مغزى؛ فأطلقت السارينه حتى ظهرت أخيراً إحدى ملائكة الرحمة؛ منكوشة الشعر مقلوبة السحنة وصوتها الذي ذكرني بزماره بائع غزل البنات يجلجل وهي تسأل الرجل:

- إيه الغاغة دي؟ فيه إيه يا "فوزي"؟
- دي واحدة يا ستي عمالة تطلق.. قال إيه عايزة تولد..
- المرضة وهي تسد أذنيها:
- يا مدام سكتي الست دي.. ما يصحش كدة.. هتصحو  
الدكتور..
- صحت بها:
- خبر اسود ومنيل ما إحنا عايزينه يصحى يا ناس.. هي دي  
مش مستشفى ولا أنا غلطانة؟
- وهنا دوي من آخر الطريقة صوتا مغلفا بالنعاس:
- هو الواحد ما يعرفش ينام في المخروبة دي شوية؟
- كان رجلا محمر العينين، منفوش الأنف.. يتثائب كفرس النهر  
ومهرش في رأسه وهو يسال في تبرم:
- إيه الدوشة دي يا سعاد؟
- "سلوى": عايزة الدكتور.. أنا ب أولد يا عالم
- نظر لها في برود قائلا:

- طب ما تقولي كدة وخلص لازم الصريخ والصويت وشغل الأفلام الأبيض واسود ده؟

ثم وجه كلامه للممرضة وهو يتثاب ثانية:

- ارميها ف كشك الولادة على بال ما أطس وشي بشوية مية..  
- حاضريا دكتور

خبطت على صدري في ذهول:

- إيه؟ دكتور.؟ هو ده الدكتور بتاعكو.؟!

أجابت الممرضة:

- أه دكتور سيد.. ماله.؟ مش عاجبك.؟

رددت بسرعة:

- أبدا.. أبدا والله.. لو ندهتي للواد اللي واقف على عربية الكبدة بره يولدها والله ما حاقولك لا.. خللي الليلة الهباب دي تعدي..

دقائق وظهرت تومرجية مرعبة الشكل شخطت فينا:

- مين فيكم اللي ها تولد.؟

ظهر الرعب على وجه "سلوى" وأشارت لها تجاهي في دعر..

انبريت مدافعة عن نفسي في رعب:

- والله ما أنا دي هي اللي... حتى بصي على بطنها..

ووسط محاولات "سلوى" للإنكار بشفط بطنها جرتها التومرجية من هدومها وهي تحاول التملص صارخة:

- مش أنا.. مش أنا..

واختفت عن نظري..

ثم ظهرت الممرضة لتدس في كفي ورقة وقلم:

- خدي يا مدام أمضي الإقرار ده..

- وأمضيه أنا ليه؟ هو أنا اللي ب أولد؟

- لا ماهي الوالدة خلاص..

- يا لهوي.. ماتت؟

- لا لسة.. هي اتبنجت بس

وقعت الإقرار وجلست انتظر وأنا أغالب النوم.. وفجأة قمت مذعورة لأجد قطة تقفز فوقتي؛ فأطلقت صرخة مدوية؛ وإذا بي أحمل على ترولي يدفعه تمرجي ضخم الجثة نحو كشك الولادة..

صرخت محاولة القفز من فوق الترولي:

- إيه يا بغل أنت! موديني فين.؟!

رد البغل:

- اهدي يا ست.. ربنا هيجيب لك ساعة سهلة أن شاء الله..

- أنت يا بني آدم.. أنا مش باولد.. أنت بتعمل إيه.؟!

- هما قالولي أن فيه حالة ولادة برة وما فيش برة غيرك  
وكنتي بتصوتي ببقي أنتي أكيد الحالة.. اسكتي بقا وخلينا  
نشوف شغلنا..

- يادي الليلة الهباب.. يا سيدي عليا الطلاق ما أناااا..

- هو أنتي ها تعرفي اكثر من الدكتور! أنا عبد المأمور يا  
ست ما تاذيينيش..

أنقذتني الممرضة التي ظهرت ناهرة إياه:

- حالة الولادة في أوضة العمليات يا مسطول..

قفزت أرضا محاولة تمالك أعصابي؛ وبعد نصف ساعة فتح  
باب غرفة العمليات لتطل منه تومرجية سائلة:

- مين اللي مع "سلوى"؟

سألته بلهفة:

- أنا اللي معاها.. طمنييني هي ولدت؟
- أه ولدت بالسلامة وعايزين هدوم العيلة..
- رددت متلعثمة:

- هدوم! بس أنا مش معايا هدوم..
- يعني إيه؟ أحطلك المولودة في قرطاس؟
- ثم أردفت بخبث:

- هاتي الشال الحلو اللي عليكي.. ده البت ها تموت م البرد..
- وجذبت الشال من على كتفي بعنف ودخلت؛ وبعد هنيهة
- خرجت بملاءة ملفوفة في يدها وقالت بابتسامه لزجة:
- سمي يا حبيبتي.. ألف مبروك تتربي في عزكم..

- سميت بالله وأخذت اللفة من يدها.. وفجأة غامت الدنيا وقل
- الأوكسجين فرفعت راسي لأجد خمسة عشر زوجا من العيون
- يحملقون بي هاتفين في نفس واحد:
- عايزين الحلاوة..

استأذنت إحداهن أن تمسك اللفة على ما اطلع الفلوس قالت لي:  
 - لا يا حبيبي خليها معاكي هاتي الشنطة واحنا ها نتصرف  
 وفي تلك اللحظة شعرت بحركة غريبة في اللفة التي أحملها  
 وصدر منها صوتا رفيعا كالمواء ثم قفزت في وجهي قطة بلدي  
 لا باس بها وتعاليت صرخاتي المذعورة ووجدتني أحدث نفسي  
 غير مصدقة..

- يا حزن الحزن.. ما داهية لتكون دعوة السواق تحققت  
 ومن لطف ربنا بينا جابت قطة بدل قرد بصديري..

صرخت في التومرجية:

- إيه دي؟

ردت مقهقهه:

- ينيلك يا "بوسي" .. مش ها تبطلي الحركات دي؟

- "بوسي" مين يا ولية أنتي؟ فين المولودة؟

- "بوسي" القطة.. دي متربية عندنا في أوضة العمليات من

أيام المرحومة أمها مشمشة.. ودايما تستخي في أي لفة

هيء.. هيء.. هيء..

- هيء.. هيء.. هيء..؟! إنتي بتضحكي..؟! المولودة..؟ انطقي..

نظرت إليّ نظرة مش ولا بد وهي تقول:

- مالك يا أختي مشمرة بوقك علينا كدة ليه..؟! ها

نجيها لك.. إحنا ها ناكلها..؟

ثم أخذت تنادي:

- يا أم رaaaaاامي.. إدلعي يا أم رaaaaاامي.. بصيلنا في كومة

الملايات اللي عندك دي شوفي كدة فيها عيلة صغيرة..؟

جاءت أم "رامي" حاملة مولودة صغيرة ولفاها في قطعة ملاءة

وقالت للتومرجية:

- خدي.. نفضت الكومة اللي جوا وقعت منها دي.. هي دي

اللي بتدوري عليها..؟

وجذبت البننت من يدها وأنا أصرخ بهم ودموعي تسيل:

- يا عالم يا مفترية انتوا ما عندكوش رحمة..؟ منكم لله يا بعدا..

واحتضنت المسكينة التي بعثرت كرامتها في أول ساعة لها في

الدنيا.. ودقائق وجاءتني نفس المرأة:

- إنتي يا مدام.. عايزين هدوم الست اللي جوا أحسن دي  
نشفت م البرد..

وقعت في حيص بيص.. اجبلها إيه؟ ما صدقت أتصرف في  
حاجة للبنت..

(مش ملاحظين حاجة؟ البننت طالعالى ملفوفة بملاية ولا  
أجدع فتاة ليل.. أمال فين الشال.؟)

وقطع تفكيري صوت التومرجية:

- يا مدام اتصرفي.. الست ها يجيلها حمي النفاس..  
أقولك؟ هاتي العباية اللي عليكي دي إنتي مش لابسة  
حاجة تحتها؟

- لابسة تريننج بس..

- خلاص يختي كفاية اللي بتقولي عليه ده..

وجذبت العباية من فوقى وتركتني ارتجف كالفأر المبلول.. وعدت  
احتضن الرضيعة حتى هلت عليّ الممرضة الأولى وهي تشخط:

- تعالي شيلى الوالدة نوديهها أوضتها أحسن الترولي اتكسر..

حملت بها:

- نعم؟ أنا اللي ها شيل معاكم؟  
 - أمال نعمل لك إيه يعني؟ خلاص إنتي حرة.. خلمها جوة بقا لغاية ما تفوق وتقوم تروح أوضتها..

وقفت شاعرة بحالة من الإعياء وهنا سمعت صوت أذان الفجر فانفجرت الدموع من عيني ووجدتني ابتهل إلى الله أن ينتهي هذا الكابوس على خير..

وكان السماء استجابت لي عندما وجدت زوج "سلوى" قادمة تجاهي بلهفة ويبدو أنها اتصلت به قبلي.. وعندما اقترب نظر لي في استغراب شديد:

فتذكرت أنني أقف بالمنامة ك القرا قوز..

سلمته ابنته دون أن أنبس بحرف ثم أشرت إلى غرفة العمليات.. وجررت قدمي خارجة من هذا الجحيم..

وعلى بُعد رأيت التومرجية مغادرة وهي تتبختر بعباءتي وشالي ولم يكن بي قوة للحاق بها فوجدتني أضحك بمرارة..

ألقيت بجسدي في أول سيارة أجرة متحملة نظرات السائق المرتابة.. وأخيراً وصلت البناية وأنا أشكر الله أن زوجي غير موجود..

فتحت الباب وأنا في حالة يرثي لها مبتلة حتى النخاع وبملايس  
البيت وحالتي كرب.. وإذا بزوجي في وجهي..  
أظلمت الدنيا في عيني وآخر ما سمعته قبل أن أسقط أرضا  
صوته الغاضب وهو يقول:

- حمدالله ع السلامة يا حلوة يا بلحة يا مقمعة..

تمت..



# دنيا الميكروباص..

ارتفع صوت سائق الميكروباص في الموقف مناديا:

- اثنين معصرة.. معصرة حلوان معصرة..

راكبة سمينة:

- المعصرة يا أسطى أن شاء الله؟

السائق يقيس أبعادها بعينيه:

- أيوه يا أبله اركبي.. خلاص يا جدعان كده نتكل على الله

بالمشيئة؟

الراكبة السمينة:

- لسه ناقص نفر جنبي هنا يا أسطى..

أجابها السائق:

- لا ما هو إنتي ها تدفعي نفرين ولا مؤاخذة؟

- نعممممم.. ليه بقا إن شاء الله! فيردة ولا فيردة؟

- لا يا أبله مش فيردة.. بس أنا ذنبي إيه أفضل طول اليوم

واقف وغيرى عمل دورين ثلاثة وأنا مستني نفر يرضى

يقعد على حجرك ولا مؤاخذة..

- ما الدنيا واسعة جني أهي.. شوفلنا نفر سوفيف حبتين  
يقعد ونساع بعض وخلص.. وأهي كلها ربع ساعة  
ونوصل..

رد عليها السائق بغيظ:

- يا أبلة دي الحطة اللي باقية منك سايعة أكرة الباب  
بالعافية.. دي مصيبة إيه دي.. والله بقا مش عاجبك  
انزلي شوفيلك طفطف اركبيه ورحرحي فيه براحتك..  
خلصينا بقا عايزين نشوف أكل عيشنا..

تكلم كل الركاب في صوت واحد:

- خلاص بقا يا مدام اتأخرنا على أشغالنا.. خلاص يا أسطى  
هنقسم أجرة النفر اللي ناقص علينا كلنا اتكل على الله  
بقا ربنا يستر طريقك..

بعد تحرك الميكروباص صاح بنا السائق:

- الأجرة أن شاء الله ثلاثة جنيه يا إخواننا.. نص الخط آخر  
الخط كله زى بعضه.. استبيننا؟

راكب 1: ليه كده يا أسطى ما أنا راكها امبارح باتنين جنيه؟



- رجليني والكرسي يا أبله.. إنتي ما بتعرفيش تقري ولا إيه؟  
مش شايفة كتابلك إيه ع الظهر؟ ما تسندنيش مش  
طالباي خالص..

الراكبة بتعجب:

- ومين قال إني ساندته؟! أنا مش لاقيه حتة تاني أحط فيها  
رجلي..

رد ببرود:

- مش مشكلتي بلا قافية أنا لسه مجدد الكراسي ودافع فيها  
دم قلبي.. شيلي رجلك يا عروسة..  
- الله.. أما أنت غريب أوى.. أودها فين يعني؟  
- وأنا مالي.. إنشالله تسيبها ف بيتكم..

راكب عجوز يلتقط نفسه بصعوبة وهو يحاول فتح النافذة  
التي بجواره:

- ما تشيلي رجلك يا بنتي وخلي المشوار ده يعدي.. حرام  
عليكم روعي ها تطلع من الحر.. يا أسطى.. هو الشباك  
اللي جنبي ده ما بيتفتحش؟

## السائق بغضب:

- إيدك والشباك يا بابا.. بالراحة عليه.. الإزاز يطق وساعتها  
مش هقولك ها اعمل إيه؟
- يا بني أنا عندي القلب والخنقة دي ها تموتني.. يعني الإزاز  
ولا روح بني ادم؟
- لا الإزاز طبعاً.. ده مكلفني 400 جنيه إنما أنت لو فيصت  
لا مؤاخذة هيبقى قضاء وقدر مش هادفع فيك شلن..  
وبعدين الأعمار بيد الله يا والدي أنت مش مؤمن ولا إيه؟  
انزل بقا من على وداني ما تبقاش نداب زي مراتي..
- خاف الرجل وصمت وهو يتمم بالشهادتين؛ والأنسة التي لم  
تجد مكانا تضع فيه قدمها جلست القرفصاء على مقعدها  
وسلم الجميع أمرهم إلى الله تفاديا للسان ذلك السائق الوقح..
- خيم الصمت على السيارة وإذا بمطبخ محترم يأكله السائق..  
فارتطمت رؤوس الجميع بالسقف ووجد كل منهم نفسه  
جالسا مكان الآخر.. في حين ارتفع صوت امرأة في المقعد الأخير  
تصرخ بألم:
- الحقني يا عبده.. الحقني يا عبده..

هب عبده في السائف قائلا:

- أنت يا جدع أنت مش تفتح لمطباتك وتمشى على مهلك؟  
المدام حامل في التاسع حرام عليك..

السائق بوقاحة:

- ربنا ينتعمالك بالسلامة يا حضرة.. اصطربر عليا بس لما  
نعدى على أي قهوة انزل أجبلها شوية مية سخنة.. حاضر  
هههههههه..

الراكب يشتاط غضبا:

- ما تتلم يا جدع أنت هو أنا أجمت أما قولتك سوق على  
مهلك؟ مش أرواح دي ومسئولة منك.؟!

فرمل السائق بغيظ فرملة أعادت المدام للشهر التالت  
وأعادت كل راكب مكانه الأصلي.. ونزل ليشد عبده من ياقته  
وزوجته تتعلق بذراعه مواصلة الصراخ..

السائق والشرر يتطاير من عينيه:

- بلا أرواح بلا أشباح يا عمونا.. اسحب ولا مؤاخذة المدام  
والعيل وخدلها أوبر يوصلها لغاية كشك الولادة.. وما

تنساناش في السبوع.. ياللا يا حلو الملامح ياللا يا ختي ربنا  
يجبلك ساعة سهلة بعيد عن عربيتشى.. هو أنا  
اصطبحت بوش مين النهاردة يلعن.. يحرق.....

والتفت للركاب صائحا بلهجة أجمتهم:

- هاااه حد تاني عايزنى أولده قبل ما نطلع؟

شفتت راكبة حامل بطنها من الخوف وانكتم الباقين مؤثرين  
السلامة.. وواصل البلطجي الطريق وهو يبرطم:

- بتتنكوا كده على نيلة إيه؟ دول تلاته جنيه عمي جاتكوا  
البلاوي ف أيامكم.. هو إيه يا أخويا ده؟ إيه اللي عايز  
يفتح الشباك؛ واللي عايزة تدلدل رجلها؛ واللي جاي يولد  
مرآته.. دي مصيبة إيه دي؟ مش كفاية بقالي نص ساعة  
ماشى ولا حد قالي على جنب يا أسطى ولا نزلني يا أسطى  
كله متبت في الكرسي زى ما يكون في قايمة أمه يا خي  
أسفوخس على دي زباين..

ولاحت من بعيد ملامح لجنة واقفة على الطريق فظهر التوتر  
على وجه السائق الذي التفت بسرعة إلى الوراء وسأل  
السيدة الجالسة خلفه بصوت خفيض:

- بقولك إيه يا أبله.. الواد اللي على حجرك ده لسه صغير وطبعاً مش ناوية تخاويه دلوقتي؟ كوتيكوتيكوتي يختي كميل عين امه..

حملقت به المرأة في بله غير فاهمة وهو يداعب الولد بيد ويقود السيارة ببطء بيده الأخرى.. وفجأة حملق بها وسألها:

- ما ألقاش معاكي حباية من بتوع تنظيم الأسرة ولا مؤاخذة؟ اتسعت عينا المرأة وردت مذهولة:

- أنت اتجننت يا جدع أنت؟ إيه قلة الأدب دي؟ السائق بتوتر بالغ:

- إخلصي ما فيش وقت.. إحنا داخلين ع الظابط.. معاكي ولا مش معاكي؟

ومدت المرأة يدها المرتعشة إلى حقيبتها وأخرجت شريطاً به عدة أقراص وهي تكاد يغشى عليها من الخوف والخجل..

ابتلع السائق أحد الأقراص بسرعة ثم أتبع ذلك بخطف البرونة من فم ابنها ونزع الغطاء وأفرغها في فمه وسط ذهول الجميع ثم أعادها للرضيع المفحوم من البكاء وهو يقول:

- معلش يا حمادة.. بوق صغير لعمور بنا مايرميك في لجنة..  
 غاص الركاب في مقاعدهم خوفا ظنا منهم أن السائق فقد  
 عقله وأصيب بلوثة مفاجئة.. وما كاد يهدئ من سرعة السيارة  
 المقتربة من اللجنة حتى قفز الجميع هربا..  
 ودخل السائق على اللجنة فنظر الضابط إلى وجهه وعيناه  
 الزائغتين ثم أعطى له كوبا بلاستيكيًا صغيرًا خاصًا بتحليل  
 المخدرات أمره بقرف:

- خد يا ااض هات عينة بول في الكباية دي..  
 السائق باستعباط:

- ولا مؤاخذة يا باشا أنا لسه فاكك ميه تحت الكوبري اللي  
 فات ده ومش هالاقى ولا نقطة ولا مؤاخذة..  
 الضابط وهو ممسكا به من قفاه ورجه بعنف:

- خلص بروح أمك رج نفسك لغاية ما تلاقى يا حبيبي..  
 ومن كثرة رج الضابط قشط السائق اللبن الذي طفحه من  
 الولد الصغير وعندها فهم الضابط الحيلة المتعارف عليها بين

السائقين.. ابتسم الضابط ابتسامة ذات مغزى وسأله  
ساخرا:

- وجيبت منين حبوب منع الحمل يا خفيف؟ من أمك ولا إيه؟  
قديمة الحركة دي.. اللي قالك إن أقراص منع الحمل مع اللبن  
بتفسد اختبار المخدرات ما قالكش أنك لازم تستمر أسبوعين  
يا برنس؟ ياللا يا ااض فوت قدامي ده أنت هتتنفخ لحد لما  
أولدك حتى لو واخذ حبوب منع الحمل..

تمت..



# جارتى السلفنجية..

(الجارة السلفنجية) أي التي تتبع السلف في كل أمور حياتها..  
لا لا تسينوا فهمي.. أقصد أنها تستلف كل حاجة من جارتها  
وبصورة مبالغاً فيها إلى درجة أنها قد تستلف منك زوجك  
ليذهب معها فرح بنت خالتها كي لا تعود ليلا وحدها.. فزوجها  
مسافر والجيران لبعضها..

مدام "سوسن" انتقلت إلى مسكننا جديدا وهي فرحة  
ومستبشرة خيرا؛ ولم تكن المسكينة تعلم بأن لها جارة حلقت  
في سماء السلف حتى بلغت الأفاق..

وتبدأ الحكاية منذ اليوم الأول لـ "سوسن" في العمارة..

ويبدأ المشهد كالتالي:

"سوسن" لابنتها:

- شوفي مين ع الباب يا نور..

- حاضريا ماما.. تعالي يا ماما كلمي..

حدقت الأم في تلك المقروضة الواقفة بالباب وعيناها  
الصغيرتان تجولان بأرجاء الشقة في تبجح..

سألتهما "سوسن":

- أيوه يا حبيبي إنتي مين؟
- أنا "نوسة" يا طنط بنت أم "نوسة" اللي ساكنين فوقيكم..
- اااااه.. أهلا يا حبيبي.. أي خدمة؟
- ماما بتسلم على حضرتك وبتقولك نورتي العمارة..
- شكرا يا حبيبي.. اشكريلي ماما كثير..
- وحاولت إنهاء المقابلة بسرعة فورائها كم هائل من أعمال  
فرش الشقة وخلافه.. ولكنها كانت واهمة..
- فقد عاجلتها "نوسة" قائلة:
- ماما بتقول لحضرتك أي كراتين تفضي من حاجتك  
الجديدة يا ريت ما ترميهاش عشان بنحتاجها..
- حملقت في وجه الفتاة متعجبة وقالت:
- نعم؟!!
- زى ما حضرتك سمعتي يا طنط..
- قالت ذلك وجرت صاعدة لأمها..
- وقفت "سوسن" متعجبة من تلك الجرأة الغريبة ثم دخلت تكمل  
فرش الشقة وهي تنوي إعطائهم الكراتين وهي تقول لنفسها:



- وأنا يعني هاعمل بيها إيه يعني!.
- دقائق ودق جرس الباب فتحت لتجد نفس الفتاة..
- ماما بتقول لحضرتك فيه في حاجتك حاجات بتتكسر؟!.
- ردت "سوسن" بذهول:
- نعم!!
- يعني لو فيه حاجات بتتكسر أكيد حضرتك ناقلاها في وسط البتاع البلاستيك اللي بيفرقع ده.. هو صحيح اسمه إيه يا طنط.؟
- "سوسن" بنفاذ صبر:
- ماله يعني.؟
- ماما بتقول لحضرتك حوشهولها عشان بتحب تتسلى بيه وتطلع فيه غيظها من بابا..
- ماشى.. حاجة تاني..
- مش عارفة.. هبقى أسأل ماما..
- ضربت "سوسن" كفا بكف متممة:
- ده باينه هيبقى مرار طافح والبداية ما تطمنش..

ومر اليوم بسلام وانتهت من فرش الشقة بالكامل.. وبعد يومين إذا  
بجرس الباب يدق فتحت لتجد البنت إياها فحدثت نفسها بغل:

- هو فيه إيه يا إخواننا.. هي العمارة ما فيهاش إلا المزغودة  
دي وأمها ولا إيه؟
- صباح الخير يا طنط..
- صباح النور يا روح طنط..
- ماما بتسال هو حضرتك بترجى من الشغل إمتى؟
- ليه يا حبيبة طانتك؟!
- عشان لو عوزنا حاجة ما ننزلش ع الفاضي  
"سوسن" بغيظ:

- هو إنتي يا ماما ما بتروحيش مدرسة؟
  - لا بأروح يا طنط بس بعد الظهر..
- تنفست المرأة الصعداء وهي تحمد الله.. فهذا الشكل ستكون  
الأوردرات في فترة النهار فقط وهي في العمل إذن فالخطر زال  
أو اقتصر على أيام العطلات الرسمية فقط..
- عاجلتها "نوسة" وكأنها قرأت أفكارها:

- أما نعوز حاجة بعد الضهر أخويا هينزل لحضرتك عشان هو مدرسته الصبح..

"سوسن" بذهول: "يا واقعة سودة! دول عاملين شيفتات!!"  
وهذه كانت البداية واستمر الحال على هذا المنوال.. البنت صباحا والولد ظهراً حتى تسربت نصف أشياء "سوسن" إلى شقة جارتها العلوية..

والغريب في الأمر أنها إلى الآن لم تر هذا الكائن الخرافي..  
(أهمهم).. إلى أن قررت سؤال البنت أثناء ممارسة إحدى مهامها السلفية عندها:

- قوليلي يا "نوسة"..

البنت باستظراف:

- يا "نوسة".. هاهاهاها..

(يا تلامة أمك)

- حبيبتي هي ماما مش بتظهر خالص ليه؟ هي هتظهر في آخر حلقة؟ هاهاهاها.. (ظرف بظرف بقا)

- لا يا طانط أصل ماما مسافرة بقالها أسبوعين في البلد
- عشان تيته ماتت.. يا حبيبتى يا تيته.. إهىء. إهىء. إهىء..
- وانطلقت في نوبة من البكاء والعيول و"سوسن" تنظر لها في ذهول:
- مسافرة؟ وأمها ماتت؟ يا لهوى! آمال لو هنا كانت عملت إيه؟

أكملت البننت:

- هي بتقولنا في التليفون نطلب إيه على ما تيجى..
  - يا ختبيبي.. على الله ما تيجى..
  - إيه؟ بتقولي حاجة يا طانط؟
  - لا أبدا يا حبيبتى.. باقول تجيلكم بالسلامة..
- وأخيرا جاء ذلك اليوم وقابلت "سوسن" المسكينة تلك الشخصية الأسطورية.. كانت يومها عائدة من عملها عندما وجدتها تنتظرها أمام باب الشقة.. عرفتها على الفور فسيماهم على وجوههم..

منحتها ابتسامة لزجة ذكرتها بالمقروصة بنتها "نوسة" ثم سألتها بعشم زائد:



من الشغل قولت اخش أجيها بنفسى ما هو الواحد لازم  
يبقى حسيس برضه..

\*\*\*

ومرت الأيام على هذا الحال.. فتارة تستلف طقم أكواب عصير  
للضيوف، وتارة طقم انتريه؛ وتارة طقم أسنان والديتها تأكل  
به لأنها خالعة ضرسها..

كل هذا و"سوسن" صابرة محتسبة وتحمد ربها أن زوجها  
مسافراً في عمله ولا أحرقها هي وأم "نوسة" و"نوسة"..  
إلى أن كان يوم أغبرا دق فيه جرس الباب..

فتحت "سوسن" الباب لتجد باباً آخرأ على هيئة شحط يقف  
متثائباً فاغراً فاه مثل فرس النهر.. نظرت له بذعر وسألته  
بصوت مرتعش:

- أفندم.. عايز مين حضرتك؟

وقبل أن يرد الرجل ردت أم "نوسة" من أعلى السلم:

- معلش يا ست أم نور هنتقل عليكي شوية.. أصل ولاد  
عمى طبوا عليا من البلد.. وأنتى عارفة شقتى صغيرة

والسرايرع القد.. قولت بدل ما استلف سرير من عندك  
وفك وتركيب أبعثلك واحد منهم يبات عندك وخلص..

وهنا لم تتمالك "سوسن" أعصابها أكثر من ذلك وصرخت بها  
وهي تحاول دفع البغل الذي يهم بالدخول لينام..

- إنتي اتجننت يا ولية إنتي؟! إنتي عايزة تجيبلى مصيبة؟  
مش عارفة أن جوزي مسافر! راجل إيه اللي هيبات  
عندي ده؟

- والنبي يا أختي ما هتحمسي بيه ده نفسه هادى وسنه  
ضاحك..

قال لها الرجل وهو ينحما عن الباب ويتثاب:

- طب وسعيلى كدة يا أبله عشان أخش أنام وابقوا  
إتخانقوا براحتكم بعدين.. حكم أنا صاحي م الفجر..

وعاد ليتثاب فاغرا فمه عن آخره مذكرا إياها بالجحش  
المفطوم جديد..

جن جنون "سوسن" وصرخت به وبها مهددة إياهما بالاتصال  
بالنجدة فردت أم "نوسة" باستنكار:

- خلاص.. خلاص اطلع يا "فوزي" هنتصرف.. ده إيه الجيران السوو دي؟ هو الدنيا ما فيهاش خير؟

صفقت "سوسن" الباب خلفه وهي تكاد تجن من تلك الوقاحة والصفاقة التي لم تر مثلها في حياتها؛ وهمت بالذهاب لفراشها عندما سمعت جرس الباب ففتحت بعنف عازمة على ارتكاب جناية في هذا البغل اللزج؛ وإذا بها تجد فتاتين واقفتين تبتسمان في سماجة..

همت بسؤالهما عن كينونتتهما وإذا بصوت أم زفته من أعلى:

- دول "سلوى" و"ليلي" ولاد "فوزي".. أظن دي بقا ما فيهاش حاجة لما يباتوا عندك.. أديني فكيتلك الراجل ببنتين حسب الشرع..

انهارت "سوسن" جالسة على الأرض والدموع تكاد تطفر من عينها وهي تتضرع إلى الله..

- لله الأمر من قبل ومن بعد.. صبرني يا رب..

أدخلت الفتاتين غرفتها لينا ما مواسية نفسها بأنها ليلة سوداء وسوف تمر..

نامت هي في غرفة الأولاد واستيقظت مبكرا لتسمع صوت  
ضوضاء في المطبخ ونظرت لتجد "سلوى" تخرج كيس لحم من  
الفریزر لتسلقه كي تظط به..

لم تعلق فهي لم تعد تتعجب من أي شيء يصدر عن تلك  
العائلة الشيطانية.. سألتها عن أختها "ليلی" فأجابت:

- أنا سايباها من ساعة بتقيس في هدومك جوا..

دخلت لتجد غرفتها رأسا على عقب؛ ومن وسط الحطام  
لاحظت مهرجاً من مهرجي السيرك قابعا أمام المرأة..

دقت النظر لتجدها "ليلی" وهي ترتدى فستان زفافها القديم  
وتضع على وجهها كافة المساحيق الموضوعة على التسريحة..  
صرخت بعلو صوتها:

- إيه اللي إنتي عاملاه في الأوضة وف وشك ده؟ مالك ومال  
حاجتي؟ اسمعى يا بلوة الزمان إنتي.. أنا نازلة الشغل مش  
عايزة آجي ألاتي حد هنا.. فاهمة؟ وإلاها روح فيكم في  
مصيبة من أولكم لأخركم وخصوصاً زعيمتمك اللي فوق  
دي.. اتفضلي نضفى الزريبة دي..

ردت البننت بكل بجاجة:

- "سلوى" تطلع إنما أنا هنام شوية.. طول الليل بقيس في هدومك وما نمتش..

ذهبت "سوسن" للعمل وهي تستشيط غضبا وغيظا وتهب صارخة في وجه كل من يقابلها.. وعند الظهر أحست بالقلق وبالفأر يلعب في عيها فقررت الرجوع لمنزلها كي ترى ما يحدث في غيابها..

فتحت الباب ببطء وما أن خطت بداخل الشقة حتى صك سمعها صوت ضحكات عالية؛ وصوت قهقهة زوجها..

هرولت إلى الداخل لتجده في المطبخ منشكحاً على آخره وهو منسجم في الحديث المرح مع مقصوفة الرقبة "ليلى"..

ارتفع صوتها مولولة لاعنة اليوم الذي انتقلت فيه إلى هذا المنزل الملعون؛ وما أن لمحها زوجها حتى نظر إليها مبتسما وقائلا:

- إنتي جيتي يا روعي؟ أنا قولت أعملك مفاجأة وأحي على غفلة.. ظريفة أوى ضيفتك دي..

صرخت "سوسن" في وجهه جاذبة إياه من ياقة قميصه وهي تقول:





# مدرس خصوصي..

معاناة كل بيت مع دخول الدراسة هي الدروس الخصوصية..  
فلا يوجد بيت تقريبا يخلو من تلميذ أو أكثر في أي مرحلة من  
مراحل التعليم المختلفة؛ ومع اختفاء فكرة الشرح في المدارس  
برزت تلك المشكلة..

وها هي أم تحاور ابنتها التي تصر على المدرس الخصوصي وهي  
مازالت في الصف الأول الإعدادي:

- ماما.. ماما.. ماما..
- ابييييه.. في إيه يا بنتي؟
- أنا أخذت الشهادة النهاردة..
- طب إيه الهليلة دي؟ فرحانة أوى كدة ليه؟ إنتي جبتي  
الشهادة؟ ولا نولتي الشهادة؟

وتناولت الأم الشهادة من يد ابنتها وما أن وقع نظرها على  
الدرجات حتى خبطت بيدها على صدرها وصاحت بالبنت:

- يا نهارك مدوحس.. 8 من 20 في الإنجليزي؟! بس شاطرة  
كل ما اطلب منك حاجة تقوليلى !.sorry!

ردت البنت:

- أديكي قلتي بنفسك أهو.. يعني أنا لبلب في الإنجليزي  
عشان تصدقي إن المدرسين مستقصديني..
- مستقصدينيك؟ كل سنة المدرسين مستقصدينيك؟ ده  
إنتي لو عليكي تارلهم ما تجيبيلش الدرجات دي.. منك لله  
على طول منكدة عليا كدة..
- يوووه بقا يا ماما ما قلتلك ميت مرة عايزة آخذ درس زي  
أصحابي كلهم بياخدوا عند مدرس الفصل وبيديهم  
الدرجات النهائية كل شهر.. إشمعني أنا بقا.. الله..
- الله يسخطك عرسة يا بعيدة.. درس إيه اللي هتاخديه؟  
مش كفاية مصاريف المدرسة الخاصة اللي قاطمة  
وسطنا؟
- خلاص بقا ما تبقيش تزعلي لما أجيب ملحق إنجليزي..  
وأعطتها المزغودة ظهرها ودخلت إلى غرفتها وهي تبرطم بكلمات  
غير مفهومة..
- ظلت الأم تغالب مشاعر الغيظ وحاولت الثبات على رأيها  
ورفض المدرس الخصوصي إلى أن أقنعها زملائها في العمل  
أنه لا نجاح لطالب في تلك الأيام السوداء إلا بالدروس  
الخصوصية؛ فقررت الامتثال للأمر الواقع وعادت إلى

منزلها ومن ثم نادت على ابنتها التي مازالت مادة بوزها  
غضبا من أمها..

- تعالي يا نور.. قوليلي بقا نظام الدرس ده إيه؟

تهلل وجه الفتاة من السعادة ويكأن أمها بشرتها بعريس كامل  
من مجاميعه واحتضنت أمها قائلة:

- بجد والنبي يا ماما وافقتي؟ طب بصي يا ستي أنا أصحابي  
كلهم بياخدوا عند مستر "عماد" في البيت..

- لا يا حبيبتي ما فيش حاجة اسمها عند المستر في البيت  
ولا في حاجة اسمها مستر من أصله.. شوفيلك ميس تديكي  
الدرس..

- بس يا ماما مدرس الفصل مستر.. كدة هيستقصدني  
زيادة وأنا مالي بقا.. إهىء. إهىء. إهىء..

- خلاص اتسدي أنا موافقة.. بس يجي يديكي هنا إنتي  
وزمايلك وعوضي على الله في كراسي السفارة..

وفي اليوم التالي عادت نور من المدرسة وهي تزف لأمها بشرى  
موافقة المستر على انضمامها لمجموعته؛ ولكن بعد الموافقة  
على شروطه.. فصاحت بها الأم:

- شروط إيه يا بنتي.؟ هو أنا طالبة إيدته.؟
- هو نظامه كدة يا ماما أنا مالي بقا..
- قولي يا نن عين ماما إيه شروطه.؟
- بيقولك يا ماما الدرس هيبقى بعد المدرسة على طول؛ ولو حضرتك لسة ما رجعتيش من الشغل تبقى تعمليله نسخة من مفتاح الشقة عشان هو بيخرج قبلنا ومش معقول هيستنى في الشارع..
- يا صلاة الزين. يا صلاة الزين.. وما طلبش يا حبيبي نكتبه نص الشقة بالمرة.؟
- لا يا ماما ده والله مستر "عماد" طيب أوى عشان كدة قالي لو ماما ما عجبهاش الوقت ده ما فيش بقا غير مجموعة بالليل..
- امممممم.. ودي بقا بالليل الساعة كام.؟
- الساعة 12..
- نعم نعم!. 12 نص الليل.؟ ليه يا بنتي هو مدرس ولا مسجراتي.؟!
- لا يا ماما أصله بيدي كذا مجموعة طول اليوم ومش فاضي غير في الوقتين دول.. حضرتك اختاري بقا بس لو اختارتي مجموعة بالليل في الحالة دي هتعملى نسخة كمان من مفتاح العمارة أحسن بيحي يلاقي البواب نايم..

- لا يا حبيبتي وعلى إيه؟ خليه ييجي بعد المدرسة على طول وأنا هبقى استأذن ساعة من الشغل يوم الدرس وأمرى لله..

مريومان وحن اليوم الموعود المحدد لأول حصة؛ وعادت الأم من عملها مبكرا حسب الاتفاق وما أن اقتربت من العمارة حتى راعها مشهد تجمهر عدد من الناس أمام البوابة وقفز قلبها من مكانه وهرولت إلى البواب تسأله عما يحدث:

- عم "أحمد" فيه إيه؟ حريقة دي؟ ولا العمارة جايلها إزالة؟ إيه اللمة دي كلها؟

رد عم "أحمد":

- لا يا مدام دول مستنيين حضرتك..

- مستنيين حضرتي؟!!

اقتربت من الجمع ببطء وفجأة سمعت صوت ابنتها ينادى بجذل:

- ماما.. يا ماما..

التفتت لتجد البنت تتقافز وسط ما يزيد عن خمسة عشر بنتا وبجانهم رجل ينظر في ساعته متمللا..

نادتها أمها فجاءت مهرولة وصاحت:

- إنتي جيتي يا ماما؟ حمدالله ع السلامة.. ياللا بقا نطلع  
عشان المستر مستعجل عنده مجموعات تانية..

فغرت الأم فاها وسألت ابنتها في ذهول:

- يا ليلة سودة.. مين دول يا بت.؟

- إيه يا ماما؟ دول زمايلي بتوع الدرس وده المستر "عماد"..

ثم سحبتها من يدها وهي مازالت فاغرة فاها على أخره وهي تتخيل 15  
بنت وابنتها والمدرس منتشرين في شقتها الساعة الثانية ظهرا وهي وراءها  
طنا من الأعمال عليها تأديتها قبل عودة زوجها من عمله..

وصلا إلى المجموعة وما أن رآها المستر حتى صاح بها:

- كنتي فين يا مدام؟

قالت الأم بينها وبين نفسها في تعجب:

- ينيلك ده أنا جوزي ما بيقولها ليش

أكمل الرجل بقرف:

- مش معقولة كدة عطلتونا.. ما قولتلكم تعملولي مفتاح.. هو أنتم أحسن  
من مين يعني؟ أهو شوفي حضرتك كل أولياء الأمور عاملين لي مفاتيح..



تركتهم الأم ودخلت إلى المطبخ لإعداد طعام الغذاء قبل مجيء زوجها  
مؤسية نفسها بأنها ساعة وتعدى ولا حول ولا قوة إلا بالله..

جاءها صوت ابنتها هامسا من خلفها:

- ماما.. ماما..
- في إيه يا بنتي..؟ سايبة الدرس وجاية ليه..؟
- المسترعايز كوباية شاي تعدل دماغه..
- ماشى روجي إنتي وأنا هاعملها..
- طب باقولك إيه.. ما تجيبي ساندويتش أنا جعانة أوي..
- مش عارفة تصبري لغاية ما تخلصي الدرس..؟ يا بت
- الوقت بيجري وده ظابط الساعة من قبل ما يطلع..
- الله بقا أنا جعانة أوي..
- خلاص اتسدي.. خدي عضي في الساندويتش على ما أعمل الشاي..
- تناولت البنت كوب الشاي وخرجت تتلمظ بباقي الساندويتش  
وما هي إلا ثوان حتى عادت لأمها هامسة:
- ماما "رضوى" كمان جعانة وعايزة ساندويتش
- يا بنتي هتفتحي عليا فتحة كدة.. يعني هتعملى لرضوى  
بس..؟! وزمايلها لا..؟

- معلش يا ماما أصل إحنا طالعين من المدرسة جعانين..  
 رق قلب الأم لهن وأخرجت أرغفة الفينو من الثلاجة وأعدت  
 لهن جميعا وجبة صغيرة تصبرهن حتى يعدن إلى منازلهن..  
 ومرت دقائق لم تسمع فيها صوت المستر أو البنات.. ومرة ثالثة  
 عادت البنات:

- ماما.. ماما.. المستر بيقولك الجبنة الرومي دي مش بطارخ  
 ما تجيبيش منها ثاني.. ولو فيه جبنة براميلي اعمليله  
 رغيفين وقطعيله خيارتين..

ردت الأم بغيظ:

- شوفتي يا مقصوفة الرقبة أنتي.. مش قلتلك هتفتحي عليا  
 فتحة!! اخفى من وشى بقا خليني أحضر الغدا لأبوكي  
 أحسن قرب ييجي..

- وانهمكت في تحضير الغداء وهي تكاد تتميز غيظا من هذه الواقعة  
 السوداء.. قاربت على الانتهاء وحان وقت طشة الملوخية..

ارتفعت صيحات الاستحسان قادمة من الصالة فابتسمت في  
 رضا.. يبدو أن هذا الرجل رغم بروده إلا أنه متمكنا من مادته  
 فالبنات معجبات بشرحه..

ولم تكن تعلم أن تلك الصبغات كانت إعجابا برائحة الملوخية التي جرت ريقهم وسرعان ما أدركت ذلك حينما وجدت ابنتها في قفاها وهي تقول في تردد:

- ماما.. المستر عايز شوية ملوخية صغيرين عشان ريحتها جت في مناخيره وجرت ريقه..

صرخت بها الأم وهي تمسك بتلابيبها بعد أن فرغ صبرها:

- الله يقطعك إنتي والمستر بتاعك في ليلة واحدة هو إيه؟  
عنده دودة ف بطنه؟ يا بت ده من ساعة ما جه بياكل  
أمال هيشرح امتي؟

- يوه يا ماما ما تكسفينيش معاه بقا يقول علينا إيه؟ بخلا  
يعني؟

- لا يا حبيبتي ما يصحش ودي تيجي؟ لا بخلا إزاي؟ هاتيه  
يا حبيبتي لما أفرشله في الثلجة يقيل شوية..

وهكذا جرت الملوخية البامية؛ ثم الأرز.. وملاً المستر والبنيات بطونهم والأم تقف بالمطبخ مستندة على الحائط وهي تشعر بثقل في اللسان وتنميل في ذراعها الأيسر وبدايات جلطة غير مستقرة..

دقيقتين وسمعت صوت المستر يقول:

- طب يا بنات أشوفكم الحصبة الجاية بقا..

ونادت ابنتها عليها لأن المستر يريدتها في كلمتين.. خرجت من المطبخ وهي تغالب رغبتها في اصطحاب يد الهون معها ودق رأسه وتحويلها إلى كفتة ولكنه عاجلها بابتسامة لزجة:

- متشكرين أوى يا مدام ع الغدا.. بس نصيحة من أخ يعني الملوخية الخضراء أفضل بكثير من المحفوظة دي وأصح كمان.. المهم.. إحم.. إحم.. إحنا ما اتفقناش.. عموما أنا باخد في الحصبة 50 جنيه.. باخد بالشهر وأجي المرة الجاية ألاقى نسخة من المفتاح.. مش هستنى في الشارع تاني ويمكن البنات يزيدوا اتنين تلاثة كمان عشان الامتحان قرب وباعمل مراجعات.. ياللا سلامو عليكمو..

نزل يجرو وراءه طابور البنات وحانت من المسكينة التفاتة إلى أرض المعركة فوجدت صالة بيتها قد تحولت إلى صالة سينما درجة ثالثة آخر الليل.. مقاعد السفرة مقلوبة..

قشرلب ومناديل ورق في الأرض..

أعقاب سجائر أطفالها "المخفي" بقدمه على السجاد.. بقايا طعام في كل مكان..





# سَخْل مدني..

البداية كانت خيراً ساراً.. أما النهاية فكانت خيبة أمل بسبب بلوى من بلاوي بلدنا التي أعاني ويعاني منها الجميع..  
 بشرى سارة لمدام "نادية".. فلقد جاءت تأشيرة لعمره رجب..  
 وبالفعل بدأت في تجهيز أوراقها وهي فرحة متحمسة أن منّ الله عليها أخيراً بزيارة الأراضي المقدسة..

وأولى الخطوات كانت تجديد جواز السفر الخاص بها.. وهذا الأمر يتطلب عدة إجراءات أولها استخراج شهادة ميلاد كمبيوتر؛ وقسيمة زواج كمبيوتر؛ وذلك أمراً يستدعى بالطبع زيارة السجل المدني.. وما أدراك ما السجل المدني..

وبالفعل أخذت مدام "نادية" إجازة يوم من عملها وانطلقت إلى السجل وكلها حماسة واستبشار..

وعندما وصلت إلى هناك لم تجد الباب.. نعم لم تجده.. وذلك من الأعداد الهائلة من البشر المكدمسين في انتظار فرصة للهجوم.. أقصد الدخول..

حاولت "نادية" مرارا وتكرارا اختراق تلك الكتل اللحمية وكانت في كل مرة تُقذف إلى الورا.. إلى أن كتب الله لها النجاة ووجدت نفسها بالداخل.. واستلزم ذاك فتح ثغرة في هذا

الجدار البشري لا تقل عن متر × متر ونصف؛ وهذا ما حدث عندما أتى رجلا ضخما واقتحم هذا الجمع وهي متمسكة بجلبابه.. وبتلك الحيلة استطاعت تخطى أول مرحلة.. وأصبحت الآن في أرض المعركة وبدا المشهد كالتالي..

المكان عبارة عن عدة نوافذ وكل نافذة يقف أمامها طابوران أحدهما للرجال والآخر للسيدات.. ولا يقل كل طابور عن خمسين فرداً بخلاف الملقى على الأرض ما بين قتيل وجريح جراء المصادمات في الطابور..

كانت مهمتها الأولى هي تحديد أي نافذة ستنضم إلى طابورها فتوجهت إلى الرجل الجالس على مكتب بجانب البوابة وهمت بسؤاله؛ ولكنه لم يعطها الفرصة وأشار لها تجاه إحدى النوافذ قائلاً بألية دون أن ينظر إليها:

- الأستاذ "مُيسر" ..

استبشرت خيرا بالاسم ولسان حالها يقول: يا مُيسر يا رب واتجهت إلى النافذة التي أشار لها الرجل مباشرة بحسن نية عندما أوقفها صوت زمجرة جماعية صادرة من الطابور.. التفتت لتجد تلك النظرات العدائية المرعبة تخترق جسدها..

الكل يراقبها بتحفظ وكل منهم واضع يده على جيبه في وضع استعداد لإبراز السلاح لو تقدمت خطوة أخرى..

لوحث لهم بمنديل ابيض وقالت:

- صلوا ع النبي كدة يا خوانا أنا هاسأل سؤال بس وأمشي..

تعالت أصوات الزمجرة مرة أخرى؛ وهنا سمعت صوت من خلف النافذة يصيح متسائلا:

- في إيه يا مدام.. معطلة الطابور ليه؟

- أبدأ أنا بأسأل على الأستاذ "ميسر"..

- أنا يا ستي "ميسر" خير إن شاء الله؟

- أنا بس عايضة أسأل على..

قاطعها الرجل مستنكرا:

- تسألني؟ كدهون بالبساطة دي؟ والناس اللي واقفة دي

إيه؟ قراطيس لب؟

- ياعم أنا عايضة اعرف بس أقف طابور قدام أنهو شباك؟

- هنا فيه نظام يا مدام.. اقفي في الطابور ولما توصلي

قدامي هنا أبقى اسألني براحتك..

حاولت أفهامه لكنها وجدت أيدي كثيرة تجذبها من قفاهما  
وتسلمها إلى أيادٍ أخرى حتى وجدت نفسها في آخر الطابور..  
ظلت واقفة بصمت يجمع ما بين الغيظ والتوجس وكادت  
الدموع تظفر من عينيها حينما شعرت بيد تربت على كتفها  
وسمعت صوت حنون يقول:

- تعالي اقفى جنبي هنا يا بنتي.. مالك بس زعلانة ليه.؟

التفتت نحو الصوت فوجدتها سيدة عجوز تبتسم لها  
ابتسامة ودودة ارتاحت لها وردت قائلة:

- ما إنتي شايقة يا أمي مش عارفة أسأل على حاجة وقدامي  
خمسين نفر على ما أوصل للشباك.. وممكن أوى ما  
يطلعش هو الي أنا عايزاه يعني عطلة وغيظ ع الفاضي..  
ضحكت المرأة قائلة:

- زهقتي بسرعة كدة.؟ إنتي عارفة أنا هنا من إمتي.؟

نظرت لها "نادية" بتساؤل فأكملت المرأة:

- أنا هنا من وأنا بنت بنوت..

ردت "نادية" بذهول:

- يا سنة سوخه يا أولاد..
- أيوه أمال إنتي فأكره إيه؟ أقل واحد واقف في أي طابور من اللي قدامك دول بقاله سنتين تلاتة.. إحنا هنا يا بنتي أسرة واحدة كلنا عارفين بعض.. عندك مثلا الشاب والشابة اللي واقفين هناك دول اتعرفوا على بعض في طابور تجديد بطاقة الرقم القومي؛ وحبوا بعض في طابور استلام البطاقة.. ودلوقتي متجوزين وجاين يقضوا شهر العسل في طابور استلام القسيمة بين أهلهم وناسهم.. ياسلااااام قصة حب جميلة..

حملت بها "نادية" غير مصدقة ثم سألتها بفضول:

- وإنتي هنا من أيام ما كنتي بنت بنوت إزاي بقااا؟
- لااااا أنا حكايتي حكاية.. أعرفك بنفسي؛ أنا اسمي "زينب" وأول مرة جيت هنا كان من تلاتين سنة؛ وكانت كل المنطقة دي غيطان.. جيت اطلع شهادة ميلاد إكمي ساقطة قيد وكان ساعتها الناس مش كتير زى دلوقتي.. بس الحق الموظفين هنا كانوا بيتصرفوا ويجيبوا ناس من ع القهوة يعملوا بيهم طواير..

ردت "نادية" بذهول:

- يا سلااااااااااا.. والله ما قصرنا.. وبعدين! كملى التاريخ كملى..
- بس يا بنتي.. قعدت الخمستاشر سنة الأولانيين أحاول أوصل للشباك عشان أسأل ع الشباك الخاص بشهادات الميلاد؛ وكل مرة على بال ما أوصل تكون الساعة بقت اتنين ويقولولي شطبنا.. أما العشر سنين اللي بعد كدة قضيتهم في الطابور قدام الشباك المختص؛ وكانوا أحلى سنين حياتي.. في الطابور ده عرفت أبو "نظام" جوزي وقضينا فترة خطوبتنا كلها في الطابور.. حتى ابني البكري "نظام" ولدته في الطابور وكان خلاص باقي لي نفرين وأوصل للشباك واضطريت ابدأ من أول وجديد بعد الأربعين.. هيببييح كانت أيام..
- طب كدة خمسة وعشرين سنة.. الخمس سنين الباقية بقا دول إيه؟
- هههههههههههههه.. ما أنا خلاص بقيت مدمنة طواير ما أقدرش أعيش من غيرها.. بقالي خمس سنين كل ما ألاقى نفسي مخنوقة أدور لي على طابور أقف فيه؛ ولما أفك شوية أروح.. حتى الواد "نظام" إبني عايز يتجوز في الشقة قولتله

خلاص يا ابني اقعد أنت وعروستك في الشقة وإن كان عليا  
 أشوفلي طابور أقف فيه اليومين اللي باقين لي في الدنيا..  
 ظلت "نادية" تنظر إلى "زينب" وهي لا تدري هل تضحك أم  
 تبكي.؟ وأفقت على وصولها أخيراً إلى الأستاذ "ميسر"؛ وهمت  
 بسؤاله ولكنها فوجئت به يغلق النافذة بكل برود قائلًا:

- الساعة 2 يا أستاذة.. خلاص شطبنا تعالي بكرة اسألني بس  
 من بدري عشان تلحقي الطابور من أوله..

نظرت للحاجة "زينب" فوجدتها تستعد للذهاب.. وشردت  
 متخيلة نفسها مثلها بعد خمسة عشر عاما في الطابور..

وفي صبيحة اليوم التالي توجهت إلى السجل وكلها أمل أن  
 تنجح مساعمتها تلك المرة؛ ولكنها فوجئت بالطابور نفسه..  
 والغريب أن المتراصين فيه هم أنفسهم من كانوا بالأمس  
 يتربصون بها..

وتكرر الموضوع بحذافيره ومحاولتها للوصول للأستاذ "ميسر"  
 ونفس صوت الزمجرة..

سألت عن الحاجة "زينب" فقيل لها أن اليوم هو الخميس

وهي معتادة على الوقوف بطواير مجمع التحرير في هذا اليوم لأنها تحب التغيير في الويك إند..

حاولت "نادية" السؤال خارج الطابور لكنها لم تفلح فأشار عليها أحد الواقفين أن تغمز فرد الأمن بقرشين وهو يدلها.. لكنها رفضت بكل إباء وشمم فكيف تدفع رشوة وهي التي تسعى للذهاب إلى زيارة بيت الله الحرام.؟!

- كلا البتة لن يكون.. لن يكون..

وعندما أشرفت الساعة على الثانية وهي مازالت واقفة مدت يدها في جيبيها وأخرجت عشرة جنمات وضعتها في يد الرجل فأشار لها على النافذة المطلوبة قائلاً:

- النهاردة جبرت خلاص تعالي بقا الأحد من بدري وارشقي قدام الشباك ده..

غادرت مدام "نادية" إلى منزلها وهي تكاد تطير من الفرح فالحلم اقترب تحقيقه..

وجاء اليوم الموعد وذهبت إلى السجل مبكرة جداً وتوجهت مباشرة إلى النافذة التي عليها العين والطلب..

وقفت في الطابور المخصص وكان أمامها حوالي خمسة وسبعين فرد فقط لا غير.. وبالطبع دقت الساعة الثانية ظهراً وكان بينها وبين تحقيق الحلم فردين فقط.. وغادرت وهي تبكي بكاءً مرأاً..

لن أطيل عليكم.. ظل الحال على ما هو عليه قرابة شهر حتى ضاعت عمرة رجب ورمضان وأوشكت أن يرفع عنها القلم ولم يكتب لها الله لقاء الموظف الأسطوري خلف النافذة المقدسة أبداً..

إلى أن من الله عليها ذات يوم مشرق ووصلت إلى الموظف والذي كانت عقدة سحنته تجهض الحامل في شهرها التاسع ونظر لها باشمئناط وقال:

- عايزين صورة البطاقة..
- موجودة..
- وشهادة الميلاد القديمة..
- موجودة..
- وست صور..
- موجودة..

انفجر الراجل بها:

- هو في إيه.؟! كله موجود. موجود.. اشتغل إزاي أنا دلوقتي.?  
 إنتي إيه.؟ عايزة تخلصي الموضوع من أول مرة ولا إيه.?  
 ردت "نادية" بغيظ:

- من أول مرة إيه بس.؟! حضرتك أنا بقالي شهرين رايحة  
 جاية على ما عرفت أوصلك..  
 - مالميش دعوة باللي فات أنا ليا شغلي أنا.. وريتي كدة  
 الصور الشخصية بتاعتك..  
 وفجأة أشرق وجهه وقال بانتصار:

- آها الصور يا أستاذة خلفيتها مش بيضا.. فوتي علينا بكرة  
 بست صور خلفيتهم بيضا..

ذهبت "نادية" وهي تنفث من منخارها نارا كالتنين ولكن ما  
 باليد حيلة.. يجب عليها الصمود فهي ليست أقل من أبطال  
 الطواير العظام أمثال الحاجة "زينب" والحاج عبده الذي  
 ضاع من عمره عشرون عاما كي يستخرج مستخرجا من  
 شهادة ميلاده إلى أن نصحه أولاد الحلال أن يكمل في الطواير  
 إلى أن يستخرج شهادة وفاته بالمرّة بدلا من الدوخة وقد كان..  
 هيببييح الله يرحمه..

المهم يا حضرات جهزت "نادية" الصور ذات الخلفية البيضاء  
 وذهبت للأستاذ المسؤول وكان يبدو حزينا وعلمت من زملاء  
 الطابور أن عمته توفاهما الله وأن نفسيته في الحضيض لأن  
 المرحومة توفت قبل أن تتم الثمانين..

وقفت في الطابور ثلاث ساعات أخرى إلى أن وصلت إليه  
 فألقى نظرة على الصور ثم هب من مقعده صارخا وهو يرغى  
 ويزيد متعجبا من الناس التي لم يعد عندها إحساس ولا  
 يقدرون أحزان الغير ولا يهمهم سوى مصالحهم الشخصية  
 فقط..

كل هذا وهي واقفة فاعرة فاها وتحديق به في ذهول؛ حتى  
 أنقذها عامل البوفيه من حيرتها واقترب منها حاملا الشاي -  
 لابن الكئيبة طبعاً - قفز في أذنها هامسا:

- ما هو إنتي ما لكيش حق برضه يا مدام.. الراجل عمته  
 لسه ميتة ما سبعتش وإنتي بتضحكي في الصور! ما  
 يصحش برضه..

نظرت للرجل بغيظ وهي تقاوم رغبتها في سكب كوب الشاي  
 الذي يحمله في قفاه وقالت:

- نعم ياخويا؟ ناقص تلبسوا الطابور كله اسود كمان..  
 باقولك إيه أنا خلاص بيني وبين الجنان شعرة.. والله لو  
 ما خلصت النهاردة لأكون جايا لكم بكرة لابسة كسرولة  
 في دماغي وأوريكم الجنان على أصوله..

ابتسم الرجل في برود وتنحى بها جانبا وهو مازال يهمس في خبث:

- اهدي بس يا مدام.. مقضية إن شاء الله والفلوس اللي  
 هتدفعها في الكسرولة إديها للأستاذ وتخلص المصلحة..

نظرت له باشمزاز ثم دست في يده ورقة نقدية فئة الخمسين  
 جنبها آمله من الله أن يغفر لها فهي مضطرة لذلك..

دخل الرجل وهمس بشيء في أذن المخفي الجالس خلف  
 النافذة يبرطم بكلام غير مفهوم؛ وما أن استلم المعلوم حتى  
 تبدل حاله من حال إلى حال؛ وأشرق وجهه من جديد ونسى  
 عمته ومن أنجبوا عمته؛ وبقدرة قادر بعد خمس دقائق كانت  
 أوراقها جاهزة وفي يدها..

وفي اليوم التالي توجهت إلى مجمع التحرير كي تستخرج جواز  
 السفر.. تذكرت أن اليوم هو الخميس عندما وقع نظرها على  
 الحاجة "زينب" واقفة في الطابور تقضي الويك إند..

وما أن رأتها "زينب" حتى أخذتها بالأحضان فوجدتها فرصة  
وسألتها بما أنها خيرة:

- هو أنني شباك بتاع تجديد الجوازات.؟!!

نظرت لها بشفقة وضحكت قائلة:

- اختاريلك أي طابور اقفي فيه..

"نادية" وهي مهتلة:

- ياااه.. ما شاء الله.. أي طابور؟ إيه التيسير ده؛ أهوكدة..

ضحكت الحاجة "زينب" وقالت:

- أي طابور يوصلك لحد تسأليه يا حبيبتى.. ربنا معاكي..

عموما الجو هنا هيعجبك أوى عن السجل.. المجمع شرح

وبرح ولسه لما ييجى الشتا الجو بيبقى دافي ع الآخر

والشمس ضاربة في الطواير لحد الساعة اتنين.. حاجة

كدة تخرج الرطوبة من الجسم..

نهايته.. يا سادة يا كرام مر على "نادية" الشتاء والربيع

والخريف وعمرة رجب وشعبان ورمضان والحج؛ واقتربت من

مقابلة وجه كريم؛ لم ولم تستلم جواز السفر بعد..

والأدهى من ذلك أن أعراض إدمان الطواوير بدأت تظهر عليها ولم تعد تطيق الوقوف وحدها في أي مكان حتى في المطبخ.. كانت ترص خلفها الأولاد وأبوهم في صف واحد منتظم حتى تشعر بالاطمئنان والألفة..

وأصبحت نزهتها المفضلة كل يوم خميس هي اصطحاب الأولاد والأكل والشرب والكورة وقضاء اليوم في المجمع.. وتعلم الأولاد مفردات جميلة مثل:

(فوت علينا بكرة - بالدور يا سيد - فتح مخك- أبرز تنجز) وغيرها من المعاني الجميلة..

وكانت النتيجة أن الولد الصغير عندما رسب في الشهادة الشهرية وخاف أن يوقعها منها وجدته يناولها الشهادة وتحتمها خمسة جنمات..

تمت..

# خبيرة أسرية..

لم يكفا عن الشجار منذ أن ارتبطا.. كانا يختلفان عن بعضهما البعض في كل التفاصيل والميول والهوايات..

هو يحب الموسيقى الصاخبة؛ وهي تهوى أغاني أم كلثوم الهادئة العميقة..

هو يحب متابعة مباريات كرة القدم؛ وهي تمقتها وتفضل عليها برامج الطبخ..

هو يحب الخروج والمشي؛ وهي بيتوتية جدا وقمة سعادتها في المكوث في المنزل بمفردها ممسكة بريموت التليفزيون الذي لم تلمسه منذ زواجهما..

حتى الشيء الوحيد الذي اتفقا على حبه كان مصدر خلاف بينهما وهو (صدر الفرخة).. الاثنان يحبانه ويكرهان الورك..

الخلاصة انهما عاشا في خلاف دائم على هذا النحو..

صاح "علي":

- صباح الخير يا "علية" حضريلي الفطار بسرعة عشان نازل الشغل..

ردت "علية":

- وهو أنا يعني اللي نازلة في ال sale.؟ مآنا نازلة الشغل أنا كمان ولسه ورايا ميت حاجة.. هاعملك ساندويتش جبنة بيضا عض فيه في السكة وخلص..
- إنتي عارفة إني ما بحبش الجبنة البيضاء وباحب الجبنة الرومي.. ما بتجيبش جبنة رومي ليه يا "علي"؟
- الجبنة الرومي عدت ال 100 جنيه يا "علي" يعني قربت من سعر اللحمه.. أجيب بقا جبنة رومي أعملها طاجن.؟  
ولا أعمل منها شوربة.؟ ولا أعمل عليها ملوخية.؟! ياللا يا "علي" انزل الشغل يا "علي".. أنا عندي الضغط عالي يا "علي".. أه.. وما تنساش تسيب خمسين جنيهه عشان رايحه لماما النهاردة وعايضة ادخل عليها بحاجة..

هب "علي" واقفا وصرخ بها:

- إيه.. خمسين إيه.؟ هو إنتي مش معاكي مصروف البيت ولسه مسمعاني طقطوقة على الجبنة الرومي.؟
- مصروف.؟ شيء لله يا سي مصروف ده بيخلص يوم 5 في الشهر؛ وبأكمل من مرتبي بقية الشهر.. ثم إني لسه جايبه لأملك صبغة لشعرها اللي زى ليفة المواعين.. وما

استخسرتش فيها.. إخص عليك يا "علي" إخص.. إهىء.  
إهىء. إهىء..

- يا "علية" أنا ما معيش غير فلوس مواصلاتي.. أجلي الزيارة  
دي لغاية ما نقبض بعد يومين.. ما حيكش يعني النهاردة..  
- لا حبك يا "علي".. أمي وحشتني يا "علي".. وهاروح ومش  
عايزة منك حاجة يا "علي".. بس إبقى عدى على أمك  
وهاتلي منها فلوس الصبغة ولا مؤاخذة بقا..

نزل "علي" وهو على وشك الانفجار من الغيظ؛ وركب  
الميكروباص وظل يفكر طوال الطريق في حل لتلك الخلافات  
التي لا تنتهي..

وصل للعمل وجلس ينجز عمله وهو شارد التفكير مكفهر  
الوجه حتى لاحظت مدام "نيلي" حالته فسألته باهتمام:

- مالك يا أستاذ "علي" النهاردة؟ شكلك متضايق ومتعكر..  
- أبدا يا مدام "نيلي" الأمر ما يخلاش وما حدش في الدنيا  
دي مرتاح..  
- طب فضفض واحكي لي.. إحنا زمايل واخوات وبنقعد مع  
بعض أكثر ما بنقعد في بيوتنا..



رد "علي" متعجبا:

- إيه؟ أنا سمعت عن خبيرة تغذية، خبيرة كمبيوتر، خبيرة مفرقات حتى.. لكن أول مرة اسمع عن خبيرة علاقات أسرية.. صحيح يا أولاد اللي يعيش ياما يشوف..
- يا أستاذ على إحنا دلوقتي في زمن العلم الحديث والعلم ما خلاش حاجة إلا لما درسها.. وطبعاً ما فيش أهم من علاقة الراجل بمراته عشان العلم يصلحها وبعدين يا سيدي ربنا قال: (واسألوا أهل الذكر أن كنتم لا تعلمون) صدق الله العظيم..

رد "علي" واضعا يده بخبث على كتف "نيلي":

- ونعم بالله يا ستي.. خلاص لوزاي ما بتقولي كده إيدي على كتفك..
- أزاحت "نيلي" يد "علي" من على كتفها بغيظ قائلة:

- لا.. إيدك على كتف مراتك يا سي "علي" وخدها وروح لدكتورة "نيرة".. بس احجز الأول بالتليفون خد الرقم أهو..

رجع "علي" إلى المنزل بعد انتهاء العمل فلم يجد "عليه" فتذكر إنها ذاهبة إلى أمها فشعر بارتياح وحرية ودخل المطبخ ليجده خاليا من أي طعام للغداء..

فتح الثلاجة ليجد ورقة بجوار علبة تونة مكتوب عليها بخط  
"علية" (غداك لغاية ما تجيب فلوس الصبغة من أمك)

صفق باب الثلاجة بعنف حانقا وجلس يفكر في أمر تلك المرأة  
التي لا تكف عن افتعال المشاكل.. هو يحبها ولا يستطيع  
الاستغناء عنها ولكنه يريد العيش في هدوء بدون خلافات  
يومية فما الحل؟!؟

وفجأة تذكر نصيحة "نيلي" ووضع يده في جيبه بحركة تلقائية  
وأخرج رقم تليفون خبيرة العلاقات الأسرية.. ولم لا؟!؟  
فليجرب لن يخسر شيئا وربما أصابت تلك الفكرة ولن يتكلف  
الأمر أكثر من ثمن الكشف.. فليس هناك مضاد حيوي ولا  
حقن تقوية ولا مرهم تسلخات..

وقام متحمسا ليمسك بسماعة الهاتف ويدير الرقم وسرعان  
ما رد عليه صوت أنثوي ناعم أنساه كل مشاكله الأسرية..

- هالو.. مع حضرتك عيادة دكتور "نيرة" خبيرة العلاقات  
الأسرية تحت أمرك يا فندم..

تاه "علي" للحظة عن الرد متذكرا صوت "علية" الذي يذكره  
ببائع العرقسوس.. وأفاق على الصوت الجميل وهو يسأل:

- هالو.. حضرتك معايا يا فندم!

رد "علي":

- معاكي يا أنسة.. كنت عايز أحجز كشف بس بعد يومين يا

ريت.. ممكن؟

- ممكن طبعا يا فندم تحت أمر حضرتك في أي وقت

حضرتك عايز كشف عادى ولا مستعجل؟

- باقول لحضرتك كمان يومين يبقى مستعجل إزاي؟!

- أيوه فاهمة يا فندم.. أنا اقصد يوم الكشف تحب تدخل

للدكتورة أول ما تيجى ولا تستني دورك؟ لأن الحضور

يبقى كثيف جداً.. يعني لو حضرتك حجزت كمان يومين

هتبقى رقم 24..

- يا سنة سوخه.. هي رجالة البلد كلها متخافه مع نسوانها ولا إيه؟!

رنت السكرتيرة ضحكة جعلته يلعن اليوم اللي شاف فيه

"عليه" والي جابوا "عليه" وردت بدلال:

- حضرتك ظريف أوى..

خارت أعصاب "علي" وتمنى لو يحجز مستعجل ويروح لوحده

بلا "عليه" بلا جزر..

"علي" متسائلا:

- هو الكشف العادي بكام؟ والمستعجل بكام؟

- حضرتك العادي ب 500 والمستعجل ب 800

على مكذبا ودانه:

- 500 إيه؟ 500 جنيه؟

- أيوه يا فندم والمستعجل ب 800 جنيه..

على صارخا:

- عارف انه ب 800 هباب.. ده سبب الخلاف كله 50 جنيه

أروح اكشف ب 500 روجي. روجي.. ربنا يصلح حالك..

وضع السماعه محدثا نفسه:

- يا ليلة سودة.. دي "علية" كلها على بعضها ما تجيبش 200

جنيه.. أصلح علاقتي بيها ب 800؟ يا أخي إنشالله ما

اتصلحت.. يخيبك يا مدام "نيلي" الولية دي اتهملت ولا إيه؟

دخل "علي" ليرتاح قليلا في غرفته وأفاق بعد ساعتين على

صوت "علية" وهي تضيء النور وتكركب في درج الكومود

بجانبه دون مراعاة لكونه نائما مما أثار غيظه وتذكر ملاحظتها  
على علبة التونة فهب جالسا في الفراش وصرخ بها:

- حمدالله ع السلامة يا هانم.. يا رب تكوني انبسطتي عند  
أمك وأولع أنا بجاز.. ده إنتي يا ولية لو سايبة دكربط في  
البيت كنتي بلتيله لقميتين عيش قبل ما تنزلي..

ردت "علية" ببرود:

- اتمسى يا "علي" وقول يا مسا.. ما أنا سيبالك علبة تونة  
في الثلاجة أعملك إيه أكثر من كده يعني.. وما جيبتش  
فلوس الصبغة من أمك ليه واتغديت بيها؟ أنا ماكانش  
معايا غير خمسين جنيه يا دوب أروح لأمي كنت عايزنى  
أطلبلك سيمون فيميه من باريس؟! أما عجائب والله..

رد "علي" وهو على وشك ارتكاب جريمة قتل:

- لا يختي كنتي اترزعتي ف بيتك شفتي طلبات جوزك  
وأجلتي زيارة أمك لبعد القبض هي أمك هتطير؟ دي وزنها  
150 كيلو يعني قاعدة وراسخة مش هتروح في حته..

"علية" محتقنة الوجه غيظا:

- لا اسم الله على أمك (ميس طنطا) وفاتنة السيد البدوي  
تلت سنين متتالية.. لايها يا "علي" بدل ما ودين النبي  
ألم هدومي وامشي.. أه أنا خلاص جيت أخرى من عيشتك  
النكد دي..

صاح "علي" وقد فلتت أعصابه:

- بالسلامة يا "علية" والقلب داعيلك وخذى الباب في إيدك  
يختي وإنتي ماشية..

جمعت "علية" ملابسها باكية ومبرطمة بكل نقيصة في "علي"  
وأم "علي" ورزعت الباب راجية من الله أن يريها في "علي" وأمه  
عجائب قدرته ولم تنس تهديده بالويل والثبور وعظائم الأمور  
لو ما جابش فلوس الصبغة من أمه..

ظل "علي" يومين في هدوء وراحة بال من المشاكل؛ وبعدما  
قبض الراتب وشعور السعادة المؤقت المصاحب له ارتاحت  
أعصابه وهدأت سريرته وشعر بشوق لعلية وقرر الذهاب  
لبيت والدتها ومصالحتها..

في تلك الأثناء كانت "علية" قد راجعت نفسها وأحست أنها  
بالغت في رد فعلها؛ وأنها قد تخسر زوجها الذي تحبه بسبب

خلافتهما المستمرة ونصحتها "لبنى" صديقتها الأنتيم باستشارة خبيرة علاقات أسرية ربما أفادتها بحل علمي ينقذ حياتها الزوجية؛ ورشحت لها دكتور "نيرة" ولكنها نبهتها إلى أنها تتقاضى كشفا باهظا قد يصل إلى 500 جنيه..

ذعرت "علية" في بادئ الأمر.. ولكنها بعد تفكير طويل أدركت أن استقرار حياتها مع "علي" يستحق أكثر من ذلك بكثير وقررت دخول جمعية مع زميلاتها دون علمه للحصول على مبلغ زيارة الخبيرة؛ وضغط النفقات المنزلية حتى تكون قيمة قسط الجمعية..

أما "علي" فكان يفكر نفس التفكير في أن حياته مع "علية" تستحق التضحية بهذا المبلغ وقرر ضغط نفقاته والإقلاع عن التدخين وتوفير ما يمكن توفيره هذا الشهر كي يذهب في آخر الشهر إلى دكتور "نيرة".. وقرر أيضاً أن يتفادى أي صدام مع "علية" إلى أن يحين ذلك الوقت..

تصالح "علي" و"علية" وعادا إلى المنزل وفي نية كل منهما تلاشي أي خلاف في بدايته؛ ولم يصرح كل طرف برغبته في استشارة خبيرة علاقات أسرية خوفا من سخرية الطرف الأخر..

ومرت الأيام في هدوء نسبي لا يخلو من بعض المناوشات البسيطة التي كانت تجهض في حينها؛ وكانت "عليّة" تقتصد في طهي الطعام وقللت من استخدام اللحم والدجاج إلى درجة لاحتظها "علي" وأسرها في نفسه مغتاظا منها محدثا نفسه:

- يعني أنا حرمت نفسي من السجاير والساندويتشات في الشغل والشاي والقهوة اللي كانوا بيعدلوا مزاجي عشان أنقذ حياتنا!! وإنتي يا "عليّة" عماله تقصصني من مصروف البيت عشان تحوشي على قلبك!! معلاش خليني كاتم لما أشوف اخترتها معاكي يا بنت حميدة..

أما "عليّة" فكانت تنظر بغل لـ "علي" وهو عائد من عمله خالي اليدين من الفاكهة التي يختص بها من ميزانية المنزل وهي تحدث نفسها:

- يعني أنا حارمة نفسي من الشيكولاتة والبيبسي والفظار مع زمايلي؛ والفراخ اللي باحبها وسيبت فلوس الصبغة لأمك عشان أنقذ حياتنا الزوجية.؟! وأنت عمال تحوش.؟ معلش خليني كاتمة أما أشوف اخترتها معاك يا ابن انشراح..

كان كل منهما يتعامل مع الآخر بطريقة ظاهرها الهدوء وباطنها الغيظ والغل إلى أن أوشك الشهر على الانتهاء وكل منهما قد كون مبلغ الزيارة وأسرع إلى الحجز تليفونيا دون علم الآخر.. وتصادف أن يكون الحجز في نفس اليوم وذهب كل منهما بمفرده متعللاً للآخر بالذهاب لزيارة أمه وكادت "عليه" أن تطلب من علي - بحكم العادة - إحضار فلوس الصبغة من أمه ولكنها آثرت السكوت حتى تتم استشارة الخبيرة أولاً..

وصل "علي" أولاً وكانت العيادة مكتظة بأزواج وزوجات تعلق وجوههم إمارات الغضب والقرف؛ وكل طرف يعطى ظهره للطرف الآخر.. وللمرة الأولى يدرك "علي" أن الاستشارة تحتاج لوجود الطرفين معا ولكنه لم يبال؛ وتوجه مباشرة لمكتب السكرتيرة التي كان جمالها وأناقته يبعث على الخلاف بين كل رجل مع امرأته أساساً..

وقف أمامها متمسرا ومقارنا تلك الغادة الهيفاء بـ "حوكشة" بتاع الكاوتش اللي متزوجها..

وبما إنه بالكاد كون مبلغ الكشف العادي فكان أمامه عدة حجوزات فاستغل ذلك الوقت بالثرثرة مع تلك الحسناء



تهمس له بانه من الأفضل ذهابه إلى مستشفى الكلب لأخذ  
المصل الواقي من السعار تجنباً لحدوث مضاعفات.. وهو ينظر  
إلى "علية" شذراً معتقداً أنها تراقبه منذ فترة لعدم ثقتهما به..  
وعندما هدأ الموقف قليلاً بدأ كل طرف يشرح لنيرة حقيقة  
الموقف؛ وعزز حجز كل منهما صدق أقواله؛ فنظر "علي"  
وعليه إلى بعضهما بحب واغرورقت عيناهما بالدموع وهنا  
تدخلت "نيرة" بكلمتين كي تحلل ثمن الكشف الذي لهفته  
مضاعفاً:

- شفتم بقا يا حضرات! سوء الظن بين الطرفين ممكن  
يوصلهم لإيه؟ عشان كده روشة علاجي ليكم حاولوا  
تثقوا في بعض أكثر وتفهموا بعض أكثر وإن شاء الله  
تطمنونى عليكم الجلسة الجاية.. سعيدة بلقائكم  
وهاستئذنكم عشان الكشف اللي بعدكم..

ردت "علية" بصوت رقيق وهي تنظر لـ "علي" بنعومة لم  
يعدها فيها:

- أنا باشكر حضرتك على استضافتنا في مكتبك وبعاتذر على  
سوء التفاهم والقلق اللي عملته.. ميرسي خالص لحضرتك..

ثم تذكرت الألف جنيه التي دفعها فاستدركت بلطف وهي  
تنظر بخجل لنيرة:

- طبعا إحنا هناخد الكشف واحنا خارجين لأننا اتصالحنا  
لوحدنا من غير خدمات حضرتك؟

ردت "نيرة" ببساطة:

- للأسف يا فندم الكشف لا يسترد تحت أي ظروف ودي  
لوايح العيادة.. حضرتك أخذتي مني استشارة علمية  
تفيدك في إصلاح حياتك الأسرية وأنا أدبت دوري بغض  
النظر عن أي سوء تفاهم حصل..

كشرت "علية" عن أنيابها متناسية تماما تلك اللهجة الرقيقة  
التي تحدثت بها ونظرت لنيرة نظرة جعلتها تنكمش في مقعدها  
ونطت على المكتب صارخة بها:

- استشارة! استشارة إيه يا أم استشارة؟ ده أنا لو كنت  
اشتكيته لخالته كانت قالتلي كلمتين أكثر من دول وببلاش..

ثم اختطففت فتاحة الأطراف من أمامها ولوحت بها في وجهها قائلة:

- إعلي بفلوس الكشفين بدل ما أشقك نصين بالطول..

مدت الدكتوراة "نيرة" يدين مرتعشتين وفتحت الدرج ثم أعطت النقود لعليه وهي ترتعد..

اختطفها "علية" من يدها وأعطتها بدلاً منها فتاحة الأظرف وخرجت متأبطة ذراع "علي" وابتسامتهما تعلق وجهيهما..

وفي الطريق إلى المنزل تعاتبا بود وحب ونظرت "علية" في عيني "علي" برقة هامسة:

- ليا طلب أخير يا "علي" عشان ما يبقاش في قلبي حاجة من ناحيتك..

رد "علي" بشوق:

- أوامرني يا حبيبتي..

قالت "علية" بحدة مفاجئة:

- تجبيلي فلوس الصبغة من أمك يا "علي"..

تمت..



# معاش مبكر..

"محمود" و"سناء" زوجان موظفان ولديهما ابن وابنة.. كانت الحياة مستقرة بهم بحلوها ومرها إلى أن حدث من الزوج ما لم يكن في الحسبان..

الزوج "محمود" كسول جدا مثل كثير من الأزواج المصريين.. نكدي جدا مثل كثير من الأزواج المصريين.. ولكن وجوده خارج المنزل طيلة اليوم كان يخفف كثيرا من عاداته السيئة..

إلى أن قرر البائس أن يقدم طلبا لإحالاته للمعاش المبكر بعدما سمع عن فتح الباب لذلك دون المساس بمستحقاته المالية وبمعاش كامل.. وطبعا كان يعلم أن "سناء" لن توافقه على قراره هذا أبداً..

لذا تكتم الأمر إلى أن تم كل شيء وخرج بالفعل معاش مبكر.. وفي صبيحة أول أيامه في المنزل بعد المعاش كان هذا المشهد..

"سناء": محموووود.. أنت يا محموووود.. قوم يا راجل الساعة بقت 7 هتتاخرج الشغل..

"محمود" متمللا في فراشه ومزمجرا:

- ايبيه فيه ايبيه؟ عايز أناام يا "سناء" الدنيا برد.. مش رايح أنا الشغل سيبيني بقا أتخمد..

"سنا" مبرطمة:

- مش رايح.؟! أهو أنت كده بيحي الشتا وتعيشلى في دور السلحفاة وتعمل بيات شتوي وأهو كله على دماغى.. قال على رأي المثل: تمشى لجوزك في جوازه ولا تشوفيه واخذ أجازة..

ونزلت "سنا" لعملها تاركة "محمود" راقداً في تحت البطاطين ومستمتعاً بالدفاء.. وعند الساعة الثالثة عادت "سنا" حاملة كل ما يلزم المنزل من أغراض لزوم طهي طعام الغداء.. فتحت الباب لاهثة بعد صعودها خمسة أدوار فوجدت أولادها أمام التلفاز.. سألت عن "محمود" فأشاروا لها في صمت إلى غرفة النوم.. توجهت للمطبخ وهي تتمتم:

- يالهورى عليك يا دي الراجل.. لسه راقد في السرير زى النفساء.. ياللا خليك نايم نوم الظالم عبادة لغاية ما أخلص طبيخ بدل ما تقوم تأكلني..

قطع تفكيرها صوت "محمود" المغشلق من أثر النوم:

- إنتي جيتي يا "سنا".؟ كويس.. أصلى جعان أوى عمليتي الغدا.؟  
- أعوذ بالله من الشيطان الرجيم خضضتني يا "محمود"  
فيه إيه.؟ أنا لسه داخلة ما لحقتش اعمل حاجة..

- طب أنا جعاناااااان. جعاناااااان.. أعمل إيه يعني؟ أكل بعضي؟

- خلاص. خلاص.. هاجيبلك حتتين كيك تتصبر بهم..

- أكلت الكيك اللي هنا الصبح..

- طب هافتحك علبة تونة..

- هما كانوا علبتين فطرت بهم الضهر..

"سنا" وقد بداة تتعصب:

- خلاص قوم عض في جوافتين ولا تفاحتين وانزل من على

وداني بقا خليني أشوف اللي ورايا..

- الفاكهة خلصت.. مآنا أصلى مزمت فيهم وأنا قاعد

باتفرج ع المسلسل..

خبطت "سنا" على صدرها وهبت فيه قائلة:

- بسم الله الحفيظ.. إنت إيه؟ أمك إتوحتت على جرادة

سوداني! أسيبك يوم في البيت تأتي ع الأخضر واليابس!

بركة أن العيال بخير ومش ناقصين حته.. آمال إيه جعان.

جعان وأنت مشطب على الخزين كله؟

"محمود" بغيظ:

- جرى إيه يا ولية! إنتي هتبصيلي في اللقمة ولا إيه! دي  
نيلة إيه دي.؟

انتهت "سنا" من طهى الغدا وتغدوا ودخل الأولاد لاستنكار  
دروسهم وجلست هي ومحمود أمام التلفاز..

وبالطبع ظل "محمود" متمسكا بال ريموت كما لو أنهم  
واخدين بعض عن حب؛ وهو صامتاً عاقداً الجبين كأى زوج  
مصري صميم حتى حان وقت النوم.. وحمدت "سنا" الله أن  
انتهى يوم الإجازة على خير..

وفي صبيحة اليوم التالي:

- محموووود.. قوم يا محموووود.. اصحى هتتاخر على  
الشغل..

- يا ولية يا قلق إنتي سيبينى أتخدم.. إنتي على طول قالقة  
منامي كده..

- يا راجل قوم إتحرر الساعة داخلة على تمانية.. إيه  
الكسل اللي أنت فيه ده..

- مش قايم يا "سنا" هه.. مش رايح الشغل يا "سنا"..  
ارتاحتي! سيبينى بقا وشوفي رايحة فين..

- لاء كده الحكاية فيها إنَّ وكأن وحيثما كمان.. إنت إيه حكايتك بالضبط..؟ عملت إيه في الشغل متداري منه في البيت يا فالج يا أخرة صبري..

- هاعمل إيه يعني يا ست يا خرفانة إنتي.. سيبيني أكمل نومي وروحي لحالك ياللا..

- أروح لحالي ده إيه..؟ والله ف سماه ما ها تحرك من مكاني إلا لما اعرف إيه اللي مقعدك في البيت زى أمي كده..

"محمود" وقد خرج عن شعوره:

- عايزة تعرفي قاعد ليه..؟ ماشى يا "سنا" ها قولك.. أنا عملت معاش مبكر وخلص قاعد في البيت على طول استريحتي..! ياللا بقا سيبيني أكمل نومي..

"سنا" بنفاز صبر:

- يا راجل هو ده وقت هزار..؟ ما تخلصني وتقول مالك..؟

رد "محمود" بغيظ:

- يا ولية أنا ما بهزرش.. باقولك سويت معاشي خلاص ومش رايح الشغل تاني..



- مش قايم يا "سنا" .. وإنتي ما كنتيش بتحلمى يا "سنا" ..  
وأنا فعلا سويت معاشي وقعدتلك زى الكبة يا "سنا"  
وريني هتعملى إيه بقا يا "سنا"؟

خبطت "سنا" على صدرها صارخة ومولولة:

- يالهورى.. ده أنا عمالة اكذب نفسي.. إنت اتجننت يا راجل  
عشان تعمل كده؟ بقا تسوى معاشك واحنا عيالنا لسه  
طلباتهم كتير والدنيا بقت مولعة نار! هو إحنا بنعرف نمشي  
بمرتبك عشان نمشي بمعاشك.. وبعدين أنت قعدت في  
البيت يوم نفضته آمال أما تقعد على طول هتعمل فيه  
ايبيه؟! أه يا ميلة بختك يا "سنا" يا بنت عيشة..

"محمود" ببرود:

- خلاص.. خلصتي وصلة الندب يا بنت عيشة؟ سيبنى  
أنام بقا..

ارتدت "سنا" ملابسها باكية وذهبت لعملها تجر أذيال  
الخيبة وهي غير مستوعبة بعد مغبة الأمور.. وظلت تتلقى  
كلمات العزاء في مصابها الأليم من زميلاتها طوال اليوم  
وعندما عادت إلى المنزل كان "محمود" ملتفأ في البطانية

وجالساً يضحك أمام مسرحية قديمة في التلفاز وفي حجره  
طبق لب وسوداني..

نظرت له في غيظ والشرر يتطاير من عينهما:

- ما شاء الله.. شكلك يفرح.. حلوة القعدة في الدفاع.. مش  
كده يا سبعي! أنا اتمرمط في المواصلات وأجي الاقيك آخر  
سلطنة.. عوض عليا عوض الصابرين يا رب..

"محمود" بلا مبالاة:

- حمدالله ع السلامة يختي.. خشي سخنيلى الغدا عايز اكل  
- وما قومتش سخنت وكلت ليه يا أخويا.. ولا تكونش  
الحركة مش كويسة ع اللي ف بطنك؟  
- واسخن لنفسى ليه؟ أمال إنتي وظيفتك إيه؟ ياللا بلاش غلبة  
هامووت من الجوع.. بقالي ساعة ما اكلتش وعمال أقرقز في  
اللب والسوداني زى نسناس الجنينة لما قولوني قام عليا..

دخلت "سنا" وهي تبرطم لتجهيز الغداء.. ومرت الأيام ولا  
جديد ومحمود طول اليوم راقدا في الفراش أو يتابع  
المسلسلات ويأكل حتى أصبح أشبه بالقط الرومي..

ومر شهر على هذا الحال وبدأ المملل يدب في سي "محمود"  
والفضا وحش كما تعلمون.. وهذا ما كان.. إلى أن استيقظت  
"سنا" صباح يوم جمعة على أشياء تقذف على وجهها  
وأصوات فرك وحرك في الغرفة..

فتحت عينيها لتجد بعض الملابس على وجهها وعندما أزاحتها  
فوجئت بزوجها معتلياً الدولار ولا أجدع شمبانزي قافش في  
شجرة وهو يقذف بالملابس من بلاكار الدولار على الفراش  
وعلى الأرض والغرفة تشبه سوق الكانتو..

قفزت واقفة على الأرض وهي تصبح به:

- اصطبحننا وصبح الملك لله.. بتعمل إيه يا "محمود"؟!

رد "محمود" من فوق الشجرة اقصد الدولار:

- باطلع الصيفي يا ست هانم ما إنتي نايمة في العسل  
وسايبه الدنيا بايظة..

- صيفي؟! صيفي إيه يا راجل أنت ده إحنا لسه في نص  
يناير.. عيب ع الكلسون اللي أنت لابسه تحت الهدوم  
والبطانية اللي ناقص تخش بيها الحمام.. هو أنت مش  
لاقيلى مصيبة تأنبني عليها؟



صرخت "سنا":

- فيه إيه يا بلاوي أنتي وهو.. أنا ناقصاكو انتوا كمان؟

أنت يا زفت يا "رامي" سيب أختك تذاكر ما تعاكسهاش

"ريم" هامسة بصوت مخنوق:

- مش "رامي" يا ماما ده بابا.. هو هيفضل قاعد في البيت

كده يرازي فينا..

- إنتي اتجننتي يا مقصوفة الرقبة! حد يقول على أبوه كده

ده بركة البيت..

- يا سلام يا ست ماما ما أنا سامعاكي امبارح بتقولي لخالتي

بالليل إنك مش هتقدرى تروحيلها عشان أبو شبت قاعد

يلف في البيت زى العقربة في موسم التزاوج.. وإنه طلع

معاش عشان يرازي فينا.. صحيح يا ماما هو يعني إيه

يرازي دي؟

- هس بس يا بنت اكنمي خالص وقوليلي عمك إيه أبوكي..

- يا ماما كل يوم يقعد يقلب في الكراسات ويقوللى تعالي

سمعيلى اللي خدتيه النهاردة.. أقوله بذاكر رياضة ويقوللى

لا تعالي سمعي إنجليزي.. وهو أصلا ما بيعرفش يقرا  
إنجليزي وبيضيع وقتي..

شخطت "سنا" في البننت وماهي إلا ثوان معدودة وسمعت  
"رامي" الصغير وهو يبكي بحرقه..

هرولت إليه فوجدت "محمود" يحاول إسكاته والولد على  
صرخة واحدة مما ذكرها بالمنصور الأهلل ابن عز الدين آيبك  
وكلمة واحدة على لسانه:

- ماليش دعوة.. أنا عايز الشيكولاتة يا ابويا.. إديني  
الشيكولاتة بتاعتي يا ابويا..

والرجل يحاول إسكاته دون جدوى..  
نظرت "سنا" لمحمود بغل وسألته:

- أنت خدت شكولاتة الواد يا راجل..؟ أنت إيه..؟! أطم  
يقولوا الولية اتجننت..

نظر لها "محمود" بخجل قائلا:

- ما هو إنتي اللي سيباني من غير فطار لغاية دلوقتي خليتي  
ابص للي ف إيد العيال..

ردت "سنا" وهي تجز على أسنانها:

- مش بازيل آثار العدوان اللي عملته الصبح في الأوضة  
ياخويا! افتح الثلاجة وأعملك ساندويتش على ما افضى..  
الدنيا مش هتتهدي يعني..

واستمر الحال على هذا المنوال.. وكل يوم "محمود" يخترع  
شيئا يتسلى به وينتهي بكارثة..

فيوما تعود من عملها لتجده يرسم على الجدران ويخبرها أن  
جلسته في البيت جعلته يكتشف في نفسه موهبه " الفن  
التشكيلي ولكنه لم يفسر لها ما علاقة الفن التشكيلي بانه  
يرسم سيخ شاورما على الحائط..

ومرة أخرى تفاجأ بالجارّة تنظر لها شذرا وتبرطم  
بكلمات غير مفهومة عن الرجال الذين كبروا  
وخرقوا ويقذفون الجارات بمشابك الغسيل وهن  
في البلكونات..

ومرة ثالثة تستيقظ مدعورة على صوت المكنسة الكهربائية  
وهي تولول شافطة شيئا غير مفهوم مع أصوات صراخ وشجار  
في البلكونة.. وعندما جرت لاستطلاع الأمر وجدت المشهد

التالي.. زوجها ممسكا بالمكنسة وخرطومها متدلي في بلكونة الجار في الأسفل؛ وهو شيخاً متصابياً..

نظرت فوجدت المكنسة شافطة باروكة الرجل وهو يرغى ويزيد والناس تقف في الشارع مقهقه على المشهد الكوميدي..

اعتذرت للرجل وسحبت زوجها والمكنسة ودخلوا تشيعهم اللعنات والضحكات.. وحاولت حتى خلصت الباروكة من المكنسة التي احترق موتورها..

كل هذا وزوجها ينظر خجلاً إلى الأرض وهي تنظر له عاجزة عن وصف سعادتها بمغامراته اليومية التي جعلتها تسير متخفية في الشارع من شدة الخجل..

"سنا" وقد نفذ صبرها:

- مالك ومال باروكة الراجل يا "محمود"؟ بتصطادها ليه بالمكنسة يا "محمود"؟ عايز واحدة قللي وأنا أجبلك يا محموووود..

"محمود" بخجل: باروكة إيه يا "سنا" اللي عايزها؟ إنتي هتعملى زى الراجل المخبول اللي بيزعقل بالانحوي ويقوللى يا



جاية ب 1500 جنيه.؟ ما هو سي الأستاذ بتاعك طول  
النهار موصل وصلة كهربيا للساير الي تحت بعد ما شالوا  
لصاحبه العداد عشان ما بيدفعش..

صرخت "سنا":

- بتوصل كهربيا للساير ليه يا "محمود".؟ يا دي الليلة  
الكحلي.. إحنا عارفين ندفع كهربيتنا.؟  
صمت "محمود" مطأطئاً رأسه وردت أم "أحمد" وهي تطرّع  
باللبانة:

- هو إنتي يختي ما تعرفيش إنه كل يوم بعد ما بتروحي  
الشغل بينزل الساير يلعب ببلاش لغاية العصر.؟ طب ده  
حتى اسم النبي حارسه وصاينه "أحمد" ابني بيقوللى أن  
سي الأستاذ لهلوبة في التيفا 2017 ومش مهنيه على دور..  
انتفض "محمود" مستنكرا وانبرى لتصحيح المعلومة هاتفا:

- اسمها الفيفا 2017 مش التيفا.. إيه الجهل ده.؟

لم تنطق الزوجة بكلمة بعد ما شعرت ببدايات ذبحة صدرية

وكل ما فعلته في اليوم التالي أن جمعت أولادها، وأم "أحمد" التي يقذفها بالمشابك، و"أحمد" اللي مش متنى على دور فيفا، ومحصل الكهرياء المبطوح، وعم شكشك الذي فقد باروكته وتقابلوا جميعا أمام الهيئة التي كان يعمل بها "محمود" عازمين على أن يقعوا في عرض رئيسها ويقبلوا يديه ورأسه ليقبل ظلهم الرسمي لعودته للعمل وإلغاء المعاش حرصا على الصالح العام..

-  
تمت..



# "ميادة" الكيادة..

اليوم وبمناسبة الفالنتاين أقدم لكم "ميادة" ..

"ميادة" شخصية متباهية بطبعها إلى أقصى حدود المباهاة والمبالغة؛ وتركز بالأكثر على كل ما ينقص زميلاتها من نواقص وتتلذذ بإشعارهن بنقصهن وميلة بختهن وتستمتع بنظرات الحسد في أعينهن الدامعة، ولذلك استحقت عن جدارة اللقب الذي أطلقته عليها (ميادة الكيادة) وتعالوا نشوف الحكاية..

"ميادة" تدخل غرفة المدرسات صباحا وهي في كامل زينتها وترتدى كل ما هو أحمر؛ وتبادر زميلاتها قائلة:

- صباح الحب يا بنات.. ويا ستات هابي فالنتاين داي..

رفعت كل واحدة رأسها عن كشاكيل التلامذة ونظرن لها باستغراب..

مس "سوسن":

- إيه اللي إنتي عاملاه في نفسك ده يا "ميادة"؟

"ميادة" بزهو:

- إنتي مش عارفة يا "سوسن" إن النهاردة عيد الحب ولا إيه؟ أووه باردون يا حبيبتى أنا ناسية أنك سينجل هتعرفى مينين؟ إنتي أخرك عيد الفطر وعيد الأضحى ههههههههه..

مدام "سميحة":

- لى نفسك يا "ميادة" ع الصبح.. وبعدين يختي هما المتجوزين عارفين الفالنتين بتاعك ده عشان السنجل يعرفوه؟ بلا وكسة يختي..

- أووه.. إيه ده؟ أفهم من كده إن جوزك ما جابلكيش حاجة يا "سميحة"؟ ولا حتى قالك هابي فالنتاين؟ مش معقوووول.. طب ده "حسن" جوزي بيقوللى هابي فالنتاين يا حياتي من أول امبارح.. هيببييح يا حبيبي يا "حسن" أد إيه رومانسي وكيوت..

"سميحة" بغیظ:

- لا إزاي ما جابلكيش حاجة؟ جابلي يا حبيبتى جابلي؟ جابلي سكر وضغط ومرارة..

- لا بجدي يا "سميحة" جوزك ما جابش هدية الفالنتاين؟

انفجرت "سميحة" في وجه "ميادة" قائلة بحنق:

- بت إنتي أنا مش ناقصاكي أنا شايلة المارارة ومش طايقة روجي.. قال هدية قال.. أنا أخر مرة سمعت كلمة هدية منه كان جابلي كيس مشابك عشان القديم اتقطع.. قولتله خد فلوسه معايا فكة قالي لا اعتبريه هدية.. ومن ساعتها كل أما تيجي مناسبة ويقوللي طبعا أنا جيبت هديتي ويغمز بعينه ناحية البلكونة وعليها بقالنا 6 سنين..

استمعت مدام "فايزة" لسميحة ثم ردت بدورها:

- وأنا بقا أخر هدية جهبالي جوزي كانت وأنا حامل في صفوت ابني اللي في الجيش دلوقتي.. ساعتها جابلي طرحة واتزنق في عيد الأم راح مديها لأمه ومن ساعتها ما شوفتش منه حاجة..

ثم انبرت مدام "سيده" قائلة:

- يا بختكم.. أنا أول وأخر هدية جهبالي جوزي كانت الشبكة وبيعبالي بعد شهرين..

نظرت لهم "ميادة" نظرة ظاهرها الشفقة وباطنها الشماتة وقالت بكل كبرياء:







ردت "سميحة" بفضول:

- يعني تفتكري يا "ميادة" لو عملت اللي بتقولي عليه ده جوزي هيعمل زي جوزك ويجيبلى هدايا بمناسبة ومن غير مناسبة؟

"ميادة" بزهو:

- آه طبعا.. وساعتها أبقى ادعيلي بقا.. باقولك إيه.. النهاردة الفالنتاين وفرصة توضي نفسك كده وتحضريله أمسية رومانسية.. وإنتي مروحة اشترى تورتاية وورد احمر كتير وشموع حمرا واعملى أي تغيير في شعرك وفي لبسك وإنتي هتشوفي منه اللي عمرك ما شوفتيه..

- لكن الحاجات دي تتكلف كتيرا "ميادة" واحنا ف نص الشهر وما فيش في البيت غير الفلوس اللي متشاله لأي ظروف..

- وهو فيه ظروف أحلي من دي يا عبيطة؟ خدي الفلوس منجى نفسك وهو لما يشوفك هينسى كل حاجة والفلوس تتعوض..

انصرف الجميع وظلت "سميحة" تجوب الشوارع وكلام "ميادة" يرن في أذنها وقررت إن تأخذ النقود واللي يحصل. يحصل.. وأكد زوجها لن يغضب بعد أن يعيش ليلة من ألف

ليلة وليلة وعلى غير توقع منه؛ فقد أخبرته في الصباح أنها ذاهبة للمبيت عند أمها..

عادت "سميحة" للمنزل وأخذت النقود من الدولار وذهبت للكوافير وضربت شعرها أحمر؛ ثم ذهبت للمول واشترت طاقم أحمر مرصع باللمبات الصغيرة التي تضيء وتطفئ بلا انقطاع ولم تستطع منع خيالها من السرحان في تأثير المفاجأة على "فوزي" جوزها.. لابد أنه سيجن فرحا ويأخذها لانتقاء هدية ذهبية على الأقل؛ فهي تعلم انه سيقبض اليوم مكافأة مالية.. ثم قطبت فجأة عندما تذكرت إن المكافأة سيسدد بها الإيجار المتأخر.. عموما لا داعي للهدية الأن يكفي أن ترى التغيير الذي سيطرأ على علاقتهما التي بدأت تفتري..

اشترت التورتة الحمراء والورد الأحمر والشمع الأحمر وسارعت بالعودة للمنزل لتجهيزه قبل حضور "فوزي"، ولم تنس بالطبع إرسال الأولاد عند جدتهم..

وصلت البيت قبل "فوزي" وأسرعت بتجهيز الشموع والورود والتورتة ع السفر؛ ثم ذهبت لغرفتها لإعداد نفسها لمقابلة زوجها الذي اقترب ميعاد وصوله..

فتح "فوزي" الباب بمفتاحه ودخل بخطوات متثاقلة وألقى بجسده المنهك على أقرب مقعد وجلس سائدا رأسه على يديه بادي الهم والإرهاق واخذ يحدث نفسه بحزن:

- الحمد لله إن العيال وأمهم مش هنا عشان ما حدش يشوفني بالمنظر ده.. لو "سميحة" هنا كان زمانها فتحالي محضر دلوقتي.. ولا بقا لو عرفت إني اتنشلت في الأتوبيس والمكافأة وبقية المرتب اتلطشوا منى كان زمانها شغلتي والمعددة اللي جواها؛ وتبقى ليلة سودا.. لا حول ولا قوة إلا بالله يعني يا ربي ما تجيش الطوبة غير في المعطوبة! أسدد الإيجار منين دلوقتي؟ ونكمل الشهر إزاي؟ يا ريت عزرائيل يبجي يقبض روحي وأخلص من الهم ده..

وفجأة انقطعت الكهرباء لهتف "فوزي" بضيق: هو يوم باين من أوله..

ساد الظلام إلا من ضوء احمر بعيد قادم من غرفة السفارة اللي كانت "سميحة" مختبئة بها ومولعة الشمع الأحمر ولا بسة الطقم الأحمر أبو لمبات وأول ما حست بـ "فوزي" فصلت الكهربيا حتى يكتمل الجو الرومانسي..



رفع "فوزي" كفيه عن وجهه ببطء ونظر إلى "سميحة" بذهول وهي ضاربة شعرها موزمبليه أحمر ناري ولا بسه الطقم أبو لمبات؛ وداهنه وشها فرشة كده وفرشة كده؛ وواقفة ملعلطة قدامه ولأول مرة يرى بعينه أم لطفي اللي بتقيد وتطفى..

"سميحة" بابتسامة عريضة:

- هاه إيه رأيك؟ أجنن مش كده؟

"فوزي" بذهول:

- إيه يا ولية اللي عاملاه في نفسك ده؟ قطعتي خلي الله لا يكسبك ولا يربحك يا بعيدة..

"سميحة" مولولة:

- يا حزن الحزن.. بقا ده كلام تقولهولى يا راجل في ليلة زى دي؟!؟!

- ليلة زى دي؟ دي ليلة سودة على دماغك ودماغي ياختي.. مالها الليلة دي يا خُلل؟!؟!

"سميحة" دامعة:





- معلش يا "سميحة" قدر الله وما شاء فعل والحمد لله إني  
سايب فلوس سترة هنا للمواقف الطارئة دي.. إلا هما فين  
صحيح؟ إنتي غيرتي مكانهم ولا إيه؟

تنتحت "سميحة" وبحلقت يمين وشمال باحثة عن مهرب من  
الإجابة ثم فتحت فمها لتخرج منه كلمات غير مترابطة:

- ما هو أصل الموزمبليه وال ال اللايت سيستم ونورته حمرا  
ووو.. و"حسن" جاب دبدوب لـ "ميادة" الكيادة.. ووو وأصل  
"ميادة" هي اللي قالتلي.. منك لله يا "ميادة" يا كياهه..

ظل "فوزي" ينظر لسميحة محاولا تجميع جملة مفيدة ولكن  
بلا جدوى..

- إنتي بتقولي إيه يا "سميحة"؟ أنا مش فاهم حاجة..  
"سميحة" باكية:

- م الأخر كده الفلوس انصرفت يا "فوزي" على حفلة الليلة  
اللي كنت عاملاها لك مفاجأة.. هه بس..

نظر لها "فوزي" غير مصدق ولم ينطق بحرف ثم خرج من  
المنزل صافقا الباب خلفه بغضب جنوني..

أما "سميحة" فلم تجد طريقة تهدئ بها من ضيقها وغيظها سوى الذهاب إلى "ميادة" ونقحها كلمتين في جناها على شورتها الطين اللي قلبت ليلتها غم.. وزمانها دلوقتي متمتعة بليلة فالنتاين فل وغرقانة في هدايا سي "حسن" .. لكن عظيم بيمين أبداً لازم ولا بد تنكد زى ما نكدت عليها..

وصلت "سميحة" للعمارة وصعدت للدور الرابع واقتربت من شقة "ميادة" لتفاجأ بوابل من السباب ينطلق من "خلف" الباب:

- إنتي يا ولية يا سو إنتي.. كل ده بتحضري العشا؟ ما تخلصي ف ليلتك السوداء دي عصافير بطني بتصوصو..

ثم صوت "ميادة":

- حححاضر يا سي "حسن" دقائق ويكون العشا جاهزيا خويا.. هدي أعصابك.. هابي فالنتاين..

- يا خي فالنطين على دماغك يا بعيدة.. فالنطين ده بتاع العيال التوتو مش للرجالة الخشنة اللي زي.. قال فالنطين قال.. هو فيه طين اكر من عيشتي معاكي؟ جاتك الهم..

دقت "سميحة" الجرس وانتظرت حتى فتحت لها "ميادة"  
 الكيادة بشعر منكوش وجلابية متشمرة وشبشب بوردة  
 وبالقرب منها كائن ذو كرش مدور وسحنة مقلوبة خمنت أنه  
 مستر "حسن" الكيوت أبو كلام يدوب الحجر..

ونظرت "ميادة" لسميحة بهلع وصمت قطعه صوت ابنتها  
 وهي تبكي وتمخط في كمها:

- ماما.. يا ماما.. مش لاقية الدبodob الأحمر بتاعي.. وأنا مالي  
 بقا أنا عايزاه..

ردت عليها "سميحة" وهي تغمز بشماته ميادة الكيادة:

- الدبodob ماما نسيته في المدرسة يا حبيبتي.. روجي خدي  
 غيره من دولاب الهدايا بتاع مامي..

ثم استدارت عائدة لمنزلها دون كلمة زائدة..

تمت،



# وفر وارتاح..

السيدة "فايزة" بلغت سن المعاش وظلت عامين ما بين مكاتب التأمينات حتى تستطيع قبض معاشها..

وأخيراً قبضت مكافأة نهاية الخدمة، ومقابل رصيد إجازاتها بالإضافة إلى حصيلة صندوق الهيئة؛ جمعت كل هذا ووضعت في دولاب ملابسها..

وبطبيعة الحال علم الجميع أنها أصبحت (مقرشة) وبطبيعة الحال الكل ضاربه السلك في أيامنا السوداء دي.. وبطبيعة الحال الكل طمعان وعشمان ومن اليوم الأول بدأت المحاولات لتقليبها في أي مبلغ..

الساعة 8 الصبح كانت "رضوى" ابنتها تدق جرس الباب..

- حاضر. حاضر أنا جاية اهو.. الصبر ياللي بتخبط.. الروماتيزم مكسحني.. يوه ما كفاية خبط جاك خابط في صرصور ودنك.. مين؟ "رضوى"؟ مالك يا بنتي؟ كفى الله الشر العيال بخير؟ والمخفي أبوهم مش زى القرد برضه؟! "رضوى" وهي تتشحتف:

- خيريا ماما.. ما فيش حاجة كلنا كويسين إهىء. إهىء. إهىء..

- ولما كلكم كويسين بتقوي ليه يا بنتي ع الصبح كده؟  
وجايالي من بدري وأنا من رمضان بتحايل عليكي تيجي  
وتجيبني العيال اللي وحشوني وإنتي تقولي مش فاضية..
- إهىء. إهىء. إهىء..
- يوه.. ما تنطقي يا بنتي مالك؟ إوعي يكون اللي ينطس ف  
حواجه ابن "نوال" مد إيده عليكي؟
- إهىء. إهىء.. لا يا ماما أبدا ده حتى "جمال" طيب وابن  
حلال مش عارفة إنتي ما بتحبهموش ليه.؟!

الأم وهي تمصمص شفايفها:

- ابن حلال؟ طيب ياختي ربنا يبنى سعيد بسعيدة بس  
برضه ما قولتيش فيه إيه مشحتفك كده.؟!
- العيال يا أمي.. العيال صعبانين عليا أوى..
- ليه يا بت مالهم العيال بعد الشر؟
- متهدلين في مدارس الحكومة يا أمي وأخلاقهم بقت زفت  
وهيضيعوا مني.. تتصوري الواد الكبير امبارح أقوله سيب  
الموبايل اللي لحس دماغك ده وخش ذاكر يقوم يقلى:  
"فوكك منى يا مزة وروحي شوفي جوزك اللي قاعد ع النت"

من امبارح.. خدي بالك منه ليكون لايف على حته سوري ومقرطسك" ..

- يالهوى.. حته سوري؟ ما داهية ليكون عملها المخفي ما هو طول عمره طفس وقال على رأى المثل: يا مصدقة إن جوزك مش بصباص.. اتوكسي ياختي ووسعي القرطاس..
- بصباص إيه؟ وقرطاس إيه يا ماما بس؟ هي يعني دي المشكلة؟ باقولك الواد بقا ولا سواقين التكاتك أمال في ثانوي هيعمل إيه؟ هيدخل عليا بإزاة بيرة؟ إهىء. إهىء. إهىء.. ولا مقصوفة الرقبة "جنى" اللي في تالته ابتدائي تتصوري ديك النهار انده عليها نص ساعة ما تردش وفي الأخر أدخل ألقمها مبحلقة في المراية وبتعمل حواجبها؟! - يا ندامتي! ده أنا ما عملتهمش إلا يوم دخلتي ع المرحوم أبوكي..
- المصيبة إني لما زعقتلها قالتلي: "هو حصل إيه يعني يا "رضوى" ده أنا بساويمهم بس تعالي. تعالي لما أظبطلك حواجبك اللي مغطين على عينيكي وعاملينك زى يوسف داوود" كده..
- خبر اسود ومنيل.. إنتي مدخلهم مدرسة ولا إصلاحية يا بنتي؟!!

- ما هو عشان كده جيتلك يا أمي تشوفيلي حل.. إنتي عارفة إن ليلي الصغيرة خلاص هقدملها في الصيف ومش عايزة أضيعها زى إختها وعايزة الحق "جنى" كمان واطلعها من المدرسة دي.. نفسي يا أمي أدخلهم مدرسة خاصة نضيفة.. يرضيكي ولاد بنتك يضيعوا ويبقوا عرة كده..؟ إهىء. إهىء. إهىء..

- لا طبعا ما يرضينيش.. بس أنا ف إيدي إيه يا بنتي.؟!  
- أنا باقول يعني لو ممكن تساعدني بمبلغ من فلوس المكافأة بتاعتك أقدملهم في مدرسة عدلة يبقى جميل مش هانسولك أبداً..

الأم وقد أدركت المغزى من الزيارة:

- وماله يا بنتي عدى عليا كمان يومين واللي فيه الخير يقدمه ربنا..

انصرفت "رضوى" مزقطة.. وبعد ساعة واحدة دق جرس الباب في هذه المرة كان "سمير" ابن الست "فايزة" والذي لم تره منذ ثلاثة أشهر بحجة انشغاله بالعمل..

"سمير" وهو يقبل يد أمه:

- إزيك يا ست الكل.. ليكي وحشة والله يا أمي..  
 - لا يا شيببيخ؟! ليا وحشة؟! أمال لو ماليش كنت عملت  
 إيه؟! ده أنا بقالي تلت شهور ما شوفتش وشك يا جاحد  
 إخص عليك يا "سمير" هانت عليك أمك يا واطي؟! إهىء.  
 إهىء. إهىء..

- مشاغل والله يا ست الكل..  
 - طب انت مشغول.. المعدولة مراتك ما تطلش عليا وتجبلي  
 الواد زيكا أشوفه؟! ده وحشني أوى يا بني وأنت عارف  
 الروماتيزم معجزنى مخليني لا عارفة أروح ولا أجي وأنت  
 واختك ساكتينلى في العلالى والسلالم حرمانى منكم..  
 - لا يا أمي خليكى مستريحة إنتي واحنا نجيلك على عينينا  
 إوعي تتعبي نفسك..

الأم بعتاب:

- بقا خايف على تعبي! ولا على تعب المحروسة مراتك لو  
 جيت قعدت عندكم شوية؟! قال على رأى المثل: قلبي على  
 ولدي خلاص هي موت وهو قلبه على نتاية عنكبوت.. إيه  
 مالك يا واد مسهم كده ليه؟! فيه حاجة مضايقاك?  
 - زيكا يا أمي.. زيكا..

- يا ندامتي ماله الواد يا "سمير"؟
- أبدأ يا ستي اللوز ميهلاه وميهلانا معاه كل يوم والتاني راقد لما وشه اتمقت وبقا قد مرتبي..
- يا ضنايا يا بني طب ما تشيلها له يا "سمير" وتخلص منها..
- ما المشكلة يا أمي إني روحت بيه مستشفى حكومي قالولي ما فيش سراير فاضية في أوضة العمليات لو عايز يبقى هنعملها له وهو واقف.. وكده هيبقى معرض واحدة من اللوزتين تقع في كعب رجله من جوا وساعتها هتبقى مشكلة كبيرة..
- يا خراب بيتي! تقع في كعب رجله؟! لا يا بني لا إوعي.. طب هو مش ليه تأمين صحي تبع مدرسته؟ ما توديه!
- وديته يا أمي سربوني وقالولي ما فيش داعي للعملية خليه فاتح بقه أسبوع هتنشف وتقع لوحدها..
- يوه جاتهم وكسة.. هي لوزه ولا سرتة؟! طب وبعدين يا بني هتعمل إيه؟
- ما هو أنا عشمي في ربنا ثم فيكي أنك تديني مبلغ كده من المكافأة أعملها له في مستشفى خاص..

الأم بلهفة:

- وماله يا حبيبي اللي تطلبه ربنا ينجيهولك يا بني..

وهكذا يا حضرات كانت الأم تعلم جيدا إن ما ذكر أبنائها بها هي الفلوس؛ ومع ذلك لم تكن تستطيع التأخر عنهم في شيء.. وزاد الأمر عن حده وزادت الحجج والأعذار وبدأت النقود في التناقص تدريجيا مما جعل الأم تشكو إلى جارتها المقربة وعشرة عمرها "توحيدة"..

"فايزة":

- بس يا ستي وأدى كل اللي حصل.. كل يوم والتاني حد فيهم يجيلي بحجة ويسحب شوية فلوس وأنا أخاف يزعلوا واديهم اللي هما بيطلبوه.. لكن بقعد أفكر لما فلوسي تخلص هاعمل إيه؟ لو تعبت ولا احتاجت علاج ولا مستشفى مين فيهم هيقف جنبي؟ ولا لو مت مين هيصرف على خرجتي؟ إهه.. إهه.. إهه..

"توحيدة":

- لا يا "فايزة" ياختي إنتي غلطانة المال السايب يعلم السرقة.. وإنتي غلطتي لما شيلتي فلوسك هنا في البيت وخلتها مطمع وإديكي سهلة تتمد عليهم كل شوية وخذ

من التل يختل يا حبيبي.. وبعدين عيالك مستسهلين  
 وإنتي بمساعدتك لهم على طول خليتهم ما يحاولوش  
 يحلوا مشاكلهم بنفسهم.. طب والنبي لما فلوسك تخلص  
 ما حد هيسأل عليكي.. اسمعى كلامي وشيلي فلوسك في  
 البوسطة.. ومنين ما حد يسألك قوليله أنا مش قادرة  
 أروح، أنا مش فاضية أروح، أصل البوسطة قافلة  
 النهاردة.. وشوية شوية هيزهقوا ويبطلوا طلبات..

- طب ما حدش فيهم يقدر يسحب من ورايا؟
- لا طبعا هي سايبة؟ ما حدش يقدر يسحب مليم إلا إنتي  
 بذات نفسيتك لو حتى انطبقت السماء الأرض.. حد يحط  
 في حسابك ماشى إنما ياخذ من حسابك لا ممكن أبدا..
- طب لو أنا احتاجت اسحب مبلغ اسحب بسهولة؟
- طبعا.. في ملح البصر تروحي تديهم بطاقتك ودفترك  
 وتاخدي اللي إنتي عايزاه وتنك راجعة، ده غير بقا الفوايد  
 اللي هتاخذها على المبلغ يعني راحة وتوفير وده شعارهم  
 هناك (وفر وارتاح)..

- وإنتي ياختي عرفتي الحاجات دي منين؟

- هو أنا ما قولتلكيش..؟! ده جوز بنتي "وهبه" شغال هناك  
ودايما يقلى إحنا رسالتنا يا نينة نريح الناس الكبيرة دي  
وواهيين نفسنا لتيسير أمورهم وكفاية علينا دعواتهم..
- ياختي يريح قلبه وقلبك قولي إنشالله.. خلاص على خيرة الله..  
شوفيلنا يوم نروح أنا وإنتي ونحط الباقي من الفلوس هناك..
- وبعد يومين ذهبت "توحيد" و"فايزة" إلى مكتب البريد وكان  
بالصدفة هو نفسه يوم صرف المعاش.. وما أن وصلتنا حتى  
هالهما مشهد الزحام الشديد والناس المسنة المنتظرين على  
المقاعد وعلى الأرض وعلى الحائط..
- خبطت "فايزة" على صدرها قائلة:

- يا حزن الحزن.. إيه ده يا "توحيد"؟!!
- اااااا.. أنا ناسية أنك أول شهر تقبضي فيه المعاش  
همهمهمهمه.. ما هو ده يا حبيبتي المنظر اللي هتشوفيه كل  
يوم خمسة في الشهر ولمدة خمس أيام.. مش المعاش من  
يوم خمسة ليوم عشرة؟
- يا وقعة سودة يعني كل شهر آجي اقبض يوم خمسة أروح  
يوم عشرة؟

جذبتها "توحيدة" من يدها قائلة:

- تعالي بس وأنا هاريحك..

ودخلوا مكتب صغير يجلس فيه أربعة موظفين يتناولون الشطائر ويحتسون الشاي والناس في الخارج تكاد تموت حرا.. وأمام أحدهم وقفت "توحيدة" فهب مرحبا:

- أهلا. أهلا. أهلا يا نينه.. البوسطة كلها نورت..

ردت "توحيدة":

- أهلنك يا "وهبه" دي الست "فايزة" اللي كلمتك عنها..

- أهلا وسهلا يا ست "فايزة" أنستي وشرفتي.. تفضلوا.

تفضلوا.. تشربوا إيه؟

"فايزة" وهي مستنكرة برود الموظفين واهملاهم للناس المساكين خارج المكتب:

- يا سيدي مش عايزين نشرب حاجة.. أنا عايزة افهم بس

هو المنظر اللي بره ده بيبقى كل شهر؟!!

"وهبه" بضحكة صفراوية:

- هههههههه.. يا ستى وإنتي مالك بالمنظر اللي بره ده خليكى  
معايا تكسيي.. دول ناس غاويين يعذبوا نفسهم.. إنما  
حضرتك باين عليكي ست متعلمة وكلك نظر..
- مش فاهمة يعني إيه.؟!
- يعني دول بيجوا وهما مش قادرين يتحركوا ويقفوا  
بالساعات وهما الروماتيزم واكل جتتهم عشان  
مستخسرين يدفعولهم أربعين خمسين جنيه كل شهر لى  
هيقبضهم في بيوتهم ويرجعوا يصوصوا ويقولوا تعبنا..
- يعني أنا ينفع القبض يجيلي البيت.؟!
- طبعا يا ست الكل.. كله هنا ينفع إحنا موجودين لراحة  
الجماهيرزى ما حضرتك شايفة..

ردت "نوحيده":

- شايفة ياخويا شايفة..
- ورشف "وهبه" رشفة من كوب الشاي وفجأة جحظت عيناه  
وأمسك برقبته وأخذ يسعل سعالا شديدا مع ارتفاع أصوات  
غاضبة في الخارج:

- يا عالم ياللي ما تخافوش ربنا.. إحنا ناس كبيرة ما نستحملش الحر والوقفة سايبيننا بنموت وقاعدين في مكاتبكم تطفحوا الشاي.؟ إلهي يحرقك ويشرقك ويبرقك ياللي انت معطل مصالح الناس..

بعدهما انتهت الشرقة نظر "وهبه" الي السيدتين بضحكة صفراء قائلًا:

- ههههههه مش باقولكم كفاية علينا دعوات الناس الطيبة دي.؟ المهم يا ست "فايزة" إحنا دلوقتي هنفتحلك دفتر توفير وبعدين نشوف موضوع المعاش الدليفري..

تم فتح الدفتر بمنتهى السلاسة.. ونظير السرعة في الأداء تم خصم 150 جنيه من المبلغ كإكرامية للسادة الموظفين.. ووضعت "فايزة" كل ما تبقى معها في الدفتر معتمدة على مبلغ المعاش الذي ستقبضه الآن وحمدت الله على توفيقها إلى هذا الحل المريح.. وفالت للرجل:

- إحنا متشكرين أوى يا أستاذ "وهبه" تعبناك معانا..  
- لا شكر على واجب يا ست الكل دي رسالتي في الحياة قضاء حوائج الناس..

- طب أنا باقول بقا تكمل جميلك وتقبضني المعاش بالمرّة  
أحسن أنا حظيت كل اللي معايا في الدفتر وبعد كده بقا  
تبقى تبعتلّى معاشي ع البيت إلهي يسترك ويريح قلبك..

"وهبه" ضاحكا ضحكة غير مريحة:

- ههههههههه.. وماله يا ست الستات.. بس هو فيه كام نقطة  
كده لازم نتفق عليها الأول.. أولا: أنا مش لوحدي في  
البوسطة وكل واحد من الزملاء مختص بحاجة يعني.. أنا  
مثلا باصرف معاش.. والأستاذ جودة اللي فتح لحضرتك  
الدفتر دلوقتي مختص بحسابات التوفير.. والأستاذ عدلي  
اللي بيعض في الساندويتش هناك ده بتاع الجِوالات.. أما  
بقا الأستاذ حمزة اللي بيبرد ضوافره هناك ده هو المندوب  
اللي بيقبض في البيت.. وحضرتك طبعا كلك نظر وعارفة  
إن كله بيصّب في مصلحة كله..

"فايزة" متعجبة:

- يعني إيه؟ مش فاهمة..  
- يعني زى ما سيادتك خدتي بالك من الفلوس اللي انخصمت  
من الدفتر دي كلنا هنتراضى بيها.. نفس الوضع مع موضوع

الدليفي كلنا برضه هنتراضى وحضرتك أول المستفيدين..  
فلوسك هتوصلك معززة مكرمة لغاية بيتك بدل الهدلة  
وقلة القيمة اللي إنتي شايفاها بره دي.. يبقى بالصلاة ع النبي  
كده كل شهر فيه 100 جنيه لزوم تراضى للزملاء..

نظرت له "فايزة" متعجبة من بجاحته؛ ثم نقلت بصرها إلى  
"توحيد" التي كانت تنظر في السقف مدعية البله ولم  
تستبعد "فايزة" أن يكون لـ "توحيد" أيضا نصيب من هذه  
البدلات.. فقد تكون قبضت رسوم جرزبون.. يعني إشمعنى  
هي ما تطمعش إذا كان عيالها طمعانين!.

ولكن لم تجد "فايزة" والغيظ يأكلها أمامها حلا سوى الموافقة  
فهي لا تتخيل إن تقف مثل أولئك المعذيين كل شهر..

هزت رأسها بالموافقة.. وفجأة سمع الجميع هرجا ومرجا  
بالخارج ودخل المكتب رجلا تبدو عليه إمارات الغضب  
والتحفز؛ وما أن دخل حتى انتفض الموظفين واقفين في  
احتراماً وهتفوا متلعثمين:

- حضرة المراقب! أهلا وسهلا بحضرتك اتفضل..

رد المراقب بغضب:

- لا أهلا ولا سهلا.. هو أنا جاي أتضاييف زيكم ولا إيه؟ إيه الإهمال والتسيب ده؟ 100 شكوى منكم الناس كلها واقفين بالساعات.. هي دي الرسالة بتاعة المصلحة؟ إحنا بنريح الناس ولا بنعذبهم؟ وكويس إني جيت في الوقت المناسب عشان أشوف بنفسي كسلكم وتراخيكم عن أداء العمل..

ثم نظر إلى "فايزة" و"توحيد" وقال:

- ومين الستات دول؟ وإيه اللي مدخلهم جوا المكتب؟ انبرت "فايزة" مدافعة وموضحة رغم زغد وقرص "توحيد" فيها وغمز "وهبه" لهما:

- أنا هنا بافتح حساب توفير وياتفق معاهم على توصيل المعاش ديلفري.. أصلى مش حمل الوقفة بره يا سيادة المراقب وأهو هين قرشك ولا تهين نفسك.. في داهية ال 100 جنيه كل شهر واشترى راحتي..

المراقب للموظفين المبلولين:

- الله.. الله.. يعني مهملين ومرتشين كمان ده انتوا سنتكم هباب اتفضلوا خلصوا مصالح الناس اللي بره دي ومتحولين كلكم للنيابة الإدارية..

صاحت "فايزة":

- طب والمعاش يا سيادة المراقب.؟!
- اتفضلي خدي دورك في الطابور بره يا ست.. إحنا  
ماعدناش في المصلحة خيار وفاقوس..
- لا والنبي ما أقدر.. ده أنا عندي روماتيزم وخشونة والتهاب  
مفاصل ولمباجو..
- خلاص استني ليوم عشرة في الشهر لما البوسطة تروق..

"فايزة" صارخة:

- أستنى إزاي.؟ ده أنا حطيت كل اللي حيلتي في دفتر التوفير  
زى ما قالي مخفى الاسم والرسم اللي قدامك ده..
- قرصتها "توحيدده" في ذراعها وسحبها للخارج متممة:
- مش وقته الناس راحوا ف داهية ومن ضمنهم جوز بنتي..  
منك لله إنتي ولسانك الزالف ده.. تعالي نروح وبكرة تبقى  
تيجي تسحي من الدفتر..

وفي اليوم التالي ذهبت "فايزة" وحيدة إلى مكتب البريد آمله  
في سحب مبلغ مما أودعته بالأمس بالدفتر لتدير أمورها حتى

قبض المعاش.. وجدت نفس طواير الأمس ونفس معاناة كبار السن ولكنها ذهبت إلى شباك حسابات التوفير فوجدته خاليا وحمدت الله كثيرا على ذلك..

انتبه إليها الموظف الجالس يسقى بسكويت العيد في كوابية شاي بلبن فنظر إليها بغير اهتمام.. بادرته بطلبها:

- لو سمحت عايزة اسحب مبلغ من دفتر التوفير بتاعي..

نظر لها بسخرية قائلا:

- بالبساطة دي.؟

- وإيه المشكلة يعني.؟

الموظف متجاهلا تعليقها:

- بطاقتك يا ست خلصينا..

وتناول البطاقة ناظرا ومتفحصا في وجه "فايزة" ثم لمعت عيناه فجأة وقال في لهجة المفتش كرومبو:

- إنتي عايزة تفهميني إن دي بطاقتك.؟ وأنك إنتي اللي في الصورة دي.؟

"فايزة" متعجبة:

- أمال مين اللي في الصورة؟ أمي.؟!
- لا بنتك وإنتي الصادقة.. الصورة شكلها صغير عليكي قد  
15 سنة..
- يا حضرة أنا عملاها من 7 سنين وما كنتش عيانة زى  
دلوقتي عشان كده الفرق باين وأنت عارف صور  
البطاقات كلها عاملة إزاي..
- يا ست الناس بصي كويس الحواجب هنا رفيعة  
وحواجب حضرتك لا مؤاخذة تخينة..
- يا عم الكل كنت عاملة حواجبي ساعتها.. دي مصيبة إيه  
دي.؟! خلصني الله يسترك أنا مش قادرة أقف..
- يعني أخلصك وأجيب لنفسي مصيبة.؟! مش كفاية اللي  
حصل لزمالي امبارح..

تذكرت "فايزة" "وهبه" وسألت الرجل:

- أه صحيح أنا عايزة الأستاذ "وهبه".. هو كان شاهد على  
فتح الدفتر امبارح وهو اللي متأكد إن أنا صاحبة  
البطاقة..

- أستاذ "وهبه" بعيد عنك في النيابة الإدارية النهاردة بسبب واحدة لبط ولسانها متبرى منها ودته ف داهية الله يحرقها مطرح ما هي..

"فايزة" بنرفزة:

- ما تحترم نفسك يا جدع انت وخلصني ف ليلتك الطين دي بدل ما أخليك تحصله ع النيابة..

الموظف بدهشة:

- الله الله الله.. هو إنتي اللي عملتها؟ طب تعليلي بقا يا حلوة.. مطلوب منك بطاقة رقم قومي جديدة عشان دي باقي لها شهر وتنتهي، ومطلوب شهادة من خمسة موظفين إنك على قيد الحياة وإنك صاحبة البطاقة الجديدة، ومطلوب تكون حواجبك مطابقة لحواجب الصورة اللي في البطاقة، ومطلوب أرقام المبالغ اللي حطيتها في الدفتر ورقة. ورقة.. جهزي حاجتك دي كلها وتعليلي بعد أسبوعين تكون الزحمة خفت من البوسطة.. ياللا يا ست الحبايب بقا أحسن الشاي بلبن برد..

همت "فايزة" بالكلام عندما رأت رجلا مسنا مقبلا عليهما  
بادي التعب واضعا يده على قلبه ويتعثر في خطواته ووقف  
أمام الشباك وبصوت مرتعش قال:

- يا بني مش هتصرفلى فلوسي من الدفتر بقا؟ أنا لازم  
ادخل الإنعاش النهاردة ومحتاج ادفع فلوس للمستشفى  
الله يخليك هامووت..

- جهزت أوراقك يا والدي؟! ورينى كده.. إيه ده فين شهادة  
بقاءك على قيد الحياة؟

وفجأة جحظت عينا الرجل وشهق شهقة واحدة وطلع السر  
الإلهي ولم يعد محتاجاً لشهادة غير شهادة الوفاة..

قام الموظف من على مكتبه ونظر إلى الفقيد ببرود ثم رفع  
رأسه إلى الشعار المعلق فوق الحائط قائلاً:

- لاحول ولا قوة إلا بالله.. ياللا هو (وفر وارتاح)ح)..

تمت..



يا سنتر الهنا..

تلك البلوى لن تشعر بها إلا من كانت لديها ابن أو ابنة في  
الثانوية العامة وحش كل بيت..

وسنة كبيسة تمر بطلوع الروح مخلفة وراءها أعصاب منهكة  
وجيوب خاوية..

والأولاد غير البنات في هذا الأمر.. فكلنا نعلم أنهم في هذا  
السن يصعب السيطرة عليهم والتعامل معهم فما بالك  
بمحاولة إجبارهم على المذاكرة..

بالطبع الدروس الخصوصية هي سيد الموقف ولا غنى عنها  
مهما حاولت في تلك السنة المصيرية.. وهذا نموذج لأسرة  
مصرية متوسطة الحال مثلنا جميعا..

الست أم "ميزو" ابنها "ميزو" طالب في الثانوية العامة وهي  
ووالده يحلمون باجتيازه لها بتفوق وبمجموع يؤهله لإحدى  
الكليات ذات المستقبل المضمون.. لذلك أعدوا العدة وربطوا  
الحزام وعملوا ميزانية شهرية للصرف على الدروس  
الخصوصية.. ونصحهم أولاد الحلال بمراكز الدروس  
الخصوصية المسماة بـ (السنتر) فهي الأفضل والأوفر وبها  
عمالقة المدرسين..

ورغم رفض أم "ميزو" لهذه المراكز لكثافة الطلبة بها مما سيقبل من تركيز ابنتها إلا أنها قررت التجربة وبذلت مجهود كبير في إقناع "ميزو" بها حيث كان يرفضها لعدم اعتياده عليها حتى فوجئت به في يوم يقول لها:

- ماما.. هاتي فلوس عشان هاروح أحجز الدروس في السنتر
- ربنا يهديك يا ضنايا خلاص أخيرا اقتنعت..
- أيوه يا ماما بس هاخذ عربي وإنجليزي مع مدرسين خصوصي..
- ماشى يا حبيبي مش مشكلة.. عايز كام؟
- شوفيلي كدة 500 جنيه تحت الحساب..
- إيه؟ 500 إيه؟ ليه يا بابا رايح تحجز بدلة الفرح؟
- يا ماما مش 7 مواد! وبعدين كل سنتر ليه نظامه وأنا ما عرفش أسعارهم كام بس أصحابي قالولي الحجز ما بين 50 ج و70 ج للمادة..
- ده باينه هيبقى مرار طافح..
- أعطته المبلغ المطلوب وذهب وعاد بدون مليم..
- هاه يا حبيبي عملت إيه؟



- يا فندم ماهى العروض خاصة بالدروس.. يعني مثلا ابن حضرتك لو أخذ عندنا كل المواد بنديله تلت حصص إحصاء قبل الامتحان (فور فري) ومعاهم شيت مكون من تلت ورقات بدبوسين ألوان طبيعية طباعة فاخرة..
- ما شاء الله ما شاء الله.. وما فيش عروض تاني يا حبيبي؟
- فيه طبعا.. عندنا عرض عبارة عن تلت مواد أساسية عليهم مادة فرعية هدية، وعندنا كمان (أوفر) حلو جدا لو أخذ عندنا ست مواد بياخد معاهم مسطرة بمية وسمك وأستيكة بريحة هدية.. وده باكيديج على بعضه..
- إيه الحلاوة دي؟ حاجة عظيمة فعلا.. ويا ترى بقا الحصبة بكام؟
- الحصبة بخمسين جنيه حضرتك شاملة الكرسي اللي هيقعد عليه والإنارة والميكروفون اللي التيتشر بيتكلم فيه.. ولمزيد من راحة ابنك عندنا حصص بستين وبسبعين جنيه ودول بتبقى شيز لونج بدل الكرسي الخشب ومعاه مشروب ساقع أو سخن حسب الرغبة..

ردت الأم وهي تتميز من الغيظ:

- ما بتعملوش يا حبيبي عروض على اللبن ولا مسحوق الغسيل؟

- مش فاهمة حضرتك تقصدي إيه يا فندم.؟
- لا ما قصدش.. خلاص هبقى أقرر وأبلغكم مع السلامة..
- أغلقت الخط وهي لا تكاد تصدق أذنيها.. وتمتمت بذهول:
- يا ليلة سودا.. إيه اللي بسمعه ده.؟ دي فكرتي بتتوع التايم شير.. ثم إيه سنتر الهنا ده.؟ ده اسم لمركز تعليمي.؟ عجائب والله..

دقائق ورن هاتفها من جديد:

- الو مساء الخير يا فندم.. مع حضرتك سنتر (لولا)
- (لولا).؟ دي مين (لولا) دي كمان.؟
- سنتر (لولا) يا فندم.. ابن حضرتك حاجز عندنا فلسفة وعلم نفس.. ونصيحة مني يحجز بقية الدروس لأن اللي عندنا مش هيلاقيه بره..
- ليه بقا عندكم إيه زيادة.؟ فيه عروض جامدة يعني.؟
- هههههههه.. لا عروض إيه يا فندم.؟ حضرتك إحنا سمعتنا تكفيننا واسم (لولا) عرض لوحده.. يكفي شعارنا يحسسك بالأمان ولاطمئننا على ابنك..
- وشعاركم إيه بقا.؟

- معقولة يا فندم ده شعارنا مشهور جدا.. (لف براحتك  
زوج صبيع.. واحنا ضامنين المجاميع)..
- يا ماشا الله يا ألف راية بيضا.. بقا ده الشعار يا ست  
(لولا).؟ يعني تشجعوا العيال على التزويغ والصياغة.؟
- يا فندم أولا أنا مش (لولا) أنا السكرتيرة.. ثانيا ده شعار رمزي  
كناية عن إن الطالب مهما عمل بإذن الله معانا من الأوائل..
- امممممم.. طب يا ضنايا هبقى أشوف وأقولك..

أغلقت الخط وصاحت منادية ابنها:

- واد يا "ميزو".. انت يا هباب الحلل يا أخرة صبري..
- إيه يا ماما.. فيه إيه.؟
- إيه يا واد السناتر إلى انت حاجز فيها دي.؟ بقا دي أماكن  
للتعليم.؟ واحدة ثقلي عروض ومشروب وشيزلونج.. والثانية  
شعارها لف وصبيع.؟ عرفتهم من أنني داهية السناتر دي.؟
- يا ماما دي سناتر ممتازة وكل أصحابي اللي معايا بيشكروا فيها..
- وإيه اللي عرفهم أنها ممتازة يا فالح..
- ما هما كانوا بياخدوا فيها السنة اللي فاتت..

خبطت الأم على صدرها وصرخت:

- يا ندامتي.. يعني عايدين السنة يا ولا؟
- ما هو.. ما هو.. ما هو...
- إنشالله يمهمهوك يا بعيد.. هو ده السنتر الممتاز؟ طبعا
- ما هو من حالوته ما هانش عليهم يسيبوه.. اسمع يا مزغود.. إنت تروح تسحب الفلوس اللي دفعتها دي وتشوف سنتر تاني..

"ميزو" بغضب:

- يوووه يا ماما بقا.. ده سنتر الهنا كان هيديني مسطرة بسمكة ومية..
- خد ياخويا اتنين جنيه هاتلك واحدة واطلع من دماغي..
- طب خلاص هاسيب سنتر الهنا بس خليني ف سنتر (لولا) والنبي. والنبي..
- سنتر (لولا) بتاع لف وصبيع؟ أبدا على جثتي..
- هو إيه ده بقا؟ هو تحكم وخلاص؟ ده سنتر ممتاز وكل أصحابي بيقوللى إن السكرتيرة جام.... قصدي المستر اللي هناك جامد جداً..
- هي كلمة واحدة.. روح اسحب الفلوس منهم وهنشوف سنتر محترم تاخذ فيه كل المواد..

تركها "ميزو" وهو يخبط في الأرض ويبرطم وعاد متأخرا يجر  
أذيال الخيبة فسألته أمه:

- عملت إيه يا فالج؟ جبت الفلوس؟
- ما هو.. ما هو.. ما هو...
- انت هترجع تمهمه تاني؟ فين يا واد الفلوس؟
- ما رضيوش يرجعوها وقالولى انت اللي سايب..
- انت اللي سايب؟ هو انت طلبت منهم الشبكة  
والدباديب؟ يا ولاد ال....
- "ميزو" بفخر: لا بس أنا ما سكتتش.. وهللت وزعقت وما  
مشيتش غير لما أخذت المسطرة أم سمك ومية..
- لا فالج من يومك.. اسم النبي حارسك وصاينك.. اعمل  
إيه فيك دلوقتى؟ 500 جنيه يضيعوا ع الأرض حرام ولا  
حلال ده يا عالم؟
- خلاص يا ماما ما تزعليش.. أنا سمعت عن سنتر جديد  
خالص بيعلنوا عنه وفيه مدرسين مشهورين أوى بس هو  
بعيد شوية..
- ده فين ده؟ واسمه إيه؟

- هو قريب هنا واسمه سنتر المجد..
- امممممم.. طب كويس على الأقل اسمه محترم شوية..
- على الله يكون عليه الطلا..
- أيوه يا ماما.. ده بيقولوا كويس أوى وكمان بيدي
- امتحانات وبيفتش ع الواجب كل يوم..
- طب يا بني ده ممتاز كده مش أبو شعار منيل على عينه
- ما هو ده يا ماما ليه شعار برضه بس محترم..
- يا شيببيخ؟ وشعاره إيه بقا؟
- شعاره (مهما تلف ومهما تدور.. غير سنترنا ما فيش سنتر)..
- سنتر؟ لاحول ولا قوة إلا بالله.. لله الأمر من قبل ومن بعد..
- خد يا بني الفلوس وروح احجز فيه كل المواد وخلصنا..
- أخذ "ميزو" 500 جنيهه أخرى وذهب للحجز؛ وبعد أسبوع بدأ ينتظم في الدروس.. ولبعد السنتر عن المنزل أصبح هناك ميزانية أخرى للمواصلات اليومية وكل الميزانية اللي وضعتها أم "ميزو" وأبو "ميزو" لم يعد لها داعي.. وظلت المصروفات تزيد يوما عن يوم ولم يخرج شيء من تحت يد السنتر..

"ميزو": ماما.. ماما..

- امممممم.. خييير؟
- عايز 250 جنيه أجيب كتاب الألماني وكتاب التاريخ وكتاب الجغرافيا..
- 250 جنيه ليبييه؟ أبوك لما يقبض ينزل يجيهمملك من الفجالة.. هات أسامهم وخش ذاكر..
- فجالة إيه يا ماما.. المدرسين عايزين الفلوس عشان يجيبولنا الكتب هما..
- المدرسين هما اللي نازلين الفجالة؟

"ميزو" بزهدق:

- يووووووه.. هتقوللى برضه فجالة.. يا ماما هما اللي بيألفوا الكتب ويطبعوها ويوزعوها..
- كل ده بيعملوه؟ أمال الملازم اللي بيدوهالك دي إيه؟
- لا دي السنتر اللي عاملها وبيبيعها لنا..
- ماشى يا بني الأمر لله.. خد 300 جنيه هات الكتب والملازم وهات الباقي..

وبعدما رجع "ميزو" ..

- ماما.. اتفضلي.
- إيه ده؟ قلم كحل؟ حبيب قلبي يا بني شاله يخليك.. والنبي كان ناقصني طب ليه يا حبيبي تكلف نفسك كدة.. ياللا هدية مقبولة..
- هدية إيه يا ماما؟ ده الباقي..
- باقي إيه يا نن عين ماما؟
- باقي ال 300 جنيه. الكتب ب 250 وملازم ب 35 وقلمي طفح جبت غيره من مكتبة السنتر ب 5 جنيه وأتبقى عشرة جنيه وما كانش فيه فكة ادوني ده وقالولى خد ده لماما هتفرح أوي..

وفعلا فرحت أم "ميزو" جدا لدرجة إن دموع الفرح نزلت من عينيها وأفسدت الكحل الذي وضعته بالباقي.. كل هذا كان قبل بداية الدراسة بشهر.. أما اللغة الإنجليزية واللغة العربية المأخوذين مع مدرسين خصوصيين بمبلغ وقدره لم يكونا أفضل حالا..

"ميزو": ماما هاتي 50 جنيه عشان عندي حصة إنجليزي..

- انت يا واد مش خدت 50 جنيه لحصة الإنجليزي امبارح؟
- يا ماما دي حصة إكسترا المس عاملاها عشان متأخرين في المنهج..
- متأخرين إيه يا بني دي الدراسة لسه ما بدأتش..
- وأنا مالي بقا الله؟

وبعد يومين:

- ماما هاتي 50 جنيه عشان عندي حصة إنجليزي..
- هوفيه إيه يا بني هو انت ما بتاخدش غير إنجليزي؟
- ده إنت لو هتشتغل مترجم ما كنتش خدت ده كله..
- يا ماما أصل المس إدتنا الحصة اللي فاتت كلمات نحفظها والحصة دي عشان تسمعها لنا..

وهكذا يا سادة إلى إن بدأت الدراسة فعليا كانت أم "ميزو" أنفقت الجمعية أم 10 آلاف جنيه وباعت شبكتها وحلق ابنتها وفي النهاية وقعت من طولها مصابة بهبوط حاد في الدورة الدموية عندما دخل عليها "ميزو" ذات يوم متأقفا وقال بضيق:

- ماما أنا عايز أغير السناتر دي.. أنا مش فاهم حاجة  
والكتب اللي إدو هالنا صعبة.. أنا أصحابي قالولي  
على سنتر حلو أوى اسمه سنتر السعادة وشعاره..  
(تدخل هنا فاشل جربوع.. تطلع ومعاك المجموع)..

-

تمت..





# الدكتور خلف..

ليلة من ليالي الصيف الحارة والتي يصعب فيها النوم.. كنت نائمة في غرفتي؛ وما أدراكم ما غرفتي يا حضرات..

شيء أشبه بغرف الساونا أو دماسة الفول..

إذا دخلت بها حاملا كيسا من الذرة فلن تمر دقائق حتى تسمع فرقة الذرة لتجده وقد أصبح فشار..

تسألوني عن التكييف.؟

إجابتي إنني قررت تحويله الى عشة ظريفة لتربية الحمام بعد أن دفعت فاتورة الكهرباء والتي اقتربت من الألف جنيه الشهر الماضي..

الساعة الآن تقترب من الثانية صباحا؛ وأخيرا أغشي علينا أنا وزوجي من شدة الحر وذهبنا في نوم ليس بالعميق..

أفقت أنا أولا قرب الثامنة صباحا وجلست في الفراش وبدأت أهدهد أبو العيال لإيقاظه:

- "خالد".." خالد".. قوم يا راجل الساعة بقت تمانية هنتأخرع الشغل..

- يووووووه.. سيبيني نايم أكمل الحلم الجميل ده..

أخذت أحدث نفسي بذعر وأنا أتخيل خيانتة التي كشفها الله  
لي من تلك الجملة العفوية:

- حلم جميل؟! يالهوي ياما.. يبقى بيحلم بواحدة ست..  
يبقى يعرف حد عليا وهيسيبي ويتجوزها.. طب والعيال؟  
يا مراري الطافح البت هتسرح في الإشارات؛ والواد هينشل  
في الأوتوبيسات.. طب وأنا وفضيحتي في الشغل! ده أنا  
وهو في شغل واحد يعني الولية "إحسان" دي ما هتصدق  
تشمتم فيا؛ وأبقى لبانة في بوء اللي يسوى واللي ما  
يسواش.. طب والشقة من حق مين؟ وقسط الميكرويف  
ها تدبس فيه لوحدي..؟ لااااا.. والنبي ما يكون أبداً..

وبكل ما أتيت من قوة وغيظ قرصته قرصة قفز على أثرها  
كمن لدغته حية وجلس مكانه وهو يصيح بألم:

- إيه؟ في إيه يا ولية؟ حد يصحي جوزه بالطريقة دي؟  
- احمد ربنا إني قرصتك بس.. بتحلم بمين يا راجل يا خاين  
العيش والملح يابو قلب زى الخرشفة؟ هان عليك ولادك  
تجيب لهم مرات أب وانا عايشة؟ إهىء. إهىء. إهىء..



- يا نهار مدوحس.. إيه المية دي يا "خالد"؟
- بتسأليني ياختي.. تعالي نشوف ناسية إيه مفتوح طول الليل غرق الدنيا كدة..

هرولنا معا الى دورة المياه ففوجئنا بالمحبس الرئيسي للشقة مكسور؛ والمياه مندفعة على هيئة نافورة والشقة عائمة ولا أجدع شقة في فينيسيا..

خبطت بيدي على صدري وصرخت به:

- حلمت بمارينا يا أخويا؟ أهي جات لك لحد عندك..
- هنعمل إيه دلوقتى؟

رد عليّ وهو يحاول بيأس السيطرة على المحبس بلفه بالمنشفة:

- هنعمل إيه يعني؟ هنجيب سباك طبعاً..

لم أكذب خيراً وهرعت للاتصال بمدام "سلوى" زميلتي بالعمل وتعتبر قاموساً ودليلاً متنقلاً لكافة أنواع الأعطال ودلتي "سلوى" على بروفيسور في السباكة - على حد وصفها - وأخذت رقم تليفونه واتصلت به فوراً:

- ألو.. أسطى "خلف" معايا؟

أجابني صوت رجل مستنكرا وكأنني سببته:

- دكتور "خلف" سبيكينج.. مين حضرتك؟

رددت معذرة بأنه يبدو أنني أخطأت في طلب الرقم:

- أسفة والله يظهر النمرة غلط..

- النمرة مش غلط ولا حاجة يا مدام.. أنا "خلف" معاكي

بس أنا مش أسطى وما أحبش اللقب ده..

- ااااااه.. طب معلش ياااا دكتور "خلف".. أنا صحيت

لقيت الدنيا عايمة عندي ومحتاجة حضرتك حالا..

- امممممم.. كدة يبقى الكشف مستعجل؛ وفي الحالة دي

الفيزيتا هتبقى الدوبل..

رفعت السماعة عن أذني ونظرت لها باستغراب وسألته

مرة أخرى:

- مين معايا؟ أنا عايزة الأسطى "خلف" السباك..

رد بعصبية واشمئناط:

- إيه يا مدام؟ قولتلك أنا "خلف" السباك معاكي ومش

باحب كلمة أسطى دي.. واديي العنوان بسرعة أنا

أجندتي النهاردة مشحونة وزى ما قولتلك كدة الكشف  
هيبقى مستعجل..

أعطيته العنوان ووضعت سماعة الهاتف وأنا أضرب كفاً بكف..  
مرت نصف ساعة واتصلت بي "أم محمد" البوابة متسائلة  
بلهجة قلقة لا تخلو من شماتة:

- خيريا مدام؟ هوسي الأستاذ "خالد" عمل حاجة ولا إيه؟  
ده فيه واحد شكله كدة بيه من المحافظة ولا الداخلية  
بيسأل عن شقتكم.. اطلعه ولا أعطله لغاية ما تخبي سي  
الأستاذ؟

نهرتها بعنف قائلة:

- -إنتى بتقولي إيه يا "أم محمد"؟ إنتى اتجننتى والا إيه؟  
طلعيه لما نشوفه عايز إيه؟

رن الجرس وفتحت لأجدها وبصحبتها باشا من السفارة على ما  
يبدو أخطأ في العنوان؛ ولكنه عاجلني بالسؤال الذي أفزعني:

- مش دي شقة الأستاذ "خالد"؟

أجبتة في رهبة وتوجس:

- أيوه يا فندم؟ هي بعينها خير أن شاء الله؟

رد بكل إباء وشمم:

- أنا "خلف" ..

هتفت بدهشة:

- السباك؟

- أيوه ..

- ينيلك .. وعامل في نفسك كدة ليه؟

"خلف" بقرف:

- أفندم .. حضرتك بتكلميني؟

- لا أبدا أنا بكلم ابن البواب اتفضل .. ادخل .. يا "خالد" ..

يا "خالد" .. تعال .. الدكتور "خلف" وصل ..

اصطحبت دكتور "خلف" إلى الحمام الذي أصر أن أنظفه بالديتول الأصلي أولاً.. وخلع البليزر السينييه الذي يرتديه وعلقه على شماعة الباب؛ وارتمى جوانتي من البلاستيك يبدو أنه معقم؛ وقفاز طبي وسماعة طبية (أه والنبي زمبؤلكم كدة) وأنا وزوجي واقفين نحملق به في ذهول كأننا نشاهد مخلوقا نادرا في قناة ناشيونال جيوجرافيك ..

وضع "خلف" السماعة على المواسير محاولا تحديد مكان التسريب - على حد شرحه لنا - وظهرت علامات الخطورة على وجهه وهو يفحص القلب بداخل المحبس؛ ثم خلع السماعة والنضارة ونظر لنا بإشفاق شديد وتهدت تهيدة أوقعت قلبي في قلمي ووجدتني أسأله بقلق:

- أرجوك.. ما تخبيش عليا يا دكتور.. فيه أمل.؟

رد بعنجهية:

- مع "خلف" ما تقلقيش يا مدام.. بس ما أخبيش عليكم القلب بتاع المحبس حالته تعبانة جدا ولازم له زرع قلب.. يعني عملية قلب مفتوح؛ وده هيكلفكم كثير.. الموضوع هيدخل بالكشف بالقلب بأجرة إيدي حوالي 500 جنيه.. صرخت فيه:

- إيه.. 500 إيه.؟ انت هتعمللي فيها مجدي يعقوب.؟ زرع قلب إيه؛ وقلب مفتوح إيه.؟ طب ده أنا اتصل ببرنامج صبايا الخير والست "زهام سعيد" تعملهاى ببلاش على نفقة الدولة.. ما تقول كلام معقول يا أسطى "خلف"..

- قولت لحضرتك اسمي دكتور "خلف" .. والله ده اللي عندي.. أنا بأركب حاجات أصلية وبإديكي ضمان.. يعني حاجة تعيش العمر كله ولو مش عاجبك حضراتكم أخذ 100 جنيه الكشف المستعجل واتكل على الله..

نظرت لزوجي فوجدت ملامح الشر تتشكل على وجهه؛ وأذناه تلعبان بسرعة؛ وتلك هي علامات التخطيط لارتكاب جناية كما تعودتها منه..

جذبتة للخارج محاولة السيطرة على الحالة في بدايتها فسألني وهو يصصر على أسنانه:

- هاه.. هنعمل إيه في النصاب اللي جوا ده؟ أنا بفكر ادفنه مطرحة وأخلص الناس من أمثاله..

أجبتة مهدئة: اهدي بس كده وصلّى ع النبي.. أمرنا لله أهو جه وخلص وكده كدة هيتنيل يلهف 100 جنيه كشف.. والدنيا عايمة زى ما انت شايف.. لله الأمر من قبل ومن بعد.. أشرت لخلف بالموافقة فطردنا من غرفة العمليات.. أقصد دورة المياه قائلًا:

- اتفضلوا انتظروا برة..

ثم بدأ في العملية التي لم تستغرق اكثر من ربع ساعة؛ ولهف ال 500 جنيهه وارتدى البليزر السينييه - الذي كنت أتمنى من قلبي أن ينساه على الشماعة - وخرج بمنتهى السؤدد والكبرياء وتركنا ودموعنا تسيل على خدودنا..

ثم بدأت مفاوضات من نوع آخر مع "أم محمد" البوابة كي تصعد لإزالة آثار العدوان؛ وغسيل السجاد..

وتكلفت تلك العملية بدورها 300 جنيهه أخرى؛ والحمدالله الذي لا يحمد على مكروه سواه..

وجلست أجتراحزاني وأنا أنظر لزوجي بغيظ قائلة:

- الحلم اتحقق يا شيخ "خالد" يا ريتك ياخويا حلمت إنك إتجوزت عليا كان يبقى أوفر من الغرامة دي..

تمت..



# ست الحبايب يا حبيبة..

---

منذ أكثر من أسبوع واستعدادات أولادي لعيد الأم على قدم وساق؛ وخصوصا ابنتي حبيبيتي.. وأنا أدعي البله وأتصنع عدم الاهتمام (لا أرى.. لا أسمع.. لا أتكلم) رغم فضولي القاتل لمعرفة الهدايا المنتظرة..

كانت الأيام تمر ويوميا تقريبا زيارات مربية من صديقاتها.. جرس الباب لا يكف عن الرنين وأجدها تسرع كي تفتحه قبلي وتدخل الفتيات حاملات الحقائب المزخرفة ويتسللن الى غرفتها مغلقات الباب؛ ولا يلبثن بعد دقائق أن يغادرن بأيدي خاوية مصطحبات ابنتي الى الدرس..

وما أن يغلقن الباب خلفهن حتى أجرى الى مغارة على بابا كي استكشف الهدايا المخبأة بها.. كنت أتفافز من الفرحة وأنا أرى الكثير من الكؤوس والفازات والعطور وغيرها من الأشياء التي تسعد الأمهات.. بالطبع كنت أعلم أن الكثير منها لا يخصني لذلك أردت استدراجها في الحديث يوما كي أعرف رأسي من قدمي وكان هذا الحوار:

- هو إيه يا حبيبيتي الحاجات اللي أصحابك بيحبيبوها هنا دي؟

ردت بتردد:

- حاجات؟ حاجات إيه يا ماما؟

غمزت بعيني وانا بضحك:

- ايبييه؟ إنتي هتخبي على ماما؟
- أبدا يا ماما وحياتك.. بس أصل دي حاجات تخصصهم هما وشايلينها عندي عشان مامتهم ماتشوفهاش..

وبالطبع خمنت إنها هدايا لأمهاتهن وتساءلت ماذا تخبي لي  
تلك القرضة يا ترى؟!

ولم تتأخر الإجابة كثيرا إذ سألتني يوما:

- قوليلي يا ماما؟

رددت باستظراف:

- يا ماما... خخخخخخ

نظرت لي نظرة معناها إيه الخفة دي؟ ثم أكملت:

- لا بجد يا ماما قوليلي بما إنك أم وكده يعني تحبي يجيلك  
إيه في عيد الأم؟

كتمت فرحتي في قلبي واستدعيت روح المرحومة عزيزة حلمي  
وحاولت جعل صوتي متأثر متهدجا وانا أجييب:

- صدقيني يا أمال.. قصدي يا نور الأم يرضيها ولو وردة  
بلاستيك.. المهم أشوفكم في أحسن حال ومتفوقين وفرحا...

لم أكمل الخطبة إذ قاطعتني قائلة بملل:

- مفهوم. مفهوم.. كل ده أنا عارفاه أنا بتكلم بصفة عامة  
يعني الستات بيحبوا يجيلهم إيه؟ بما إنك ست يعني..

تريثت قليلا وأخذت اجمع في عقلي بسرعة كل الأشياء التي  
أحتاجها ثم أجبت:

- بصي يا ستي.. الستات بيحبوا البارفانات والكريمات  
والشنط والشوزات الطبيعي وكمان ال...

قاطعتني هاتفة:

- حيلك. حيلك يا ماما إحنا لسه في إعدادي مش في السلك  
الدبلوماسي..

شعرت إنني بالغت قليلا فقلت مستدركة:

- أنا باقول بصفة عامة الستات بتحب إيه إنما إنتي عارفة  
أنا يكفيني....

- عارفة. عارفة وردة بلاستيك..

- بالظبط كده
- طب لو حاجة منزلية يا ماما! يا ترى إيه المناسب كهدية  
في عيد الأم؟
- راجعت بسرعة الصاروخ في رأسي جميع الأطباق  
الأكروبال والأكواب التي فقدت أو تهشمت عندي  
وأجبت بسرعة:
- والله عندك مثلا أطقم الأكروبال أو البيركس على قدكم..  
وممكن كمان أطقم الكوبيات النضيصة مش إزاز ياسين  
اللي كره الأمهات في عيدهم ده..
- خلاص. خلاص يا ماما.. عرفت شكرا..
- دخلت الى غرفتي شاعرة بالراحة والسكينة فهي الآن على  
علم بكل احتياجاتي والله الموفق والمستعان..
- في اليوم التالي عادت من المدرسة تبرز من حقيبتها لفافة  
لامعة.. حدثت نفسي سعيدة:
- حبيبتي يا بنتي.. والنبي بنت حلال.. مخبياها يا ضنايا  
عشان تفاجئيني بها.. يا ترى جايبالي إيه يا نين عين ماما؟  
ياللاهانت وكل شيء هيبان..

مرت الأيام على هذا الحال ولم يخل الأمر من بعض القروض  
الحسنة؛ إذ كانت يومياً تقترب مني وتهمس في خجل:

- ماما مالقاش معاكي 20 جنية؟ ماما مالقاش معاكي 30 جنية؟

وأنا أعطيتها عن طيب خاطر ولسان حالي يقول: "غلبانة  
هتجيب منين للحاجات دي كلها؟ ياللا اهو كله راجعلي" ..

أما عن أبني البكري حبيب القلب فالأمر يختلف قليلاً.. فهو  
والحق يقال كان ولا يزال وقورا هادئاً لا يظهر ما بداخله أبداً  
ويبدو أنه يخبئ لي مفاجأة كبيرة.. فهو منذ أيام يحوم حولي  
كالفراشة يسمعي أحلي الكلمات:

- ربنا يخليكي لينا يا ست الكل.. ما اتحرمش منك يا ست  
الحبايب..

ورغم أنه عقب كل مرة يطلب عشرين جنماً ولكنني كنت  
أواسي نفسي قائلة: "غلبان ماحيلتهوش غير مصروفه أكيد  
بيحوش يا كبد امه عشان يفاجئني بحاجة كبيرة" ..

الى أن دخل علي يوماً وفي يده بعض ورقات تيست لأنواع  
فاخرة من العطور؟ وقال بكل حنان:

- ماما شمي كده واختاري واحدة على ذوقك عشان دي  
تركيب بس ماركات عالمية..

فرحت جدا لأنني اعشق العطور الفاخرة.. وبالفعل أخذت  
أنشمم الورقات بتركيز لمدة ساعة وانا متحيرة أمها أختار..  
وأخيرا تخيرت واحدة وناولتها له قائلة بخجل مصطنع:

- بس دي شكلها غالى أوى يا حبيبي..

- إنتى علمتينا يا ماما أن إحنا لازم نهادى بقيمتنا.. مش كده والا إيه؟

حضنته في مشهد مؤثر ذكرني ببرنامج طارق علام زمان  
وتخيلت الخلفية الموسيقية أغنية (الست دي أمي) ولمعت  
الدموع في عيني وانا أقول:

- أيوه يا حبيبي بس انت عارف أمك يرضيها ولو حتى..

- عارف. عارف يا ماما.. وردة بلاستيك.. وأمسك بيدي

مقبلا إياها في حنان وهو يهمس: طول عمرك مضحية يا

ست الحبايب مالقاش معاكي 50 جنيه سلف لغاية ما

أحد مصروف الأسبوع؟

- مصروف الأسبوع اللي انت وأخده امبارح؟ وماله يا حبيبي

خد يا بابا..





وعدى النهار والمغربية جاية تتخفى ورا ظهر الشجر.. وعادت  
كتاكي من دروسهم؛ ودخلت ابنتي أولا ومالت على يدي  
تقبلها قائلة بكل فخر واعتزاز:

- كل سنة وانتى طيبة يا ست الكل أما كان حنة يوم يا ماما..
- اممممم.. كل سنة وانتى طيبة يا حبيبتي أنا مغمضة عيني اهو..
- ليه يا ماما سلامتك مال عينك.؟
- مال عيني إيه؟ فين يا بت هدية عيد الأم.؟
- إيه ده.؟ إنتى مادخلتيش أوضتك والا إيه.؟ الهدية ع  
التسريحة يا ست الحبايب..
- ما فيش ع التسريحة غير أم الوردة البلاستيك يا نن عين  
ست الحبايب..
- بس إيه رأيك.؟ جميلة صح.؟
- جميلة إيه يا دزمة يا بنت الدزمة.. فين يا بت البضاعة  
اللي كنتي مخزناها إنتى والمخفين أصحابك.؟
- بضاعة إيه.؟ اااااه قصدك هدايا المدرسات.؟ ما أنا كنت  
لسه هاككيك.. ده كان حنة يوم مش قادرة أوصفلك  
فرحتهم بالهدايا.. أهو أنا كده بقا ضمنت درجات أعمال  
السنة كلها.. كل سنة وانتى طيبة يا ست الحبايب..

وتركتني ودخلت غرفتها؛ وبدأت أشعر ببوادر جلطة ولكن دائماً  
يخلق في قضاة رحمة ويقطع من هنا ويوصل من هنا..  
فها هو حبيب امه يقترب منى مخبئاً شيئاً ما وراء ظهره  
فهتفت به في لوعة:

- حبيبي يا بني.. تعالى ف حضن أمك عوضها عن صدمتها  
في بنتها..
- كل سنة وانتى أحلي أم يا ست الكل.. اتفضلي يا ست  
الحبايب..

يا ليلة سودا مش طالعلها قمر ولا شمس! هي بغباوتها أم  
الوردة البلاستيك.. بس الشهادة لله دي أكبر شوية وشبه اللي  
كانت بتتلطع ع الشبشب البلاستيك زمان.. اااااااا يا خيبة  
ألمي في عيااااالى.. اااااا يا خسارة فلوسي اللي جروها منى  
النصايين.. والنبي لأكون مودياهم في داهية..

- خد يا ااض..
- فيه إيه يا ماما مالك؟
- مالي؟ مالي ما اهوراح يا روح الروح.. أنا عايضة أفهم حاجة  
واحدة بس بدل ما أولعلكم في نفسي دلوقتي.. أم الورق



ده إيه ياخويا ده صحيح على رأى الواد شادي.. قلبي على  
أمي اتفطر جوايا وأمي هتموت على شوية هدايا..

«...تمت بحمد الله...»



## الضرس

فقح مرارة.....	خطأ! الإشارة المرجعية غير معرفة.
18.....	صاحب الإدارة بواب العمارة.....
36.....	تأمين صحي.....
53.....	دنيا الميكروباص.....
64.....	جارتى السلفنجية.....
78.....	مدرس خصوصي.....
91.....	سَحل مدني.....
106.....	خبيرة أُسرية.....
124.....	معاش مبكر.....
142.....	"ميادة" الكيادة.....
159.....	وفر.. وارتا الاح.....
180.....	يا سنتر الهنا.....
194.....	الدكتور خلف.....
205.....	ست الحبايب يا حبيبة.....